

बरस पेलो ]

[ बानगी पेली

# जीवनकुटीर का गीत

[ माहवारी पोथी ]

लक्षण  
ली. वि. शि. न. प्र. शि. का. ज. २  
प. धा. गु. व. १९  
प. ल. य. प्र. ती. श.



प्रकाशक—

जीवन-कुटीर, वनस्थली

पो० ऑ० निवाड़े [ जयपुर स्टेट ]

दाम एक पोथी का }  
चार पीसा }

मई १९३४

{ दाम एक बरस का ।।।  
{ बाक मैसल का ।।। न्याः



## ❀ जीवनकुटीर का गीत ❀

जीवनकुटीर का बांका बावला गीत लोगों के घणा मनभाया और भोतसा आदमी म्हांने यांकी पोथी छपा देवा की सल्ला दीनी । सारां गीतां नै एकै समचै छपावासँ म्हांनै या ज्यादा ठीक लागी क म्हेनां की म्हेनां एक छोटी सी पोथी छपजाबो करै । गोतां की या पैली बानगी आपकै सामनै छै—कमसे कम असी ११ बानगी और छपाबा को विचार छै । म्हाँका मन में या उभार छै क हजारों आदमी यां पोथ्याँ का १२ म्हेनां का पक्का गायक बण जायला ।

आखातीज, सं० १६६१ का ]

हीरालाल शास्त्री ।

## जीवन कुटीर काँई छै ?

जैपर राज की निवाई तैसील में गाँवाँ का सुधार को काम करता ई संस्था नै पाँच बरस हो गया । जीवनकुटीर आपका ढङ्ग की एक निराली संस्था छै । या संस्था राजनीत का कामाँ सूँ बिल्कुल अलग रै छै । और अयाँ ही मत मतान्तर का खण्डन मण्डन में भाग कोनै ले । झगड़ा टण्टाँ सूँ बिल्कुल दूर रहणो और सबकी साथ मेल-जोल राखणो ई संस्थाको मूलमन्तर छै । गाँव में रहबाला आदमी गरीब छै और बाँके और कोई दूसरो सारो कोनै । अस्यां गरीबां की सेवाके ताँई जीवनकुटीर नीचै लिख्या काम करै छै :—

( १ ) खेती बाड़ी में सुधार करणो और बणै जठा-तक आसपास का गाँवाँ में चोखा सांड ल्यार छोड़ण ।

( २ ) लेण देण के ताँई सहकार सभा खोलर गरीबां की कर्जदारी मिटाणी ।

( ३ ) गाँव हालांनै सराब हो जी भगत बाँनै पौदणो कातणो सिखाणो जीसँ बाँनै सहजाँहीं कपड़ो मिलजाबो करै ।



( ४ ) गाँव हालांनै आरामोसर जस्याखरच्का मौकों पर सरधासारु खरच् करवा की बात सिखाणीं ।

( ५ ) गाँव का टावरॉनै काम चलाऊ हिन्दी और हिसाब में हुशियार करणा ।

( ६ ) गाँव का रोग्यांनै दवाईदेणी और घरर जार रोग्यां को इलाज करणो ।

( ७ ) आपका कपड़ानै, आपका घरां नै और सारा गाँव नै साफ राखबाकी बात बताता रहणो ।

आपकी जिन्दगी नै दूसरां की भलाई में बिताबा को इरादां राखबाला आदमी कुटीर में काम करै छै । कुटीर हाला सादगी सूँ रहछै और कुटीर का काम की खातिरं वां नै कई तरह की तकलीफां और भंझटां को रोजीना सामनो करणो पड़ै छै । जीवनकुटी कै कठा सूँ भी रुपया पीसा को बँध्योड़ो सारो कोनै और कुटीर हालां नै कोई कनै सूँ भी पीसो न माँगर भगवान् कै भरोसो रहणो ज्यादा चोरखो लागै छै ।

जीवनकुटी को काम पार पड़ जाय तो गरीब गाँव हालां का भोत सा दुख मिट जाय । आपका गरीब भायाँ को दुख मिटावो हरेक गिरस्ती को धरम छै । ई वास्तै

जीवन कुटीर का काम में सबनै आपको सीर करणो चायजे । कुटीर हाला आपका कामकी इतितहारबाजी करवो पसन्द कोनै करै, फेरभी म्हे या देखां क म्हांको काम जद दुनिया का चन्दा का पीसा सूँ चालै छै तो सब लोगाँ नै ऊँको पूरो हाल मालुम हो तो रहणो चायजे । ई वास्तै म्हे सालकी साल म्हांका कामका हाल चाल की पोथी छपावाँ छाँ और ई वास्तै ही ई गीतां की पैल वानगी में भी यो ज़रा सो हाल छपा दियो छै ।

म्हाँकामनमें या आस छै क म्हाँका उद्योग नै दुनियाँ ज़रूरी और कामको समझसी और म्हाँकी हिम्मत बधासी ।

कुटीर,  
मई, १९३४

विनोत-

हीरालाल शास्त्री ।



# जीवनकुटीर का गीत

## गीता को उपदेस

( श्रीमद्भगवद्गीता का दूसरा अध्याय का

५४-७२ श्लोकों को अनुवाद )

जीवनकुटी की सँवारै की प्रार्थना ।

सुणल्यो गीता को उपदेस कानजी भलो सुणायो छै—

अर्जन बोल्यो—

थिर बुद्धी का समाधिवान की, काना ! कसी पिछाण ?  
बोलै चालै बैठै किस विध, करद्यो आज बखाण ॥५४॥

श्री भगवान बोल्यो—

अपणा मन सँ सभी बासना, अर्जन ! दूर हटाय ।  
खुद ही खुद सँ तिरपत रैवै, जद थिर बुद्धि कहाय ॥५५॥  
दुख में होवै नहीं उणमणो, सुख को त्यागै चाय ।  
प्रीत रोस डर बीत चुकै जद, मुनि थिर बुद्धि कहाय ॥५६॥  
राजी दोरो होय नहीं जो, भला बुरा न पाय ।  
सब सँ नेह हटायो राखै, जद बुद्धी ठहराय ॥५७॥  
जियां काछवो भीतर खींचै, अंगों नै सुकड़ाय ।  
सबी विसय सँ इंद्रियाँ सिमटै, जद बुद्धी ठहराय ॥५८॥

भूख प्यास में विसय हटै, पण मिटै नहीं या चाय ।  
परमेसर का दरसण हो जद, भाग जाय छै चाय ॥५९॥  
कोसिस करता पिंडत की भी, जोरी सँ दे ताँण ।  
इन्द्रियाँ मथकर चित्त खींचले, कूँतीसुत ! तू जाण ॥६०॥  
इन्द्रियाँ बस कर जोग साधकर, करले म्हारो ध्यान ।  
इन्द्रियाँ जीं की बस में होवै, थिरबुद्धी तू मान ॥६१॥  
विसयां को नर ध्यान धरै जद, बामें लागण होय ।  
लागण में सँ बणै कामना, रोस बिघन सँ होय ॥६२॥  
रोस कस्यां सँ मोह बणै छै, मो सँ सुरता जाय ।  
सुरता बिगड्यां बुद्ध बिसट हो, पाछै नर विनसाय ॥६३॥  
राग रोस नै छोड़ चुक्योड़ी, इन्द्रियां बसमें न्याय ।  
अंतस बस कर भोग कस्यां भी, चित परसन रै जाय ॥६४॥  
चित परसन हो जाय जद्यां तो, दुख सारा मिट जाय ।  
क्यों-कर परसन चित की बुद्धी, जन्दी सी ठहराय ॥६५॥  
जोग नहीं तो बुद्धि नहीं हो, नहीं भावना आय ।  
भाव नहीं तो नहीं सांति हो, सुख असांत कै नांय ॥६६॥  
विसयां मांही चलती इन्द्रियां, कै पाछै मन धाय ।  
जल में भाल नाव नै जिस विध, वो बुध नै ले जाय ॥६७॥  
जीं की इन्द्रियां बस हो सारा, विसयां सँ हट जाय ।  
महाबाह अर्जन ! जद ऊंकी, बुद्धी थिर हो जाय ॥६८॥



सब प्राण्यां कै रात पड़ै जड़, ग्यानी रात जगाय ।  
 सारा प्राणी जाग रह्या हो, रात जद्यां पड़ जाय ॥६९॥  
 पाणी आता समदर नाई, जो कोई निसचल होय ।  
 भोग कत्यां भी सांती पावै, कामी सांती खोय ॥७०॥  
 छोड़ कामना और चायन्यां, ममता नै बिसराय ।  
 छोड़ हैंडि करै आचरण, वोही सांती पाय ॥७१॥  
 असी ब्रह्म की हालत पायां, नाहीं मोह सताय ।  
 अंत समै भी पारथ ! पावै, मोकस ही हो जाय ॥७२॥

### कुटी की काण

( छोख्यौं को गीत-कुटी की काण मानर कुटी की कैण  
 मुजब काम करवा की सीख भाई ने दे छै )

जीवन कुटी या अपणी छै ।  
 तू काण कुटी की मान, म्हारा बीरा रै ॥ १ ॥  
 नित रोज कुटी में पढ़वा सूं ।  
 तू होजासी गुणवान, म्हारा बीरारै ॥ २ ॥  
 घरमें पींदर कात्यां सूं ।  
 थारी रै जानैली स्यान, म्हारा बीरारै ॥ ३ ॥  
 दवा कुटी की लेबा सूं ।  
 थारा रोग मिटैला मान, म्हारा बीरारै ॥ ४ ॥  
 सहकार सभा में आबा सूं ।

थारी पासी कटै सुजान, म्हारा बीरारै ॥ ५ ॥  
 सांड गांव में राख्यां सूं ।  
 तनै बलद मिलै बलवान, म्हारा बीरारै ॥ ६ ॥  
 दौड़ कुमाई करवा सूं ।  
 तू होजासी धनवान, म्हारा बीरारै ॥ ७ ॥  
 बुरी चाल नै छोड्यां सूं ।  
 तनै मिलै धपाऊ धान, म्हारा बीरारै ॥ ८ ॥  
 बात ग्यान की सुणवा सूं ।  
 तू होजासी सुरग्यान, म्हारा बीरारै ॥ ९ ॥

### डरपो मत

( जीवन कुटी का सेवक कुटी सूँ डरपबाला भोला  
 पालत्यां को डर काडै छै )

डरपोमत म्हे तो थांका घर का छां ॥ डरपोमत० ॥  
 रोटी तो म्हे बांधर न्यावां ।  
 पाणी भी म्हे पीन्यां छां ॥ डरपोमत० ॥१॥  
 थांका घर सूं कुछ नहीं मांगां ।  
 चोखी बात सुणावाँ छां ॥ डरपोमत० ॥२॥  
 न्यारा मत का मत नै समझो ।  
 म्हे तो थांका मत का छां ॥ डरपोमत० ॥३॥



जीवन कुटी का म्हाँनै समझो ।

दुनियाँ का म्हे सेवक छां ॥डरपोमत०॥३॥

म्हां की चिंता कुटी करै छै ।

जद ईँ गैलौ बिचारौं छां ॥डरपोमत०॥५॥

थांका घर को फिकर करां छां ।

थांनै म्हां का समझां छां ॥डरपोमत०॥६॥

जीवन कुटी नै थांकी समझो ।

थांसूँ याही चावां छां ॥डरपोमत०॥७॥

### बोरा धुरिया को ख्याल

( बारलागांव में रोजीना खिलवाला नाटक की एक झांकी )

जवाब धुरिया को—

परमेसर देखै बोरा मानजा मत पाप कुमावै—

लेण देण तो भलो किसब छै, और भलो व्योपार ।

हक ईमानी बात करै तो, साजो साहूकार रै ॥ १ ॥

लेण देण सूँ धन्या चालौ, विणत्र पुगावै माल ।

दोन्युं काम भलांही कर तू, राख पुराणी बोलरै ॥ २ ॥

जवाब बोरा को—

खाबा नै मिलसी स्याणा पालती मत नीत डिगावै—

कैस्या प्यारा बचन सुणाया, भली सुणाई बात ।

पाप कुमाबो मै नहिं चाऊँ, बे हक पर या लात रै ॥ ३ ॥

मीठी मीठी बात बणा कर, थे ले जाओ आर ।

पाछो हाथ करोई कोनै, जद बिगड्यो बेवार रै ॥ ४ ॥

जवाब धुरिया को—

रिण हत्या सूँ सब डरपां छां, पाछा देवां ल्यार ।

म्हांसूँ संपट बैठै कोनै, करो एक का च्यार रै ॥ ५ ॥

भाव न्याव में सदा दबावै, नरजो अंतर काण ।

आधो तू पल्ला में पटकै, लियो लूटबो ठाण रै ॥ ६ ॥

जवाब बोरा को—

चिकती बात काडदी अवकै, म्हारै सामो झांक ।

दो पीसा जो नहों कुमाऊँ, खाऊँ काई राख रै ॥ ७ ॥

खेत कुमाई म्हारै कोनै, म्हारै यो रुजगार ।

ईँ में ही मै रोटी खाऊँ, सभी चलाऊँ कार रै ॥ ८ ॥

जवाब धुरिया को—

थारी रोटी कुण कोसौ छै, बन्द करे कुण कार ।

जाणाँ थारै याहि कुमाई, और नहों रुजगार रै ॥ ९ ॥

थारा पेट जस्यो हो म्हारो, रोटी माँगै रोज ।

म्हाँनै भूखौं मार मार कर, थारो जीवो नोज रै ॥ १० ॥

जवाब बोरा को—

घणां कहां सूँ बात बदैलो, मती दिवावै रोस ।

पैली द्यां छां पाछै लेवां, ल्यांवां कोनै कोसरै ॥ ११ ॥



लेण देण को नहीं जमानो, नहीं धीज को काम ।  
ले लूटा थे अस्या हुआ छो, लाज रखावै राम रै ॥ १२ ॥

जवाब धुरिया को—

साँची बात सुहाई कोनै, चिणको लाग्यो ठेठ ।  
करसा तो म्हे करां कुमाई, मौज उड़ावै सेठ रै ॥ १३ ॥  
म्हां का घर को लियो अलेवण म्हेल भुकाया आप ।  
तूंद फुलाकर बड़ो बण्यो छै, लागैलो अब स्राप रै ॥ १४ ॥

जवाब बोरा को—

काल दुकाल कडाया थारा, जीं की या आसीस ।  
म्हारो खालो हुयो टापरो, जद आवै छे रीस रै ॥ १५ ॥  
जीव लखोता फिरै रांडका, मांग बीस हजार ।  
काला कागद लियो फिरूँ छूँ, मांग्यां सँ तकरार रै ॥ १६ ॥

जवाब धुरिया को—

बीस हजार कडा सू ल्यायो, भोत दिखाई दाब ।  
थारा कागद तू ही मांड्या, घणो बदायो स्याब रै ॥ १७ ॥  
कुमा कजा कर तनै दिया छे, कोडी कोनै पास ।  
दीन दुखी नै घणो सतायो, जावैलो खो नास रै ॥ १८ ॥

जवाब बोरा को—

बाप मत्थो जद म्हारै आयो पुआ कराया छूट ।  
बिगड़ी थारी बात बणाई, जद्यां बताई लूट रै ॥ १९ ॥

बीज भात घूं हांसिज दे घूं, खावानै घूं नाज ।  
अटक्या थारा काम काड घूं, जद बोली छे गाज रै ॥ २० ॥

जवाब धुरिया को—

राज बीज अर नाज दियो जद, भोत कत्थो ईसान ।  
पाव तोल पंसेरी लेली, कडै गयो ईमान रै ॥ २१ ॥  
मीठो होकर उलै पेट में, चलै अनेकों चाल ।  
धोखो देकर नालिस करदे, कुड़क करावै माल रै ॥ २२ ॥

जवाब बोरा को—

जियां खुसी हो थे ले जाबो, देखो पाछा न्यार ।  
जद भी नालिस म्हे करां तो, म्हां नै घो धरकार रै ॥ २३ ॥  
सैमूला खाजाओ थे तो, लाग्यां थांको दाब ।  
धौन्यां की धैन्यां म्हे देवां, लेबा नै हरनांब रै ॥ २४ ॥

जवाब धुरिया को—

बादू बात करै मत बोरा, थारा न्यायो बीस ।  
वां बीसां का साठ चुकाया, फेर घूं बाकी तीस रै ॥ २५ ॥  
भोला छा जद लूट लिया तू, अब नहिं लागै दाब ।  
थारी म्हारी राख आबरू, आगै मत लै नांब रै ॥ २६ ॥

जवाब बोरा को—

म्हारो सारो घर खाकर तू, जोर दिखावै आज ।  
डरपा देबो धाम लियो जद, थारो ही यो राज रै ॥ २७ ॥



दिया जका तू खरा चुकादे, मती करै तकरार ।  
फेर बारणै थारै आवं, तो दीजे दुतकार रे ॥ २८ ॥

जवाब धुरिया को—

ल्यायो सो तो सभी चुकया, और चुकाया बाद ।  
राजी राजी घरां चल्यो जा, मती करै रंबादेरे ॥ २९ ॥  
थारी सारी बात सुणी छै, अब आ लागी मेर ।  
ठाली बात बदाई छै तो, हो जावैलो ढेर रे ॥ ३० ॥

जवाब बौरा को—

तू जीत्यो मैं हार गयो अब, म्हारी नीची मूँछ ।  
बाँडो हो तू करै दकाला, कसी कटाऊं पूँछ रे ॥ ३१ ॥  
थारो म्हारो बण्यो सनातन, बण्यो राखणो हात ।  
काम पड़्यासूं फेरुं आजे, थारी राखूं बात रे ॥ ३२ ॥

जवाब धुरिया को—

भोला ढाला हुया पालती, बांका नांप्या पेट ।  
थारी सारी चाल समझली, किया बण्यो छेसेठ रे ॥ ३३ ॥  
कलम कसाई घणा बड़ा छो, थांकी पड़गी बाण ।  
मीठी मीठी छुरी चलाकर हरो दुखी का प्राण रे ॥ ३४ ॥

जवाब बौरा को—

भूठी बात दूखती कैदी, मैं मन ल्युं छूं थाम ।  
बुरो मानबो मैं नहिं सीख्यो, गम खाबाको काम रे ॥ ३५ ॥

जवाब धुरिया को—

सांची सांची बात कही छे, बुरो भलाँ ही मान ।  
सांच भूठ को न्याय करैलो, ऊपरलो भगवान रे ॥ ३६ ॥

रस जीबा को

( पालती में ज्यान बापरवा की भांकी )

रस जीबा को र पिलादे रसिया,  
र चखादे रसिया रसजीबा को ।  
म्हां की कोथली कै बेजका घणा छै २  
डोरो ल्यार सिलादे रसिया रसजीबा को ॥ १ ॥  
ऊंली चालां चाल रह्यां छां २  
सूंली चाल चलादे रसिया रसजीबा को ॥ २ ॥  
आपां पंथी होय रह्या छां २  
गांव भला में लगादे रसिया रसजीबाको ॥ ३ ॥  
गाढी निंदरा मस्त पड्या छां २  
बेगो और जगादे रसिया रसजीबा को ॥ ४ ॥  
थोथा छांपण बाज रह्या छां २  
गरब गुमान भुलादे रसिया रसजीबा को ॥ ५ ॥  
म्हां को हिरदो बुभयो पड्यो छै २  
अब तो आर बिलादे रसिया रसजीबा को ॥ ६ ॥



ऐसा जाबा में सार नहीं छै २  
वीर बणार जिलादे रसिया रसजीबा को ॥ ७ ॥

### एक अठनी

( समझदार बहू सासू नै घरको कपड़ो घर में तय्यार  
करबा की सल्ला दे छै )

एक अठनीदे म्हारी सासू, पींदण ल्यार बिसाबा नै ॥  
गांठ बाँध रुई की जावै, घर को माल लुटाबा नै ॥  
घर को काम घराँ ही करस्युँ, जवाँ मिलौलो खाबा नै ॥  
घटी ओर घराँ ही पीसुँ, जाऊँ नाँय पिसाबा नै ॥  
घर में पींदर पूणी करस्युँ, जाऊँ नाँय पिंदाबा नै ॥  
घर में पींदूँ घर में कातूँ, लत्ता घराँ बणाबा नै ॥  
घर में पीसर रोटी पोल्थुँ, जाऊँ नाँय बिसाबा नै ॥  
घर की रोटी घर को लत्तो, चावै जीव जिवाबा नै ॥  
जीवन कुटी यो कस्यो उजालो, सुँलो चाल चलाबा नै ॥

### प्रलय-प्रतीक्षा नमो-नमो

( जीवनकुटीर की दिनांश्यां की प्रार्थना )

राग-रहित हो जन-सेवा की,  
शुभ-अभिलाषा नमो नमो ।

निर्भयता-युत-सत्य-शांतिमय,  
कर्म-चिकीर्षा नमो नमो ॥ १ ॥

व्यक्तिगत अरु पारिवारि की,  
स्थिति से ऊपर उठी हुई ।

वीरहृदय को जो सुख देतो,  
राष्ट्र-निनीषा नमो नमो ॥ २ ॥

अंधकार के बादल नभ में,  
मँडराते जब घुटे हुये ।

मृत्यु-मृत्य के बीच भटों की,  
जीवन-आशा नमो नमो ॥ ३ ॥

बाढ़ बेल को जब खातो हो,  
आशा का आधार कहाँ ।

ऐसी स्थिति में धर्म-स्थापन,  
की आशंसा नमो नमो ॥ ४ ॥

सत्ता का मद, धन की रचना,  
सांप्रदायिकी खींचातान ।

निर्वलजन-अवहेलन करना,  
अनय-जुगुप्सा नमो नमो ॥ ५ ॥

निज-दुर्बलता, घर की दुविधा,  
जनता का अज्ञान महा ।



कठिन-परीक्षा नमो नमो ॥ ६ ॥  
 भूख-प्यास अरु सर्दी-गर्मी,  
 वर्षा-आँधी सभी सहें ।  
 और सहें नित भ्रमण जागरण,  
 कष्ट-पिपासा नमो नमो ॥ ७ ॥  
 वैभव सुख की चाह नहीं हो,  
 मान बढ़ाई चहें नहीं ।  
 जीवन की परवाह नहीं हो,  
 प्रबल-मनीषा नमो नमो ॥ ८ ॥  
 मौसम के जिन चिहों को भी,  
 होना था अनुकूल जहाँ ।  
 जैसा की गति रोक रहे वे,  
 जलधि-तितीर्षा नमो नमो ॥ ९ ॥  
 तथा-कथित सब प्रबल-शक्तियाँ,  
 हों विपन्न में जुटी हुई ।  
 जगदीश्वर की दया-मया से,  
 जगत-जिगीषा नमो-नमो ॥ १० ॥  
 निर्धनता, अज्ञान, भीति ने,  
 जीवन का रस छीन लिया ।  
 मरणानन्तर-जीवन-दायक,  
 प्रलय-प्रतीक्षा नमो नमो ॥ ११ ॥

### पोथी मिलना का ठिकाना—

- ( १ ) जीवन-कुटीर, बनस्थली, पोष्ट निवाई ।
- ( २ ) मनोरञ्जन प्रेस, गोपालजीका रास्ता, जयपुर ।
- ( ३ ) सेवक-सदन, त्रिपोलिया बाजार, जयपुर ।



# जपर की बोली में गीताजी

दुनिया में अस्यो कुण छै ज्यो गीताजी नै कोनै जाएँ ? दुनियां की सारी बोलियाँ में गीताजी को तरजमो मौजूद छै । म्हारा ध्यान में या बात आई छै क गीताजी को तरजमो जैपर की बोली में होणो चायजे । थोड़ो सो तरजमो नमूना का तौर पर ई पोथी में दियो छै—यो नमूनो लोगाँ के दाय आबाकी खबर मनै मिलसी और म्हारो मन उमगसी तो मैं सारी गीताजी को तरजमो जैपर की बोली में छपास्युँ । नमूना का बारा में ज्यां की जसी राय हो वा मालुम होणी चायजे और कोई भूल चूक हो सो भी बताणी चायजे ।

हीरालाल शास्त्री ।

मनोरञ्जन प्रेस, गोपालजीका रास्ता, जयपुर ।

बरस पैलो ]

[ गानगी दूसरी

# जीवनकुटीर का गीत

{ माह्वारी पोथी }

शुकता के ३ गीतया ५५



प्रकाशक—

जीवन-कुटीर, वनस्थली

पो० ऑ० निवाई [ जयपुर स्टेट ]

दाम एक पोथी का }  
चार पीसा

जून १९३४ { दाम एक बरस का ।।। }  
{ डाक मैसूल का ।। } द्वारा



## ❀ एक छोटीसी अरज ❀


जीवनकुटी का गीत! की या दूसरी बान  
हाजिर है। जीवनकुटी जैपर राज को एक  
संस्था है। म्हे कुटी हाला कतरी मुसकलां  
सामनो करता हुया कैस्यो जरूरी काम कररह  
छां या बात अब आप लोगां सँ छानी कौनै  
घणी बात बदायाँ सँ काँई हो छे-आप गीत  
की पोथी का पक्का गायक बणजाओला तो  
नवादू गीताँ की मौज तो आपनै दो पीर  
की मदद आपकी मनभावणी संस्था जीवनकु  
नै मिलजासी। बस याही एक छोटी सी अर  
छे क आप पोथी नै देखताँ ही बारा म्हैनाँ  
पक्का गायक बणजाओ अर जीवनकुटी  
भला कार में आपको सीर करल्यो।

ता. १-६-३४ ]

हीरालाल शाह

वरस पैलो बानगी दूसरी

## जीवनकुटीर का गीत



### ❀ बारलागांव हालाँ की प्रार्थना ❀

प्रभुजी जलम सुधारोजी, सरणो थांको छै ।  
सरणो थांकोजी, म्हांको जलम सुधारोजी, सरणो थांको छै ।  
पेट भराऊ रोटी खावाँ, नित उठ थांका म्हे गुण गावाँ ॥  
दालद दुःख निवारोजी, शरणो थांको छै ॥१॥  
लीप्या पोत्या मकान राखाँ, साफ बत्करी धोती राखाँ ।  
गाँव साफ रै सारोजी, सरणो थांको छै ॥२॥  
पढ़वो लिखवो म्हानै आवै, कदे न कोई ठिगवो पावै  
प्रभुजी वेग उधारोजी, सरणो थांको छै ॥३॥  
म्हानै काम सदा ही भावै, ठालो रैवो नहीं सुहावै ।  
सुधरै मिनख जमारोजी, सरणो थांको छै ॥४॥  
मीनत कराँ कुमाकर खावाँ, नहीं सीत पर मन ललचावाँ ।  
हिरदो करो करारोजी, सरणो थांको छै ॥५॥



महाँको साँचो रूप पिछाणाँ, दुनियाँ की गत विधनै जाणाँ ।  
 डर अर वैम निकारोजी, सरणो थांको छै ॥६॥  
 बुरी बात सँ चित्त हटावां, नाहीं डरपां ना डरपावां ।  
 न्यायपंथ हो महां को जी, सरणो थांको छै ॥७॥  
 भूठ कपट सूं सदा बचाओ, महांनै साँचा साफ बनाओ ।  
 बोल न बोलां खारोजी, सरणो थांको छै ॥८॥  
 आपस की म्हे भली बिचाराँ, मन में कुठवो कदे न धारों ।  
 दिल समदर कर डारोजी, सरणो थांको छै ॥९॥  
 मिल जुलकर म्हे रैबो सीखाँ, बैर बिरोध मिटाबो सीखाँ ।  
 एको रहै हमारोजी, सरणो थांको छै ॥१०॥  
 गांव जात की सेवा करणी, शक्ती शान्ती मन में धरणी ।  
 जागै प्रेम हमारोजी, सरणो थांको छै ॥११॥

### नुकता को ख्याल

( पंच सरदार नुकतो कराबो चावै छै, घरधणी की सरदा कौने, मख्या हुया बाप दादा सुरगलोक में सूं नुकतो न करवाकी बात कैछै, उपदेसक उपदेस सुणावै छै-जद जार सबकै नुकतो न करवाकी जव जाय छै )

जवाब पंच सरदारां को

नुकतो तो करदे थारा बाप को रख जाग जिमीनै—

(१) नुकतो म्हे करस्यो म्हाका आपका

चाहे म्हाका को भी होवे

चाली आई रीत बड़ां <sup>सु</sup> छोड़ी किस विध जाय ।  
 जै छोड़ो तो नांव बड़ां को मांठी में गिल जाय रै ॥१॥  
 जात बिस्तर <sup>जसपा</sup> जसपा जगत में और कदे नहिं होय ।  
 ऊठ वारणै जो नहिं बिखरी सारी <sup>दीनी</sup> बोय रै ॥२॥  
<sup>वांकी अर वार</sup> जवाब घरधणी को <sup>जमावे मोटा जी</sup> <sup>एन जावे मोटा जी</sup>  
 सुण लीज्यो पंचो पीसो एक भी घर मांय नहीं छै—  
 हाथ जोड़ कर करूं बीनती सुणल्यो सब सरदार ।  
 बाल बाल पैलां को होगो और नहीं आधार जी ॥३॥  
 खाली कोठो पड्यो नाज बिन तन पर लत्ता नांय ।  
 दिन तोड़ूं छूं कयां जयां में कोनै मारी पांय जी ॥४॥

ज० पंच सर० को

मुर्दा ज्यां का गड्या पड्या छै विगड़ी बांकी जात ।  
 फिरै कंवारा डोलता कोई देखै कोनै दांत रै ॥५॥  
 भाई सगां कै फिस्थो जीमतो अब तू वाला खांवाँ ॥  
 कस्या किरावर पैली कां पर क्यों पाणी फिर जस्यरै ॥६॥

× ज० घरधणी को—

मुसकल सूं तो बीज मिल्यो छै लियो परायो बैल ।  
 थे आकर यो हुकम करो छो नुकता की कर सैलजी ।  
 नुकतो तो धण आसी कौने करसी चरवा लोग ।  
 बस बारै को होकर लाग्यो निमलाई को रोगजी ॥८॥



[ ४ ]

थोड़ा मोत <sup>ज० पंच० सर० को ।</sup>

पांच पचास बचासी जद भी नहीं लखपती होखे । <sup>रखा</sup>

मूंडा की हूँ राख काड कर विजनस <sup>ज० पंच० सर० को ।</sup> उजरी होय रै ॥१६॥

<sup>काम</sup> जाग जमीं तो फेर होयली यो मोसर नहिं आवै ।

दो मण चूण कस्यां विन <sup>ज० पंच० सर० को ।</sup> धास जलम अकारथ जाय रै १०

ज० घरधणी को ।

हाथ हाथ नै धीजै कोनै जाऊं कुण के पास ।

कोसिस तो मैं करूं मोकली मिलवाको नहिं आसजी ॥११

ज० पंचसर० को ।

धीर्ज पतीज घटी छै तो भी बैठास्यां सब सोय ।

अटक्यो थारो काम काडस्यां चाहे कुछ भी होय रै ॥१२

ज० घरधणी को

थे तो किरपा घणी करोला करस्यो म्हारो काम ।

ल्याऊं माथै बार कडा कर पड़ै चुकाणा दाम जी ॥१३

ज० पंचसर० को ।

ऐसो मोटो भाग खरच को पैदा दूणी होय ।

मर्द छतां ई बड़ै ठिकाणै नांमूंझी नहीं होय रै ॥१४

मालपुआं को बडो नांव छै म्हां की याही राय ।

दो पीसां के कारणै क्यों बात बड़ी बिगड़ाय रै ॥१५

नानी सूनी मौत नहीं छै करलै खूब बिचार ।

ठोड़ पुआ ही मांग रही छै म्हांको यो निरधार रै ॥१६

14

ज० घरधणी को ।

सेर नाज खाऊं छूं मैं भी समभूँ सारा बोल ।  
सरदा सारू काम होय छै हिरदा में न्यो तोल जी ॥१७

ज० पंच सर० को ।

मात पिता जण जलम दियो छै भोत करी बेगार ।

फोसे नुकतो <sup>करो</sup> करौं तो जीवा में धरकार रै ॥१८

ज० घरधणी को ।

थानै पंच बड़ा मैं मानूँ, राखूँ थांकी काण ।

खन बांध चोगरदी फिरगा लेन्यो म्हारा प्राणजी ॥१९

अरज करथा की म्हारी राखो, मैं या कैदी साफ ।

अरदाती क्यों लाद रहा छो अब तो कर द्यो माफजी ॥२०

३ जवाब बाप दादां को । <sup>सर्ग २१</sup>

नुकतो नहिं चावां सुणल्यो ध्यान सैं परलोक गया म्हे-

म्हांकै नांव करौं नुकता झूठा लीजो जाण ।

थांकी जीभ चटेड़ा मेलै जद देवै परवाणजी ॥२१॥

मरती बेल्याँ बुद्ध बिसट हो जद म्हे बोलां चूक ।

मरतां ही तो साफ दिखावै नुकता की नहिं भूकजी ॥२२

मिरतलोक में बसै जकां के नुकता की अभिलाक ।

मरता हो ज्यो भाग भाग कर पड़ै जीमवा डाकजी ॥२३



। जीवैछा जद आपां घर में रैवैछा सुख मान ।

[ आप मर्यां जुग परलो होवे बोलै लोग सुजानजी ॥२४

जीया जतरै हुई बंदगी दिया मर्यां सुं बाल ।

फाड़खती बस हुई आपणी अब कोनै लेवालजी ॥२५॥

पैल्यां घर में सरतन हो छो देखै छा चुपचाप ।

छतां दिवालो पुआ करो छो हुयो जघां सन्तापजी ॥२६

कतरो धन म्हे छोड़ मर्यां छा जाणां छां सब हाल ।

नुकतो माथै ल्यार कस्यां सुं होवैलो बेहालजी ॥२७॥

खावा को थे करो खुवाबो म्हांनै आवै रीस ।

मर्यागयां को चित्त दुखाओ लागैली दुरसीस जी ॥२८

म्हांनै थांको घणो भरोसो मानो म्हांकी बात ।

म्हांको भूठो नाँव करा कर मती जिमाओ जहत जी ॥२९

जनाव उपदेसक को ।

पञ्चाँनै लोपो स्याणा भाइयो घर देख चलो थे ।

नुकतो चाल बड़की नाहीं मानो म्हांकी बात ।

पाछै लाग्यो पाप आपणें जघां जिमाई जातजी ॥३०॥

सुणो जघांतो घणा काम की बात सुणावां एक ।

सासतर नुकतो नहीं बतावै करै जिमकड़ टेकजी ॥३१॥

जीतैजी तो थे नुकराओ रोटी मुसकल होय ।

मरवा पाछै पुआ करोछां सुं नहीं बंदगी होयजी ॥३२

मिठाई

जे चाबो तो मात पिता नौसेवा करवो जोग ।

मात पिता तो भूखा मरगा लोग लगावै भोग जी ॥३३

मरवा सुं तो दुःख होय छै मीठो किस त्रिध भावै ।

मर जावै सो घर जावै छै कंगला क्यों कर जाय जी ॥३४

थांकी पोईथे ही सेको दुख में संगी राम ।

हाथ पूंछ कर चल्या जायला एक न आवै काम जी ॥३५॥

घर में दीखै पड्यो दिवालो पंच करावै नांव ।

भूठो नांव काम कद देसी जाणै सारो गांव जी ॥३६

जिमी जामां नै गौरे रख कर बड़ा बणो छो आज ।

इज्जत हाथां वेच वाच कर रखवा लाग्या लाज जी ॥३७

थेही थांकी करो बुराई और करै नहिं कोय ।

सारा मिलकर बंद करो तो चर्चा भी नहिं होय जी ॥३८

भाई सगा तो भली विचारै बिगड़ी साथै बात ।

पेट भरै अर पोट बाँधलौ भली जिमाई जातजी ॥३९

पैली का तो पंच बड़ा छा निमटायौ छा न्याव ।

कंगला पंच हुया ये देखो खावा को कै च्याव जी ॥४०

जनाव आखिरी शामिल को ।

नुकता नहिं करणा कैणा मानणा घर बार बसाणा ।

सासतर में जो बात लिखी हो करणी बिसवा बीस ।

सासतर वारै चाल औफत हाड रख्या छो पीस जी ॥४१

याजकर नीको कर लिखे कीश जी



जात विरादर सोस धरो ये करो भलाई धाप ।  
 गास्या खातिर जात न्यात को मती बंधाओ पापजी ॥४२॥  
 मात पिता की सेवा करणी लेणी अग्या मान । करणी मदी  
 माल मर्यां पर उड़ा उड़ा कर मती करो अपमान जी ॥४३॥  
 आपसरी की करो भलाई करो बुरा को त्याग ।  
 बिन जीम्यां ही जार धणी कै भली बंधाओ पागजी ॥४४॥  
 देखा देखी तीखु करो मत समझो सोच विचार ।  
 (गाँव) जात को करो भलाई होसी जद उदार जी ॥४५॥

### नुकता को पाप ।

( नुकताको खण्डन )

जोवनकुटी को कैण सुणौ थे,

नुकतो पाप घणो जवरो ॥१॥

घर में मोत भई जद देखो,

माच्यो रोज घणो जवरो ॥२॥

मरो लाश पर बैठ र जीमो,

समझो पाप घणो जवरो ॥३॥

दुनिया जीमै नांव मरया को,

ऊंलो ख्याल घणो जवरो ॥४॥

× जागो जिमी लीलाम करानै,

× होवै नांव घणो जवरो ॥५॥

ख्याल साटे लुट्यो टापरो,  
 समभयो काम घणो जवरो ॥६॥  
 अंगनू छा सो हुया लुटेरा,  
 लूट्यो माल घणो जवरो ॥७॥  
 ज्यांकी जूती ज्यांको माथो,  
 देखो ख्याल घणो जवरो ॥८॥  
 बड़सी चूकी हुया भिखारी,  
 पड़ गयो काल घणो जवरो ॥९॥

नुकता को थे जीमण छोड़ो,

बणसी काम घणो जवरो ॥१०॥

मरद बणो थे पाप छोड़यो,

मिलसी साथ घणो जवरो ॥११॥

सासतर नुकतो नहीं बतानै,

फैल्यो जाल घणो जवरो ॥१२॥

नुकता बिना बंधाओ पगड़ी,

होसी ठाठ घणो जवरो ॥१३॥

### पींदण विसाओला

( घर का कपड़ा को घर की रोटी सों मुकाबलो )

चूलो चलै तो आपकै चर्चों विसाओला,

घटी चलै तो आपकै पींदण विसाओला ॥१॥



चर्खों चलो भायला छैरै सदा हो साथ मे,  
 चलो तो थे घाल मेल्यो चर्खों विसाओला ॥२॥  
 घट्टी पीदण साथ का छै बात पक्की जाए ज्यो,  
 घट्टी तो विसाय मेली पीदण विसाओला ॥३॥  
 नाज घर में पीसल्यो छो पीदस्यो घर में रुई ।  
 कातबा की मौज लेस्यो पीदण विसाओला ॥४॥  
 पिसाई का पीसा लागै पीदै कोने सीत में ।  
 पीदाई का पीसां सूं हो पीदण विसाओला ॥५॥  
 पिसाई का पीसा लागै चुन बिगड़े गांठ को ।  
 चोखी पूर्णी चायजे तो पीदण विसाओला ॥६॥  
 एक रेजो मोल ल्यावो मण कुपासी लगसी ।  
 कुपास घर में राखस्यो तो पीदण विसाओला ॥७॥  
 बनथली का सब घरां में न्यारो पीदण देखल्यो ।  
 सांची मौज लेणी हो तो पीदण विसाओला ॥८॥

### सांची बात ।

( दो चार आख्या देख्या ख्याल )

देखो सारी सांची बात कुटी या खूब दिखाई छै ।  
 सासतर को तो नांव धरै छै,  
 मन की करै उपाइ ।

अकरम करतां बात बड़ाँ की,  
 देवै तुरत भिड़ाइ ॥१॥  
 एक राम का बेटा समला,  
 झूठी ल्होड़ बड़ाइ ।  
 काम करयाँ सूं बड़ा होय छे,  
 ठाला की हलकाइ ॥२॥  
 भागा दौड़ी करे पालती,  
 दुनियां खाय कमाइ ।  
 खाती जाय बिगोती जावे,  
 या कैसी नुगराइ ॥३॥  
 जीव जीव को बैरी दीख्यो,  
 देख भाल परखाइ ।  
 मुरदा नै भी मुरदा मारै,  
 आख्याँ देख बताइ ॥४॥  
 जीसूं निमलो जीने मिलगो,  
 पूरो धोंस जमाइ ।  
 जद बाबोजी सबलो मिलगो,  
 टांगां पूंछ दबाइ ॥५॥  
 घरको धंधो घर में करले,  
 खोटी आस पराइ ।



घरको पीसो घर में राखे,  
 बोलो कसी बुराइ ॥६॥  
 ठाला बैठ्या हुकम करै छै,  
 के दिन की टणकाइ ।  
 अब तो संमलो हवा बदलगी,  
 कस्ता करघाँ भलाइ ॥७॥

### कन्या-पुकार

( कन्यावां की तरफ सूं मोट्यारां आगै )

कन्या खडी पुकाराँ चितयो सुणो र समभो ।  
 थाँका ही घर में जलमी म्हाने भी थाँकी समभो ॥१॥  
 छोरी हुई सुण्या सं अफसोस थे करो छो ।  
 छोरेयाँ जस्या ही छोरा सबनै समान समभो ॥२॥  
 थे ही जलम का दाता थे ही दुभाँत राखो ।  
 यो पाप को घडो तो फूट्याँ सरैलो समभो ॥३॥  
 गुडती फिराँ अकेलो पगल्याँ जरा बडी हाँ ।  
 जद खेलवा का दिन हो कर व्याव काडो समभो ॥४॥  
 जद दाब हो रुप्याँ की बाई को व्याव रोपो ।  
 ढाँडाँ जयाँ ही बेचो अब तो जरा सा समभो ॥५॥  
 जद लोभ हो रुप्याँ को कुण जोडपो भी देखे ।  
 बूडो बडो कस्यो भी लाडो बुलाओ समभो ॥६॥

घर का धणी का घर में जद जार रेणो चावै ।  
 थे काम की गरज सूं कोनै खिंदावो समभो ॥७॥  
 घर आपको संभाल्यां सोभा बधे छै घरको ।  
 क्यों अंतरा छो पटको बण दावला थे समभो ॥८॥  
 मोट्यार सूं घणी या कस्ता करे लुगाई ।  
 जूही समान जद भी क्यों हो कदर थे समभो ॥९॥  
 गाडी का पाचरा क्यों थे चाचरो गिणो छो ।  
 मूरख दणया छो खुद तो, मूरख सभी नै समभो ॥१०॥  
 मोट्यार थे बाण्यां छो अब तो करो भलाई ।  
 थाँकी गिरस्ती जद ही अच्छी चलेली समभो ॥११॥

### चूँदड़ी !

( घर को पींदयो, कात्यो अर बणयो कपडो पैरवा की सीख )

ओड़ो खूब चली छै नारी ! सजधजवारा चूँदड़ी —  
 घर में रुई पींदो आप, कातो सूत घरां ही आप ।  
 घर की घरमें धरो बणाय, घराँ की ओड़ो चूँदड़ी ॥१॥  
 घर में मिलै जसी म्हे रोना, खावां राजी होकर रोटी ।  
 रोटी मोल कदे नहीं आप, खरीदो मतना चूँदड़ी ॥२॥  
 थे तो मोट्यारां नै पूँडो इज्जत कडै गई सो पूँडो ।  
 पगड़ी पड़ी सीस सूं पाय, लगावै थामो चूँदड़ी ॥३॥



रंगबो जीवनकुटी में सीखो, आपो आय अडै ही सीखो ।  
 ओडो देख भाल हरखाय, बचाणी पीसा चूँदड़ी ॥३  
 मंयो जार मोल को ल्यावै, औड्यां पैर्यां अंग दिखाने ।  
 थे तो फाड़ बगावो बार, दिखाणी अंगकीं चूँदड़ी ॥५  
 घर को पीसो फरो बगावै, मयाँ ओड बावली रघावै ।  
 घर में पड्यां दिबालो डाक, रखावै लज्जा चूँदड़ी ॥३  
 घर को पीसो काड मतीना, घर पैला को भरै मतीना ।  
 पीसो देख बयो यो जाय, थमावै पीसौ चूँदड़ी ॥७  
 मंयो फूफन्यो सी नहीं डाटै, उलझ जाय तो झटपट फाटै ।  
 उतर्यां सूँ जो दे नहिं काम, विसाओ मतना चूँदड़ी ।  
 बामण बाण्या हुया बावला, मोल काटता फिरै बावला ।  
 वांको जीव मंयाँ में जाय, विसावै झीणी चूँदड़ी ॥६  
 थे तो सीख भला की मानो, मनमें बुरो कदे नहिं मानो ।  
 घर की डूब रही या नाव, किनारे ल्यावै चूँदड़ी ॥१०॥

## जीवनकुटी पाँच बरस की होगई !

गीतां की पैली बानगी में आप लोगां नै या मालम करदी गई क जीवनकुटी काँई छै । दिसंबर १९३३ में डिग्गीहालाँ का नोरा ( जैपर ) में जीवनकुटी को हजारां आदम्याँ को जलसो हूयो सो भी आपनै हालताई नीकां याद होसी । अर बार थोड़ा दिन पैली खास बनस्थली में ज्यो उच्छव हुयो ऊँका समाचार भी आप सुण्या होसी । जीवनकुटी नै लोग भोत चावै छै—जद ही अस्या गरमी का मौसम में किराया की मोटर जसी बुरी सवारी में गांठ को भाड़ो आपकै कनै सूँ लगार भी जैपर स्टैर का भोतसारा आदमी जलसा में सामल होगया । जलसा की रंगत बेडव रही—सैकड़ां आदमी आधी पाछै तक जम्या रह्या अर पचासाँ तो सारी रात ही आँख्याँ मावोकर काढ़दी । एक ही नहीं अनेक भाई ऊवा हो होर बोल्या अर म्हांकी हीमत बँधाई । म्हे तो म्हांनै क्योँ भी कौनै समभां—पाँच बरस सूँ वणेछे सो बन्दगी बजाद्याँझाँ अर म्हां को जीव सोरो करल्यां छं । पण जैपर का पावणां तो म्हां की घणी बड़ाई करी अर म्हांनै लाजा ही मार नाख्या । अब एक तरफ तो म्हे जैपर हालां को गुण मान्यो वै म्हां की असी चौखी संभाल करी—पण दूसरीतरफ म्हे वांनै ओलमो भी जरूर देस्यां क वै म्हां की अतरी ठी बड़ाई करनांखी ।



जलसा में छोरी छोरा व लुगायां न्यारा न्यारा गीत सुणाया  
अर म्हे म्हांकी पाँच बरस का हालचाल की छप्योड़ी पोथी भी बांचर  
सुणाई । जैपर का पावणां म्हां का काम नै चोखो समभयो जीं को  
एक मसोदो बणार पास कर दियो और म्हांकी मदद कै वास्तै  
रुप्यां की बोझाड़ कर नाखी । म्हे देखता ही रैगया क लोग पैली  
सँ पल्लै बांधर खूब पोंच्या ! जैपर श्हेर का रैवाला पावणां नै  
बारलागांव में तकलीफ तो होती सो तो हुई ही । म्हे म्हांकांती  
सँ ठंडा जलकी मनवार करदी—और दूसरै दिन संवारै सांच्यां ही  
रावड़ी पार सीख देदी ।

जीवनकुटी अब पाँच बरस की होगई और जलसा कै दिन  
आयंदा कै वास्तै ई संस्था की घणी ऊँडी नीव घाल दी गई ।  
आप लोग जीवनकुटी पर सदा ही किरपा बणी राखवो करो बस  
आपसँ याही चावां छां ।

हीरालाल शास्त्री ।

### पोथी मिलबा का ठिकाणा—

- ( १ ) जीवन-कुटीर, वनस्थली, पोष्ट निवाई ।
- ( २ ) मनोरञ्जन प्रेस, गोपालजीका रास्ता, जयपुर ।
- ( ३ ) सेवक-सदन, त्रिपोलिया बाजार, जयपुर ।



## जैपर की बोली में गीताजी

दुनिया में अस्यो कुण छै ज्यो गीताजी नै कोनै जाणै ? दुनियां की सारी बोल्यौं में गीताजी को तरजमो मौजूद छै । म्हारा ध्यान में या बात आई छै क गीताजी को तरजमो जैपर की बोली में होणो चायजे । थोड़ो सो तरजमो नमूना का तौर पर ई पोथी में दियो छै—खो नमूनो लोगां कै दाय आबाकी खबर मनै मिलसी और म्हारो मन उमगसी तो मैं सारी गीताजी को तरजमो जैपर की बोली में छपास्युँ । नमूना का बारा में ज्यां की जसी राय हो वा मालुम होणी चायजे और कोई भूल चूक हो सो भी बताणी चायजे ।

हीरालाल शास्त्री ।

मनोरञ्जन प्रेस, गोपालजीका रास्ता, जयपुर ।

## जीवनकुटीर का गीत

{ माहवारी पोथी }

५२४ बुधरो  
॥ ११ मारी २



प्रकाशक—

जीवन-कुटीर, वनस्थली

पो० आँ० निवाई [ जयपुर स्टेट ]

दाम एक पोथी का } जुलाई १९३४ { दाम एक बरस का ।।।।  
च्यार पीसा } डाक मैसूल न्यारो



## मसालादार !

बारलागांव का लोगों ने समझावा के वास्तै  
वांकी खुद की बोली में गीत बणाया और स्हैर  
हालां नै भी वै गीत चोखा लाग्या तो वांनै  
छा जस्या नै हो छपवा दिया । पण मालम पड़े  
छै क स्हैर हालां के वास्तै थोड़ा मसालादार गीत  
भी चायजे । ई वास्तै थोड़ा नुर्वा गीत बणाणा  
पड़सी ज्यांकी स्हैरी ढाल होसो और ज्यां में  
स्हैर की सी बातें होसी । व्याह स्यादी का  
और दूसरा मौकां का गीत भो बण जायला  
तो छपा दिया जायला । स्हैर हालां के वास्तै  
गीत छपावा को विचार करयो जद अब काई  
कराँ म्हाँ बारलाँ गाँव हालां नै भी पंगत गैल  
पुरसगारी करणी पड़सी—

वा० १ । ७ । ३४

हीरालाल शास्त्री ।

## जरा सी मदत चायजे

पाछला पांच बरसां में जैपर राज का रैवाला भोतसा लोग  
जीवनकुटी की गैरी मदत करी छै । म्हांकी निगै में जीवनकुटी का  
काम नै सभी चोखो समझै छै । रुप्यो पीसो भी म्हांनै चावै तो  
छै, पण म्हांनै रुप्यो पीसो मांगवो सुवावै कोनै ।  
म्हांनै या आस भी छै, क म्हांनै चासी जतेरा रुप्यो  
पीसो बिना मांग्यां भी चाल्यो आसी । रुप्या पीसा की कमी सँ  
जीवनकुटी को काम रुकै कोनै म्हांनै यो विसवास छै । अब  
म्है एक दूसरी तरै की मदत दुनियां सँ चावां छां । वा, याही क  
आप लोग गांव सुधार का काम नै आपको खुद को समझो ।  
गांव सुधार को काम भोत बड़ो छै—और ई नै करवा वेई बड़ी  
भारी ताकत चायजे । म्हांरी राय में ई काम की एक कमेटी  
बणाई जाय और ऊँ कमेटी की मदत के वास्तै एक सभा भी  
बणाई जाय ।

में चाऊँ जसी कमेटी बणजावै तो वा कमेटी गांव सुधार  
को भोत बड़ो काम कर सकै छै । म्हारा खयाल सँ कमेटी नै  
राज सँ भी मदत मिल सकै छै । आजकाल गांव सुधार को काम  
कोई नुई बात केनै । आपणा देश में कई जगां सरकार की  
तरफ सँ भी यो काम हो रह्यो छै—सो अब जैपर राज भी ई काम  
में पाछै नहीं रैवैलो । राज की तरफ सँ पैली दिखा लियो जाय  
क कसी जगां काइ तरे को काम हो रह्यो छै—जीवनकुटी ज्यो  
काम करयो छै वो भी नीकां देख लियो जाय—अर फेर यो विचार



[ ख ]

कर लियो जाय क जैपर राज में काई तरै सँ काम हो सकै छै ।  
यो काम जरूरी छै—ई बारा में सबकी एक राय छै—जरूरी छै तां  
करगो भी चायजे—बस सवाल यो ही छै क ई काम नै करयो  
कियां जाय । पण एक बार राज या विचार ले कयो काम करगो  
ही छै जद पाछै तो सी गेला दीख्यासी । जीवनकुटी का सेवक आपमँ  
बणी जतरी बन्दगी बजा दी और आयनदा बगसी जतरी बजाता  
रैसी । पण हालताई म्हांकी अतरी आकाय कोनै क सारा राज में  
यो काम फैला सकां । इतनो बड़ो काम तो राज ही कर सकै छै—  
और राज नै जद पिरजा की मदत भी मिलजाय जद तो सोनो  
और सुगन्ध हो जाय ।

म्हांकी एक अरज याही छै कि राज का हाकिम—अफसर  
जीवनकुटी का काम नै देखै, ऊँ पर विचार करै और पाछै जचै  
तो गांव सुधार को काम राज की तरफ सँ छेड दियो जावै ।  
पिरजा सँ भी म्हांकी या ही अरज छै क वैभी जीवनकुटी का काम  
नै देखै और देख्यां पाछै जचै तो जगां जगां अस्यो काम छेड़वा  
को परबन्ध बांधै । काई राज नै काई पिरजा सबनै म्हां गरीबां  
की तरफ को न्योतो छै क वै जीवनकुटी का काम की तरफ  
निगै करै ।

हीरालालशास्त्री ।

बरस पैलो बानगी तीसरी

## जीवनकुटीर का गीत

सेवक—फरियाद ।

[ ज्यो पालत्यां का सेवक बांकी तरफ सँ भगवान्  
कै आगै करी छै ]

भगवान् ! अब कद्यांसी करुणा की ढेर सुणस्यो ।  
सेवक खड़ा पुकाराँ प्रभुजी ! कद्यांक सुणस्यो ॥ १ ॥  
भोला हुया ये करसा आप्यो नहीं पिछासै ।  
वरदान थाँसँ माँगै प्रभुजी ! कद्यांक सुणस्यो ॥ २ ॥  
कर कर कुमाई सबकी ये पालणां करै छै ।  
रोटी बिना ये तरसै प्रभुजी ! कद्यांक सुणस्यो ॥ ३ ॥  
गल्ला कुपास करसा पैदा करै छै ये ही ।  
लत्तां बिना ये तड़पै प्रभुजी ! कद्यांक सुणस्यो ॥ ४ ॥  
थोथा पड्या ये घरमें करजो घणो वदायो ।  
भूठो गुमान राखै प्रभुजी ! कद्यांक सुणस्यो ॥ ५ ॥  
कोठ्यां का पाणी सूक्या विरखा भो धोखो दे छै ।



बलदां को हाल बोदो निमलो तमाम धन छै ।  
 छै खात मूत थोड़ो प्रभुजी ! कद्यांक सुणस्यो ॥ ७ ॥  
 हठसँ करै कुमाई साखां निव्याँ सो देखै ।  
 दावो पड़ै ख टीड़ी प्रभुजी कद्यांक सुणस्यो ॥ ८ ॥  
 जुगता कद्यांसी लागै साखां खलाँ में आवै ।  
 रीता जद्यांभी रैवै प्रभुजी ! कद्यांक सुणस्यो ॥ ९ ॥  
 रोटी मिलै तो खानै लत्तां बिना सरानै ।  
 माथै कडार ल्यावै प्रभुजी ! कद्यांक सुणस्यो ॥ १० ॥  
 चानै करै बुराई उल पेट मांय कोई ।  
 पण आपये लड़ैला प्रभुजी ! कद्यांक सुणस्यो ॥ ११ ॥  
 सब पर पड़ी छै विपदा जी को उपाय करणो ।  
 मिलकर ज़रातो सीखै प्रभुजी ! कद्यांक सुणस्यो ॥ १२ ॥  
 बारै गरु का जाया घर में हो सांड टांडै ।  
 मुरदा अस्या बणया ये प्रभुजी कद्यांक सुणस्यो ॥ १३ ॥  
 बाज़ार में भलांहं कुछ भी कदर नहीं हो ॥  
 जद जाय ये कचैड़ी कुत्ता जसी ही दर हो ॥ १४ ॥  
 भाई सगां में जानै जद ये बड़ा बणै छै ।  
 अब आबरू रखाओ प्रभुजी ! कद्यांक सुणस्यो ॥ १५ ॥  
 जीवन कुटी का सेवक यानै भली सुझावै ।  
 पण बैम का भस्या ये प्रभुजी ! कद्यांक सुणस्यो ॥ १६ ॥  
 ज्यानै बणाणो मतलब चाहे जियां जचावै ।

वांकी ये लैर लागै प्रभुजी ! कद्यांक सुणस्यो ॥ १७ ॥  
 खुद पालती का जाया अर पालती नै लूटै ।  
 कुल में हुया ये काग्या प्रभुजी ! कद्यांक सुणस्यो ॥ १८ ॥  
 गंगा हुया ये करसा नाहीं जुवान उपड़ै ।  
 बैरा हुया भला की वार्ता सुणै नहीं छै ॥  
 थांकै कनै जद्यांही प्रभु ! हार कर म्हे आया ।  
 अब पालती की अर्जी प्रभुजी ! कद्यांक सुणस्यो १९-२०  
 प्रभुजी ज़रा अकल द्यो प्रभुजी ज़रा जुरत द्यो ।  
 प्रभुजी मरद बणाओ प्रभुजी ! कद्यांक सुणस्यो ॥ २१ ॥

### नारी-मरदाणी ।

[ पालती की लुगाई का दुख की फोटू ]

नारी मरदाणी ! त आबरुकी अम्मर सैनाणी !-नारी मरदाणी ।  
 खाली होगो टापरो सो देखलै ए मरदाणी ।  
 आंख्याँ खोलर-आंख्यां खोलर झांक, तूतो ईकै कानी भंका,  
 अब तो घर कै कानी झांक नारी मरदाणी ॥ १ ॥  
 छोरा छोरी बावड़ बावड़ रोटी मांगै मरदाणी ।  
 भूखा रोवै-मरता रोवै नार, थारा कालजा का टूक,  
 थारा हिवड़ा का ये टूक नारी मरदाणी ॥ २ ॥  
 सी सरदीमें थरथर धूजै थारा टावर मरदाणी ।  
 तनपर लत्तो तनपर लत्तो नाख, अब तो याँका तन नैटांक,



यांकी सी सरदी तू डाँट नारी मरदाणी ॥ ३ ॥  
 लीरक लीरा घाघरियो तू पैर-चाँ डोलै मरदाणी ।  
 लाजां मरगी लाजां मरगी लाज, थारा नागा तन नै देख,  
 थारो डील उघाड़ो देख नारी मरदाणी ॥ ४ ॥  
 आज बीत्यो पीसणो जद पीसै काँई मरदाणी ।  
 घर में कोनै घर में कोनै नाज, जद भी ऊपरली छै दाब,  
 तो भी देबा की छै दाब नारी मरदाणी ॥ ५ ॥  
 बोरो भी यो बणयो कसाई कुड़क लियायो मरदाणी ।  
 देखै छै, तू देखौ छै तू नार, थारी छ्याली लरड़ी जाय,  
 थारी भैस टांगर जाय नारी मरदाणी ॥ ६ ॥  
 ढोलाजी को कालजो तो भास्यो धड़कै मरदाणी ।  
 घरकै भीतर घरकै भीतर नार ! यो तो थारै ताई नार,  
 यो तो बारै जाकर गार नारी मरदाणी ॥ ७ ॥  
 ढोलाजी तो हाथां चुड़लो पैरलीनों मरदाणी ।  
 थारा घरकी थारा घरकी लाज, तू तो हिम्मत करकै राख,  
 अब तो मरदी करकै राख नारी मरदाणी ॥ ८ ॥  
 थारा घर को काम सारो हात थारै मरदाणी ।  
 डूब रही छै डूब रही छै नाव, या तो थारा घर की नाव,  
 त्यारो थारा घरकी नाव नारी मरदाणी ॥ ९ ॥  
 भाग कुआ में नाखथे तो काम करो ए मरदाणी ।  
 जीवनकुटी की जीवनकुटी की कैण सारू चालो सारी नार,  
 थे तो चालो स्याणी नार नारो मरदाणी ॥ १० ॥

## घूँघटो ।

( पड़दा को खण्डन )

थे तो बारै उघाड़ो सारो आफत वारो घूँघटो ।  
 लाग्यो भोत बड़ो यो पाप, अब तो दूर हटावो आप;  
 सुधरै मिनख जमारो प्यारो, बार उघारो घूँघटो ॥१॥  
 सैदा सैं तो पड़दो करणो, पैला देख नेक नहिं डरणो ।  
 देखो ऊंली चाल चली या, बार उघारो घूँघटो ॥२॥  
 मँडो घूँघट माँय लुखावो, गैलै चलतां लोग लुभावो ।  
 अब तो निरभै होर रहो थे, बार उघारो घूँघटो ॥३॥  
 घूँघट में क्यों पाप छिपाओ, पाप-नहीं तो क्यों घबराओ ।  
 छाँड़े पाँदो भाव विसय को, बार उघारो घूँघटो ॥४॥  
 डील लुखायाँ सत नहिं रैणो, मनका बेल सैं ही सतरैणो ।  
 जूझो वीर भोम को नार, बार उघारो घूँघटो ॥ ५ ॥  
 बेमारी थे यों ही भुगतो, पड़दा सैं कुछ ज्यादा भुगतो ।  
 आधी चंगी बार बणो थे, बार उघारो घूँघटो ॥ ६ ॥  
 घर की घर में पड़ो सिड़ो थे, कुछ तो बारै आर अड़ो थे ।  
 उजड़ बोला काम पड्या ये, बार उघारो घूँघटो ॥ ७ ॥  
 खुली हवा में घरसैं निकलो, सैल देखवा बारै निकलो ।  
 मुरदा पण नै छोड़ सभी थे—बार उघारो घूँघटो ॥८॥  
 धरम करम में संग पती को निरभै देणो संग पती को ।



( ६ )

- ✓ थाँका हक नै नार संभारो, बार उवारो घूँघटो ॥ ९ ॥
- ✓ देस विदेसां पड़दो दूख्यो, घणो पुराणो धड़को छूख्यो ।
- ✓ हिम्मत को यो खेल सुणो थे, बार उवारो घूँघटो ॥१०॥
- ✓ पड़दा दानव मार भगावो, जल्दो सी थे पिंड छुटावो ।
- ✓ जीवन की यों सार करो थे, बार उवारो घूँघटो ॥११॥

### केश्यो ।

[ गरीब का दिल कै माफिक लाल केश्या की धुन ]

एका रै एका प्यारा बेगो बेगो आव रै ।  
 थारै रै आया सूँ कारज होयलो ॥ १ ॥  
 धन्या रै धन्या भाया प्यारो म्हाँनै लाग रै ।  
 ठाला को दुनियाँ में प्यारा पै नहीं ॥ २ ॥  
 घाटा रै घाटा बैरी बाँध गूदड़ा चाल रै ।  
 ठैस्या सूँ बिगड़ैली थारी आबरू ॥ ३ ॥  
 पीसा रै पीसा प्यारा पल्लै म्हाँकै ठैर रै ।  
 चाय की बेल्यां क्यो भास्यो हँ रह्यो ॥ ४ ॥  
 ताता रै ताता बैरी ठंडो होकर बोल रै ।  
 थारी रै टणकाई कै दिन चालसी ॥५॥  
 सूता रै सूता प्यारा अबतो बेगो जाग रै ।  
 सोयां सू भाईड़ा म्हारा नै सरै ॥६॥  
 बी० ए० रै बी० ए० भाया धंधो करवो सीखरै ।

( ७ )

फेशन सूँ घरकां नै लेकर डूबसी ॥ ७ ॥  
 सैरी रै सैरी प्यारा पैर जिमी पर टेकरै ।  
 ऊंचो रै झांक्या सूँ ठोकर खायलो ॥ ८ ॥  
 वामण रै वामण प्यारा असल धरम नै पालरै ।  
 ठाली रै वातां कै बाथ्यां मती पड़ै ॥ ९ ॥  
 ठाकर रै ठाकर प्यारा राजधरम नै पालरै ।  
 पिरजा को करबो कर पूरी पालणा ॥१०॥  
 बाण्यां रै बाण्यां भाया पूरै कांटै तोलरै ।  
 नातर तो नरकां में सूदो जायलो ॥११॥

### पाखण्डी लीला

( दुनियां का आंख्या देख्या पाखंड को फोटू )

छानै छानै पाप कुमावै, चोड़ै हूंग दिखावै छै ।  
 अकरम करता फिरै अधरमी, भूँठी धूस जमावै छै ॥  
 सासतर को तो नांव धरै पण, मन की मौज उड़ावै छै ।  
 बात धरम की करता डोलै, अधरम रोज रचावै छै ॥  
 मन की चीती जद करणी हो, नांव बड़ां को ले दे छै ।  
 चाल बड़ां की सारी छोड़ी, मूंडो क्रियां दिखावै छै ॥  
 पुरसारथ तो छोड़ दियो खुद, दोस भाग नै देवै छै ।  
 करवा की ये करै नहीं जद, दुखड़ो पांती आवै छै ॥



आप आप की बाटी सेकै, अर ये गांव डुबोवै छै ।  
 गांव डबसी जद कुण तिरसी, आंधानांहि दिखावै छै ॥  
 घर कै भीतर जोर करै, पैला की जूती खावै छै ।  
 मुरदापण की बाण पड़ी, पण जरा नहीं सरमावै छै ॥  
 सांच भूठ नै भूठ सांच नै, सारी ऊंली समझै छै ।  
 आंख मींच कर हरजस गावै, मन का मन में स्यावै छै ॥  
 पाप करम का ओला बेई, नांव कलू को ले दे छै ।  
 सैन रूप तो कलजुग बैठ्या, कलजुग कस्यो बतावै छै ॥  
 बालपणै परणा कर छोरा, वांको जलम बिगाड़ै छै ।  
 दुनिया में जीवा की गत विध, वांनै नहीं सिखावै छै ॥  
 घर की लड़की बेंच अधरमी, बाबाजी परणावै छै ।  
 पाप करै अर छानै राखै, बद कर बात बणावै छै ॥  
 जीतै जी तो मा बापां नै, टुकड़ा मुसकल होवै छै ।  
 मर जावै जद करज कडा कर, जबरो जिगगरचावै छै ॥  
 मिन्दर का ये हुया पुजारी, मिन्दर घास भरावै छै ।  
 खोल भोगती तिलक काड कर, ये पिंडत बण जावै छै ॥  
 सकरी रोटी और रावड़ी ल्यार लुगार्यां खावै छै ।  
 पिंडतजी चौका की धज ये, जद भी भोत दिखावै छै ॥  
 बोदा सौदा मिलै जिनावर, वांकी नाड़ कटावै छै ।  
 नार मिलै जद रजपूती को, अंजस नहीं दिखावै छै ॥  
 पालण की तो बात दूर छै, उल्टा और सतावै छै ।

फरज अदा जो करणो चावै, ऊँने दूर रखावै छै ॥  
 दीन दुख्यां का कठ काटै, पण पाणी छाणर पीवै छै ।  
 दोय वार मिंदर में जाकर, सारा पाप धुवावै छै ॥  
 कमती तोलर पल्ले पटकै, बाद तोल घर ल्यावै छै ।  
 सौ सौ मूसा खाय विलाई, तप को ढंग रचावै छै ॥  
 भाग दौड़ कर करै कुमाई, पैला मौज उड़ावै छै ।  
 गंडक चून सैमूलो खावै, आप तुसां नै खावै छै ॥  
 न करवा का काम भोत सा, वांकी जिद ये राखै छै ।  
 सारी बातां समझै जद भी, करसा निता ठिगावै छै ॥  
 अब ताई की माफी पिरभू, थां सूं सारा चावै छै ।  
 जीवनकुटी का सेवक प्रभुजी, उबा अरज सुणावै छै ॥

## चोखा राजाजी ।

चोखा राजाजी ये भोत भला छै,  
 म्हां का राजाजो—चोखा राजा जी—  
 ईसरदा का सिरदारों के जलम लियो ये राजा जी—  
 संवत अड़सठ २ मांय या तो भादवा की बात,  
 या तो बुद तेरस की बात—चोखा राजा जी ॥ १ ॥  
 साडा नौ का हुया जव्यां ये गोद आया राजाजी—  
 ग्यारा का ये होर वैठ्या राज सौंधासण,  
 पायो राज सौंधासण—चोखा राजाजी ॥ २ ॥



मेओ कालिज करी पढ़ाई छै वरसां तक राजाजी—  
 फौजी विद्या २ फेर पाई विल्लायत में जार,  
 ये तो बूलबिच में जार—चोखा राजाजी ॥ ३ ॥  
 विल्लायत सूं पाछा आयर काम सीख्यो राजाजी—  
 साडा उगणी २ होर लीन्यो इगत्यारी को काम,  
 पायो इगत्यारी को काम—चोखा राजाजी ॥ ४ ॥  
 मारवाड़ सूं राणीजी दो ब्याकर ल्याया राजाजी—  
 बाई जो छै २ एक यां कै राज कँवर छै दोय,  
 यांकै बनासाब छै दोय—चोखा राजाजी ॥ ५ ॥  
 जम्बवाजी का वंश में सूं पाणी ल्याया राजाजी—  
 जैपर मांही २ भोत सारी टूट्यां लाग्यां जाय,  
 नई टूट्यां लाग्यां जाय—चोखा राजाजी ॥ ६ ॥  
 लूगायां को ओगदखानों नुओं बणायो राजाजी—  
 और वणैलो २ हाल लूठो ओगदखानों एक,  
 वो तो सब कै ताई एक—चोखा राजाजी ॥ ७ ॥  
 बड़ो मदरसो भास्यो लूठो खूब बणायो राजाजी—  
 सारै होगो २ नांव सारा रजवाडा में नांव,  
 जां सूं सुणो जडैही नांव—चोखा राजाजी ॥ ८ ॥  
 ल्लायत में जार पोलो जबरो खेल्यो राजाजी—  
 सारा मानी २ हार यां को देश विदेशां नांव,  
 होगो सारै ठै ही नांव—चोखा राजाजी ॥ ९ ॥

धणा कस्या छै और करैला काम चोखा राजाजी—  
 म्हां का मन में २ आज यां को घणो भरोसो जाण,  
 यां को पतियारो हो जाण—चोखा राजाजी ॥ १० ॥  
 जीवन कुटी पर म्हैर करी जद फोटू दीनी राजाजी,  
 दरवाजा में २ आर थेतो फोटू देखो बार,  
 देखो घणी सोवणी बार—चोखा राजाजी—॥ ११ ॥

### नारी—मैमा ✓

( लुगाई—मोठ्यार का मेल को सुख )

घर की सोभा नारसैजी सुणज्यो चित्त लगाय ।  
 घर सूनो बिन नार कैसजी, बात कहूँ समझाय ॥  
 सीख की सुण लीज्यो नारी रै सीख की सुण लीज्यो नारी ।  
 नार सुपातर होय आपदा टारै वा सारी ।  
 नार बिन घर में दुख सैणारै नार बिन घर में दुख सैणा ।  
 मिलै सुपातर नार मौज सैं दुनियां में रैणा ॥ १ ॥  
 बड़ो भाग मोठ्यार कोसजो नार कया में होय ।  
 नारी का तकदीर सैसजी मरद कया में होय ॥  
 सीख की सुण लीज्यो नारी ॥ २ ॥  
 नर नारी का मेल सैसजी घर में आनंद होय ।  
 नर नारी की फूट सैसजी दुखड़ो घर में होय ॥  
 सीख की सुण लीज्यो नारी ॥ ३ ॥



नारी घर नै केवटैसजी करै कुमाई लोग ।  
दोन्हीं मिल आनंद करैसजी सुखी लुगाई लोग ॥  
सीख की सुण लोज्यो नारी ॥ ४ ॥

नारी को आदर कस्योसजी रामचन्द्र भगवान ।  
सीताजी बनवासनैसजी लीनो आनन्द मान ॥  
सीख की सुण लीज्यो नारी ॥ ५ ॥

### ✽ बधाई ✽

(जैपर में कस्योड़ा सालाना जलसा का मौका पर गांवहालां की व  
व कुटीहालां की तरफसूँ जैपर स्हरका बास्यां नैया बधाई सुणाई छी ।)

बिना बुलाया पावणा म्हे आज आया छं ।  
गांवडां सँ सौर में म्हे आज आया छं ॥ १ ॥  
बोलबा का कायदा में थे घणा हुश्यार छे ।  
सूदी बाणी बोलबा म्हे आज आया छं ॥ २ ॥  
थांका जैपर सौर कोतो देस में नामन छै ।  
सौर थांको देखबा म्हे आज आया छं ॥ ३ ॥  
जीवनकुटी की बारता सँ भोतसा सैदा नहीं ।  
सही सुणावा बारता म्हे आज आया छं ॥ ४ ॥  
जीवनकुटी में आज पैली चेतो थे थोड़ो दियो ।  
चेतो थांको खींचबा म्हे आज आया छं ॥ ५ ॥

बात करै छे सासतर की सासतर जाणै नहीं ।  
खरी सुणावा बात या म्हे आज आया छं ॥ ६ ॥  
असल धरम नै लोप कर ज्यो ऊपरलो डाल्यां फिरै ।  
बांके करवा चानणो म्हे आज आया छं ॥ ७ ॥  
बारै न्यारा मांय न्यारा यो कस्यो पाखण्ड छै ।  
कड़ा बवन ये बोलबा म्हे आज आया छं ॥ ८ ॥  
बड़ी बात की परवा नांही बोदी नै लाद्यां फिरै ।  
निगै करावा चुक की म्हे आज आया छं ॥ ९ ॥  
गुड़ खावै पण गलबाण्यां का पच करै छे भोतसा ।  
बांके लेवा चूटक्या म्हे आज आया छं ॥ १० ॥  
आप आपका स्वास्थ्य मांहं सारा ही आंधा हुया ।  
आँख्याँ बांकी खोलबा म्हे आज आया छं ॥ ११ ॥  
घर घर को सब काम करले दुनियां को जद कुण करै ।  
साफ थानै पूछबा म्हे आज आया छं ॥ १२ ॥  
सांची करदे भूठ नै ज्यो भूठ नै सांची करै ।  
पोल बां की खोलबा म्हे आज आया छं ॥ १३ ॥  
सैर कां की राय में म्हे गांव का जंगली हुया ।  
सैरीपण नै जांचबा म्हे आज आया छं ॥ १४ ॥  
म्हां की तो क्यों गिणती कोनै आदमी समझो नहीं ।  
रोस मन को काडबा म्हे आज आया छं ॥ १४ ॥  
माल म्हांको उपजायोड़ो बरसाँ सँ गुमजाय छै ।



खोज काडता काडता म्हे आज आया छी ॥ १६ ॥  
 म्हां का दुख की ठीक कुणनै जीव निकल्यो जायछै ।  
 जयां सुणावा रोजणो म्हे आज आया छी ॥ १७ ॥  
 म्हे सुणी छै थां में सूं भी कुछ का दिल में ठोड़ छै ।  
 वां को तो गुण मानवा म्हे आज आया छी ॥ १८ ॥  
 म्हे डूब्या तो थे भी डूब्या थे भी म्हां की लैर छो ।  
 देवा या चेतावनी म्हे आज आया छी ॥ १९ ॥  
 मीठी बोलाँ खारी बोलाँ जो बोलाँ सारी सुणो ।  
 सूदी सट फटकारवा म्हे आज आया छी ॥ २० ॥  
 बात खरी म्हे कहदी जद भी हिरदा में तो प्रेम छै ।  
 प्यारा थांका जीव सूँ म्हे आज आया छी ॥ २१ ॥



## विज्ञापनयो !

यां गीतां को प्रचार महलां से लेर श्रौपड्यां ताई छै  
 कारण यो छै क जो जीवन कुटीने जाणै छै वै यांनै बिना  
 सोल लियां कोनै रै सकै । ईं बास्तै कम सुं कम जैपुर राज  
 में तो या पोथी विज्ञापनको सब सुं चोखो जरियो छै ही ।

अश्लील विज्ञापन कौनै लिया जासी । रैटस् भी आपने  
 आपका मन माफिक ही मिलसी ।

पत्र व्यवहार को पतो:—

जीवनकुटीर कार्यालय

खेजड़े का रास्ता, चांदपोल बाजार  
 जयपुर ।



# जपर की बोली में गीताजी

दुनिया में अस्यो कुण छे ज्यो गीताजी नै कोनै जाणै ? दुनियां की सारी बोल्यौं में गीताजी को तरजमो मौजूद छै । म्हार ध्यान में या बात आई छै क गीताजी को तरजमो जैपर की बोली में होणो चायजे । थोड़ो सो तरजमो नमूना का तौर पर पैली दियो जा चुक्यो छै—वो नमूनो लोगां कै दाय आबाकी खबर मनै मिलसी ओर म्हारो मन उमगसी तो मैं सारी गीताजी को तरजमो जैपर की बोली में छपास्यँ । नमूना का बारा में ज्यां की जसी राय हो वा मालुम होणी चायजे और कोई भूल चूक हो सो भी बताणी चायजे ।

हीरालाल शास्त्री ।

मनोरञ्जन प्रेस, गोपालजीका रास्ता, जयपुर ।

# जीवनकुटीर का गीत

[ माहवारी पोथी ]

जेतकी म।दतकी म



प्रकाशक—

जीवन-कुटीर, वनस्थला

पो० ऑ० निवाड़ [ जयपुर स्टेट ]

दाम एक पोथी का  
न्यार पासा

अगस्त १९३४

{ दाम एक बरस का ।।।  
डाक मैसूल न्यारो }



### जैपरी क हिन्दी

घणा खरा लोग तो जैपर की बोली का गीत देखर राजी हुया दीख्या पण कोई कोई को दिल नाराज भी रियो दोखै छै, कोई कोई या कही बताई क बार अस्या ही गीत हिन्दी में बणता तो हिन्दी की कसीक सेवा होतो ? म्हारी ओड़ी को अरज या छै क में छपाबा कै तोड़ी अथवा तो कोई भासा की सेवा करबा बेई गीत कोनै बणाय—सांची बात या भी छै क में भासा को या काव्य को या संगीत को पिंडत भी कोनै । गाँव में परचार कै वास्तै गीत बणाणा पड्यो पिंडतां कै सामनै भी पेस हुया, बांनै भी चोखा लाग्या, वैलोग घणा हो कैबा लाग्या जद जार छप दिया । और में तो एक नाकुछ आदमी छूँ, पण म्हारी गय में ज्यो हिन्दी छै सो हो मारवाड़ी वा जैपरी छै, वाही राजस्थानी और ग्रियरसन साब को "वेस्टर्न हिन्दी" छै । जैपरी भासा कोई अलग भासा कोनै कसूर माफ हो, में तो जैपरी नै भी हिंदी के समान छै ।

हीरालाल शास्त्री

### जैपर में जीवनकुटीर को कार्यालय

म्हे जीवनकुटीर नांव को अस्थान दणायो जद का ही म्हांका साथी भायला और दूसरा लोग भी म्हांनै बराबर या कैता आवै छै क क्यों न क्यों तो जैपर स्हर में भी करो । म्हे म्हांका मन में या सोचता रह्या क स्हरां में तो सेवा करबालां की कुमी कोनै, जो हो तो आपाँ गाँव में ही सेवा को काम करौं । दुसरका म्हां कनै अतरा आदम्यां को जोड़ भी कोनै बैस्यो ज्यां का बलमूँ दो जगाँ की खेती नै दाब सकता । जीवनकुटीर को काम पाँच बरस ताँई चलचुक्यो और म्हे १०-५ आदमी भो जोड़ा भोत बणबा कै गेलै लाग्या जद म्हां को ध्यान स्हर ओड़ी भी गयो छै । म्हांकै जैपर का काम निबर रैबो ही करै छै—और बां मामूली कामां सिवाय यो माहवारी पोथी छपाबा को खास काम पैदा होगयो । और भी पोथ्यां बणाबा छपाबा काम बदाबा को म्हांको विचार छै । कई आदमी म्हांनै कातबो पीदबो सिखाबा वास्तै भी कैबो करै छै । यां सब बातां पर विचार करयो जद म्हांकै गाही जची क जैपर स्हर में जीवनकुटीर को कार्यालय थरपल्यां, जीं की मारफत सारा ही काम हो गाय । म्हे बारलागाँव की हवा खायाड़ो आदमी



[ ख ]

जैपर जस्या सहैर का बास्यां को और काँई बन्दगी बजा सकांला-सो म्हानै ठीक ठीक मालुम कोनै पड़ै । पण म्हे यो विसवास दिवा सकां छाँ कम्हांका करबा लायक कोई बन्दगी दोखै तो ऊँनै करबा बेई म्हे बीसों विस्वा तय्यार छाँ । जीवनकुटीर की रीतनीत साफ छै—जीवनकुटीर गाँव की चीज़ छै, गाँव की चीज़ ही रैबो चावै छै । पण गाँव नै सहैर की मदद की जरूरत पड़यां बिना कोनै रै । गाँव कौ पाछै सहैर की सोभा छै—सो सहैर नै चायजे कबणै सो मदद गाँव को करै । म्हे सहैर हालां की कुछ बन्दगी जरूर बजास्यां—पण ऊँकी एवज में सहैर हालां कनै सूँ कोमत भी चूकलेस्यां—और वा कोमत याही क वै म्हांका गाँव का काम में मदद करै । आज पैली भी म्हानै सहैर सूँ सब तरै की मदद मिली छै—और म्हे जाणा छां आयन्दा भी मिलती रैसी ।

चाँदपेल बजार में खेजड़ा का रास्ता में एक चोराहो भी कोनै चालणो पड़ै क “जीवनकुटीर-कार्यालय” ( जयपुर सिटी ) दीख्यासो । और जीवनकुटीर की एकाध मूरत तो सहैर का बास्यां का दरसण चाहे जद ही करती रैसी ।

हीरालाल शास्त्री ।

बरस पैजो बानगी चोथी

## जीवनकुटीर का गीत

वैराटरूप-दरसण

( गोताजी का ११वाँ अध्याय का १५-३१ श्लोकां को तरजमो )

अर्जुनउवाच ।

पश्यामि देवांस्तव देव देहे,  
सर्चास्तथा भूतविशेषसंघान् ।  
ब्राह्मणमीशं कमलासनस्थ,  
मूर्धांश्चसर्वानुरगांश्च दिव्यान् ॥ १५ ॥

नाथ ! आपकी देही में ये सारा देवमनै दीखै ।  
तरै तरै का प्राण्यां का अर भुंड मोकला ये दीखै ॥  
कंवलासन पर बैठयोड़ा ये स्वामी ब्रह्मा दीख छै ।  
रिसी मुनी सगलाये दीखै दिव्य सरूप ये दीखै छै ॥ १५ ॥

अनेकबाहूदरवक्त्रनेत्रं,

पश्यामि त्वां सर्वतोऽनन्तरूपम् ।



नान्तं न मध्यं न पुनस्तवादिं,

पश्यामि विश्वेश्वर विश्वरूप ॥१६॥

भुजा मोकली और पेट ये मूंडा आंखों देख रखा ॥

ब्यारूयू मेर बिना हद को यी रूप आपको देख रखा ।

अन्त आपको कोनै दीखै नहीं मद्र भी दीखै छै ।

विस्वरूप ! विसवेसर ! थांको नहीं सरु भी दीखै छै ॥

किरीटिन गदिनं चक्रिणं च,

तेजोराशिं सर्वतो दीप्तिमन्तम् ।

पश्यामि त्वां दुर्निरीक्ष्यं समन्ता,

दीप्तानलार्कद्युतिमप्रमेयम् ॥१७॥

गदा चक्र अर मुकट धरूयोड़ा रास तेज की दीखो छो ।

चमक दमक या सारै फैली जद मुसकल सूं दीखो छो ॥

बलती आग सुरज कै माफिक जोत आपकी दीखै छै ।

अपरंपार फैल कर सगलै रुप आपको दीखै छै ॥१७॥

त्वमक्षरं परम वेदितव्यं,

त्वमस्य विश्वस्य परं निधानम् ।

त्वमव्ययः शाश्वतधर्मगोप्ता,

सनातनस्त्वं पुरुषो मतो मे ॥१८॥

मनै जाणवा लायक प्रभुजी ! पर ब्रह्म थे लागो छो ।

अर दुनियां को बड़ो आसरो प्रभुजी ! थे ही लागो छो ॥

अविनासी छो धरम सनातन का रखवाला थे ही छो ।

म्हारै भावै पुरस सनातन हे परमेसर ! थे ही छो ॥१८॥

अनादि मध्यान्तमनन्तवीर्यं,

मनन्तबाहुं शशिसूर्यनेत्रम् ।

पश्यामि त्वां दीप्तहुताशक्त्रं,

स्वतेजसा विश्वमिदं तपन्तम् ॥१९॥

सरु मद्र अर अन्त नहीं छै अर थांको बल वेहद छै ।

चांद सुरज छै आंखों थांकी और भुजा भी वेहद छै ॥

बलती आग जस्यो यो मूंडो भगवन ! आप दिखाओ छो ॥

और आपका तेज ताप मूँ जग नै आप तपाओ छो ॥१९॥

व्यावापृथिव्योरिदमन्तरंहि,

व्याप्त त्वयैकेन दिशश्च सर्वाः ।

दृष्ट्वाद्भुतं रूपमुग्रं तवेदं,

लोकत्रयं प्रव्यथितं महात्मन ॥२०॥

धरती अर आकास बीचका छेका में थे व्याप रखा ।

और एकला थे ही भगवन् ! दसों दिसा में व्याप रखा ॥

अदभुत और भयंकर थांको रूप प्रभो ! या देख रही ।

तिरलोकी या डर की मारी प्रभो ! धूजती देख रही ॥२०॥

अमी हि त्वां सुरसंघा विशन्ति,

केचिद्धीताः प्राञ्जलयो गृणन्ति ।



स्वस्तीत्युक्त्वा महर्षिसिद्धसंघाः,

स्तुवन्ति त्वां स्तुतिभिः पुष्कलाभिः ॥२१॥

देवां का ये भुण्ड देखल्यो थांकै मांय समाय रखा ।

डर का मार्या हाथ जोड़ कर केई गुण भी गाय रखा ॥

और 'भलो ही' बोल २ कर रिसी मुनी सिध लोग सभी ।

कई तरै सँ कर अस्तूती गुण ये गावै लोग सभी ॥२१॥

रुद्रादित्या वसवो ये च साध्या,

विश्वश्विनौ मरुतश्चोष्मपाश्च ।

गन्धर्वयक्षासुरसिद्धसंघाः,

वीक्षन्ते त्वां विस्मिताश्चैव सर्वे ॥२२॥

रुद्र और आदित्त वसू सब और साधगण देख रखा ।

विस्वदेव अस्वनी दोन्यूं मरुत पितर भी देख रखा ॥

यक्ष और गन्धर्व और ये असुर सिद्ध सब देख रखा ।

भुंडां का ये भुण्ड आपनै अचरज में सब देख रखा ॥

रुपं महत्ते बहुवक्त्रनेत्रं,

महाबाहो बहुबाहूरुपादम् ।

बहूदरं बहुदंष्ट्राकरालं,

दृष्ट्वा लोकाः प्रव्यथितास्तथाहम् ॥२३॥

महाबाह ! ये बोला मूंडा और नेत्र भी बोला छै ।

बोली सारी भुजा जांघ भी और चरण भी बोला छै ॥

बोला सारा पेट भोतसी डाडां सूं विकराल बडो ।

सांग देख कर दुनियां व्याकुल म्हारो भी बेहाल बडो ॥२३॥

नभःस्पृशं दीप्तमनेकवर्णं,

व्यात्ताननं दीप्तविशालनेत्रम् ।

दृष्ट्वा हि त्वां प्रव्यथितान्तरात्मा,

धृतिं न विन्दामि शमं च विष्णो ॥२४॥

आमर कै थे अड्या हुया छो भोत रंगां का चमक रखा ।

मूंडो थांको फाट रह्यो छै बड़ा नेत्र भी दमक रखा ॥

अस्यो रूप में देख देख कर अन्तस में घबराय रह्यो ।

धीरज और सान्ति हे भगवन् ! नहीं जरा भी पाय रह्यो ॥२४॥

दंष्ट्राकरालानि च ते मुखानि,

दृष्टैव कालानलसन्निभानि ।

दिशो न जाने न लभे च शर्म,

प्रसीद देवेश जगन्निवास ॥२५॥

डाडां सूं ये घणा भयङ्कर थांका मूंडा दीखै छै ।

जगपरला की आग जस्या ये वैही मूंडा दीखै छै ॥

हे देवेश ! दिसा में भूल्यो नहीं सान्ति में पाऊं छूं ।

जगदाधार ! खुसी हो जाओ याही आज सुणाऊं छूं ॥२५॥

अमी च त्वां धृतराष्ट्रस्य पुत्राः,

सर्वे सहैवावनिपालसंधैः ।



भीष्मो द्रोणाः सूतपुत्रस्तथासौ,  
सहास्मदीयैरपि योधमुख्यैः ॥२६॥

वक्त्राणि ते त्वरमाणा विशन्ति,  
दंष्ट्राकरालानि भयानकानि ।

केचिद्विलग्ना दशनान्तरेषु,  
संदृश्यन्ते चूर्णितैरुत्तमङ्गैः ॥२७॥

धृतराष्ट्र का बेटा देखो भगवन् सारा भाग रखा ।

राजावां का भुंड भोतसा थां कै सागै भाग रखा ॥

भीष्म द्रोण अर करण जस्याभी देखो भगवन् भागरखा ।

म्हांकी ओड़ी का भी मुखिया मुखिया जोधा भाग रखा ॥

जोधा वेगा भाग भाग कर थांकी ओड़ी आय रखा ।

डाडां सूं विकराल भयङ्कर मूंडा मांही जाय रखा ॥

दीखै छै ये केई केई पैली छा ज्यो भाग रखा ।

चुरकट थांकी हुई खोपर्यां दांतां बिच ये लागरखा ॥२७॥

यथा नदीनां बहवोऽम्बुवेगाः,

समुद्रमेवाभिमुखा द्रवन्ति ।

तथा तवामी नरलोकवीरा,

विशन्ति वक्त्राण्यभिविज्वलन्ति ॥२८॥

जियां नद्यां का बैता पाणी समदर सामा धावै छै ।

त्रियां धधकता थांका मूंडां में जग-जोधा जावै छै ॥२८॥

यथा प्रदीपं ज्वलनं पतङ्गा,  
विशन्ति नाशाय समृद्धवेगाः ।

तथैव नाशाय विशन्ति लोकां,  
स्तवापिवक्त्राणि समृद्धवेगाः ॥२९॥

जियां पतङ्गा मरवावेई बलती आग समावै छै ।

त्रियां लोग भी भाग आपका मूंडां में पड़ जावै छै ॥२९॥

लोलिहसे ग्रसमानःसमन्ता,  
ल्लोकान्समग्रान्वदनैर्ज्वलद्भिः ।

तेजोभिरापूर्य जगत्समग्रं,  
भासस्तवोग्राः प्रतपन्ति विष्णो ॥३०॥

सब नै निगल धधकता मूंडा सूं अब जीभ चलाओ छो ।

सारो जगत तेज सूं पूर्यो जोती तेज तपाओ छो ॥ ३०॥

आख्याहि मे को भवानुग्ररूपो,  
नमोऽस्तु ते देववर प्रसीद ।

विज्ञातुमिच्छामि भवन्तमाद्यां,  
न हि प्रजानामि तव प्रवृत्तिम् ॥३१॥

जाणयो चाऊँ आद रूप नै करणी थांकी बिना पता

नमो ! देव ! राजी हो अब थे उग्र रूप कुण देओ बता ॥३१॥



## टणका मिजमान

(जीवनकुटी का सेवक जैपर राज का दौरा में गाँव २ में आपका  
आवाकी बधाई गावै छै)

मनवार करो तो थाँकै बारणै मिजमान खड़ा म्हे  
जिवनकुटी का भेज्योड़ा म्हे, आया थाँकै द्वार ।  
दीन दुख्यां की सेवा की म्हे, करता फिरा पुकारजी ॥ १ ॥  
म्हां की खातिर कुछ नहीं चावां, करा भला को कार ।  
अरज एकही थांसूं करणी, जरा करो उपकारजी ॥ २ ॥  
पेट आपको सभी भरै छै, काग कूकरा सूर ।  
मिनखां चारो गिणती आवै, भली कस्यां भरपूरजी ॥ ३ ॥  
आपां अपणो स्वारथ साधां, जद ही डूब्यो देस ।  
परमारथ कै कारणैस म्हे, अस्यो बणायो भेसजी ॥ ४ ॥  
कैवा का ही म्हे गरजी छां, और चलै नहिं जोर ।  
एक लगन या म्हां कै लागी, साँझ सुणो चाहे भोरजी ॥ ५ ॥

### चेतसी भारत की नारी ।

चेतसी भारत की नारी रै चेतसी जैपर की नारी ।  
नार सुपातर होय साधना साधै वा सारी ॥  
घर की मैमां नारसैसजी घर की मालिक नार सखी म्हारी ॥  
नारी चित में धार लेस तो होवै बार सुधार ॥ १ ॥

सारी रीत कुरीत कैसजी नारी किला समान-सखी म्हारी ॥  
राखै रीत कुरीती त्यागै हुयां नार गुणवान ॥ २ ॥  
कन्यावाँ में होय साँच तो विद्या को परचार-सखी म्हारी ॥  
घर दुनियाँ को ज्ञान नहीं हो वा शिक्षा बेकार ॥ ३ ॥  
शिक्षा पूरी नहीं हो सकै रैताँ बाल विवाह-सखी म्हारी ॥  
विद्या सँ भी घणो जरूरी रुकणो बाल विवाह ॥ ४ ॥  
पड़दो घूँघट बणयो रखांसजी विद्या बाद जाय-सखी म्हारी ।  
जे विद्या हो कामकीसतो पड़दो घूँघट जाय ॥ ५ ॥  
विद्या कोर विरोध करैज्यो वाँनै मूरख जाण-सखी म्हारी ॥  
विद्या सँ तो होय फायदो होय नहीं नुकसाण ॥ ६ ॥  
सदाचार छै नर की शोभा नारी को सिणगार-सखी म्हारी ।  
सदाचार बिन नर नारी की विद्या नै थरकार ॥ ७ ॥  
सामगरी निज भोग की ज्यो नारी मै ली मान-सखी म्हारी ॥  
इक तरफा वै सदाचार की बात करै हैवान ॥ ८ ॥  
भूठो घूँघट सदाचार की करै नहीं प्रतपाल-सखी म्हारी ॥  
भोग-रोग सँ बन्धी हवाज्यो वा सत की रखवाल ॥ ९ ॥  
टणका मणका दूरा फीकै सादा बस्तर धार-सखी म्हारी ॥  
विद्या और शील का बलसँ निरभै विचरै नार ॥ १० ॥  
देस भलाई करै साँचली नर सँ क्यादा नार-सखी म्हारी ॥  
भारत अर जैपर को जदही होवै लो उद्धार ॥ ११ ॥



## अंगरूपां देखी वात्त ।

( गांव सुधार करबो चावाला सेवक की मुसकलां को ज्योरो )

मुसज्यो म्हांकी बीती बात खरी म्हे आज सुणावांला ।

अपणा घर को फिकर करै चाहे दुनियां जात्रो डूब ।

स्याणा सूंठ मगद का लाडू बात बणावै खूब ॥ १ ॥

रीत रिवाज मोकला बदगा लागत लागै भोत ।

सब कामां में रुप्यो चायजे जलम होय चाहे मोत ॥ २ ॥

रीत पुराणी बीती कौनै चली नवादू ल्हैर ।

चाकी का दो पाठां बिच में पिस रिया नार्हीं खैर ॥ ३ ॥

सांचछो तो धरम ऊठगो कूटै भूठी लीक ।

ऊपरला पलमा की परवा नहीं मांयली पीक ॥ ४ ॥

मान मांयलो खतम होगयो रैगी थोथी स्यान ।

थोथी स्यान राखबा खातिर रोज खिंचावै कान ॥ ५ ॥

दूरदेशी भूल गया सब बोदो स्वारथ याद ।

बिगड़ी सारी हवा सुणै कुण सेवा की फरियाद ॥ ६ ॥

सब का मोटा पेट होगया सेवा करणो कोत ।

सां में एक निठांसी निमटे--ऊंकी मुसकिल भोत ॥ ७ ॥

सेवकजी जद गाडा होकर मन में बांधै जोर ।

फेरां की परणचोड़ी वांकी करले घर में घोर ॥ ८ ॥

क्यों राजी सूं क्यों धमकयां सूं तिरिया हो चुपचाप  
सारा धर का फेर करैला सेवक कै संताप ॥ ९ ॥

घर का भी जद हार मान कर छोड़ै ऊंकी गैल  
सारा अंगतू जोर बांध कर फेर करैला फैल ॥ १० ॥

सब सूं न्यारो होय आपकै नागाई ले धार ।  
सांचो सेवक सबनै जीतै याद राख करतार ॥ ११ ॥

सची सेवा करणो धारयो बस्या गांव कै मांय ।  
सैर छूटगो साथ छूटगो उलभथा भाड़ां मांय ॥ १२ ॥

लू भुगती अर सखो तावडो भुगती मे की धार ।  
कादो कीच मोकलो भुगत्यो सर्दी की फटकार ॥ १३ ॥

सेवक नै तो कडा नेम भी होय पालणा जोग ।  
कडा नेम सांच्यां ही पाल्यां छूटै बोला भोग ॥ १४ ॥

गांवां की छै बडी दुरदसा नहीं कल्पना होय  
चावै जितरा भोग छोड द्यो नहीं बराबर होय ॥ १५ ॥

ज्यांकी सेवा करणी होवै रैणो वांकै बीच ।  
वांकै बीच रयां पर देखो ऊंचो रैणो नीच ॥ १६ ॥

मांगया पीसा कमती आवै वांमें काम चलाय ।  
ऊंचो रैणो चाव जदभी कन्नै नहीं उपाय ॥ १७ ॥

सब सूं मुसकिल म्हांनै दीख्यो करणो सांचो त्याग  
ऊंखल में माथो जद लागै लागै कौनै थाग ॥ १८ ॥



चंदा का पीसा म्हे ल्यावां जाणै म्हांको जीव ।  
 थोडा दे दे घणा खरां को देतां निकलै जाव ॥१६॥  
 निंदरा करबो म्हे नहिं चावां वो नहिं म्हांको काम ।  
 सांची बात जरासी कैदा जीको साखी राम ॥२०॥  
 सांची सेवा जीनै करणी राखो जीव मसोस ।  
 भूखा नागा रैस्यो जदभी करस्यो कुण पर रोस ॥२१॥  
 सेवा करबा बोला आया आया बांव चढार ।  
 थोडी सी जद तांती बीती भाग्या पूंछ दवार ॥२२॥  
 भगत गुमायो पीसा खोया कर्या कयां नै त्यार ।  
 म्हे समझी छी पार करैला पूच्यां पैली पार ॥२३॥  
 ज्यां लोगां में आर बस्या म्हे निकल्या म्हांका बाप ।  
 मूंली नै ये ऊंली समझी मगज चाटगा धाप ॥२४॥  
 लम्बो चौडी राम कहाणी भोत बडो रंबाद ।  
 कैबा की नहिं सुणबा की या सुणै कूण फरियाद ॥२५॥  
 बामण बाण्या धरम लोपगा भोत बदायो पाप ।  
 समझै सारा धरम पापनै हुयो धरम को पाप ॥२६॥  
 दुच्या पुच्या और भोतसा वैभी वांकी साथ ।  
 सारा मिलकर काम बिगाडै करदे दिन की रात ॥२७॥  
 कोई २ भला आदमी बैम करै दिन रात ।  
 ऊपर मीठा भीतर समझै घोल रखा छै घात ॥२८॥

जिनगानी का पांच बरम म्हे ऊंडा दीन्या गाल ।  
 आठ पहर बत्तीस घड़ी ही म्हां पर भूम्यो काल ॥२९॥  
 बोला सारा जाणै कोनै म्हांनै पूछै स्याब ।  
 पांच बरस में रुप्या हजारों कांमै दीन्या दाब ॥३०॥  
 वां सचलां नै अरज एक छै काम देखल्यो छेड ।  
 मैना दो मैना तो भेलो म्हांकाली मुठभेड ॥३१॥  
 जीं बस्ती में टुकडा खातर बोला लागै लर ।  
 ऊं बस्ती को कलाकन्द भी म्हांनै लाग्यो भर ॥३२॥  
 सब कामां मूं घणो जरूरी लाग्यो म्हांनै कार ।  
 गाडी छाती करकै छेड्यो वोही म्हे उपकार ॥३३॥  
 पांच बरस तक लियो भटल्लो उवा ऊंही ठोड ।  
 धारी जतरी पूरी करस्यां प्राणां की या होड ॥३४॥  
 और काम भी घणा कर्या पण वांकी कोनै बात ।  
 राजी होकर जरा देखल्यो दस पन्दरा की पांत ॥३५॥  
 बालू का टीबा में म्हे तो बिडलो रोप्यो आर ।  
 लोही मूं सींच्यां ही राखै हर्यो भर्यो करतार ॥३६॥  
 म्हांनै सभी साही छेडी ऊंकी लाग्या गैल ।  
 दूजी बात बताओ ल्याओ वाभी देखां सैल ॥३७॥  
 जीनै उपजै ज्योही सल्ला म्हांनै देओ आर ।  
 म्हांकै गलै उतरसी जद तो करां सीस पै धार ॥३८॥



कच्चो चिट्ठो पेस करयो छै ई पर करो विचार ।  
 म्हां की नाई हिरदो खोलो फेरि करो निरधार ॥३९॥  
 राजी राजी जका भेल ले खांडा की या धार ।  
 म्हां को दिल तौ या चावै छै जलमै लाख हजार ॥४०॥



मनोरंजन प्रेस, गोपालजी का रास्ता, जयपुर ।

### मिलना का ठिकाणाः—

- १—मनोरंजन प्रेस, जोहरीबाजार, जयपुर ।
- २—राजस्थान पुस्तक-मंदिर,  
त्रिपालिया बाजार, जयपुर ।
- ३—( व पत्रव्योहार को पतो )—  
जीवनकुटोर कार्यालय,  
खेजड़े का रास्ता,  
चांदपोलबाजार, जयपुर ।



पैली बानगी में गीताजी का तरजमा को नमूनो दियो छो। म्हारै कन्नै हाल तक घणां लोगां की राय तो कोनै आई-पण जतरी सी राय आई छै ऊपर सूं म्हारो यो अन्दाज हुयो छै क जैपर की बोली में अथवा राजपूताना की बोली में गीताजी को तरजमो कर देबो ठीक रैलो। एक भाई तरजमां का छदां नै ठीक कोनै बतायो। कोई भाई मनै दूसरा छन्दां का नमूना बतावै तो मैं वांका बताया हुया छन्दां में सूं कोई सो छन्द पसन्द करल्युँ और ऊँ में तरजमो करवा की कोसिस करुं। गीताजी को तरजमो छपावा को विचार छै ई वास्तै मैं लोगां की राय सूँ काम करबो चाऊँ छुँ। ई चौथी बानगी में एक नमूनो और दियो छै-तरजमा का चोखा बुरा पण का बारा में तथा छन्द का बारा में भी आप लोगां की राय मालुम होणी चायजे ॥



## बारला गाँवा का गरीबां को भलो कियां हो ।

गरीब की भलाई करवा नै सब कोई चोखो काम बतावै छै । सब सँ घणा गरीब कुण छै ? म्हारा खयाल सँ तो सबसँ घणा गरीब बारला गाँव में रैबाला लोग ही छै । वै बिचापड़ा रात दिन मैनत को काम करै छै; जद भी बांका पेट नै अन्न और तन नै लत्तो कोनै मिलै । ई को कारण योही छै क वै लोग आपकी मैनत के माफिक पैदावार कोनै कर सके और जितनी पैदावार बांके हो जाय छै वाभी बांका नै ठैरै कोनै । म्हे जो हालत गांव हालां की देखी छै वा कच्चा सुणवा में कोनै आवै—जाँ सँ म्हांनै तो बारबार याही सूझै छै क कोई दाय कर गाँव हालां को भलो कख्यो जावै । गांव हालां को भलो राजनै ई वास्तै करणो चायजे क वै लोग राज का कुमाऊ पूत छै—बांकी कुमाई सँ राज को भोत सारो काम चालै छै । बारला गाँवां में राज को साँचो आधार छै बारलागाँवा को हाल बिगड़जासी तो राज को हाल भी चोखो कोनै रैसकसी । यो ऊंडो हेरो हेर लियो जद ही अंग्रजी इलाका में कई जगां गाँवां का सुधार को काम राज की तरफसँ छेड्यो गयो छे । पञ्जाब में तो गाँव का सुधार कै वास्तै एक हाकिम ही मुकर्रर कर दियो गयो छे । आपणै जैपर महाराज नै आपकी पिरजा जीवसँ भी प्यारी लागणी चायजे—एकवार राज की निगै ई काम की तरफ होजाय जद फेर तो यो सारो काम ठीक हो जाय । राज कै सिवाय र्हैर और कस्बां का रैबालां नै बारलागाँव की भलाई में क्यों लागणो चायजे ? ई वास्तै लागणो चायजे क गरीब की भलाई सँ ही परमारथ सिद्ध होवै छै—दुसरकां या बात भी छै क गाँव कै पाछै र्हैर को काम चालै छै—नाज, कुपास, घी,



लकड़ी सब क्यूँ चीज सहर हालां नै गांव सूँ ही मिलै छै । कोई सहरि भाई या न समझै क म्हे तो पीसा देर चीज ल्यां छां, ईं में गांवहालां को काई ईसान छै ? सारा काम पीसा सूँ ही होवै छै—पण कोई पीसा लेर करवालो भी न हो जद ? पीसा लेर काम करवाला थक्या मांदा हो जाय और पीसा मिलतां सांतर भी बांकी काम करवा की ताकत न रैवै जद ?

म्हे जीवनकुटी हाला थोड़ो भोत काम सरु कखो छै-म्हांकी एकलां की तो आकाय कोनैक इतना बड़ा काम नै पार पटकथां—म्हांसूँ बणसी सो बन्दगी बजाता रैस्यां—पण राज और सहर का लोगाँ पर गांवको ज्यो करजो छै ऊँको म्हांसूँ तो ब्याज भी कोनै चूकै । राज का करवा को काम राज नै करणो चायजे—जियाँ और जगां राज की तरफ सूँ कोसिस होरी छै—बियाँ ही जैपर में भी हो सकै छै । और जैपर सहर का रैवालां नै भी गाँव का सुधार कै वास्तै एक कमेटी बणाणी चायजे—ईं पवित्र काम में आपां सबलोग राजकी कियांवाणी मदद करां सो सारो विचार या कमेटी करले । जीवनकुटी को काम चलावा कौ साथर म्हारो यो विचार भी छै क मैं जैपर राज नै और जैपर राज की पढ़ी लिखी और धनवान् सहरि पिरजा नै एकवार नहीं अनेक बार अरज करै क जियां म्हे म्हांकी पांती को बोझो उठा राख्यो छै बियां आप भी आपकी पांती को बोझो उठाओ । म्हांकी ईं अरज की सुनाई हो जासी जद तो बारलागांवां का गरीबां की भलाई को क्योँ डोल बैठसा—

हीरालाल शास्त्री ।

बरस पैलो बानगी पांचवां

## जीवनकुटीर का गीत

प्यारा भक्त

[ गीताजी का १२ वां अध्याय को अनुवाद ]

अर्जुन उवाच

एवं मततयुक्ता ये भक्तास्त्वां पर्युपासते ।  
ये चाप्यक्षरमव्यक्तं तेषां के योगवित्तमाः ॥१॥  
प्यारा भक्तां की पैचाण सुणो नाराण सुणावै छै—

अर्जुन बोल्यो

सदायुक्त हो इयां आपकी पूजा भक्त कराय ।  
अविनासी अर निराकार को, अथवा ध्यान लगाय ।  
दोन्यां में सूँ उत्तम योगी, कहो कान ! समझाय ॥१॥

श्रीभगवानुवाच

मथ्यावेश्य मनो ये मां नित्ययुक्ता उपासते ।  
श्रद्धया परयोपेतास्ते मे युक्ततमा मताः ॥२॥  
बड़ी भक्ति सूँ म्हारै में मन, योगी निस्त लगाय ।  
भजले म्हारा सगुणरूप नै, उत्तम बोहि कहाय ॥२॥



ये त्वत्तरमनिर्देश्यमव्यक्तं पर्युपासते ।  
 सर्वत्रगमचिन्त्यं च कूटस्थमचलं ध्रुवम् ॥३॥  
 संनियम्येन्द्रियग्रामं सर्वत्र समबुद्धयः ।  
 ते प्राप्नुवन्ति मामेव सर्वभूतहिते रताः ॥४॥  
 नस्टै दीखै प्रगटै नाहीं, व्यापक और अचिन्त ।  
 थिर निसचल अर बसैमूल में, ऐस्यो ब्रह्म भजन्त ॥  
 सारी इन्द्रयां बसमें राखै, सगलै बुद्धि समान ।  
 सबका हितनै साधै वै भी, पावै मनै सुजान ॥३-४॥  
 क्लेशोऽधिकतरस्तेषामव्यक्तासक्त चेतसाम् ।  
 अव्यक्ता हि गतिर्दुःखं देहवद्भिरवाप्यते ॥५॥  
 निराकार में चित्त लगावै, वानै मुसकल होय ।  
 देधायां की निराकार में, पूँच सैज नहिं होय ॥५॥  
 ये तु सर्वाणि कर्माणि भयिसंन्यस्य मत्पराः ।  
 अनन्येनैव योगेन मां ध्यायन्त उपासेत ॥६॥  
 तेषामहं समुद्धर्ता मृत्युसंसारसागरात् ।  
 भवामि नचिरात्पार्थ मय्यावेशितचेतसाम् ॥७॥  
 पण जो दूजा म्हारै अरपण, करकै सारा काम ।  
 म्हारा होकर एक लगन सँ, भजै चित्तनै थाम ॥६॥  
 म्हारै में जो चित्त लगावै, वानै देऊँ त्यार ।  
 मौत रूप संसार समंदर सँ बिन लाग्यां बार ॥७॥

मय्येव मन आधत्स्व मयि बुद्धिं निवेशय ।  
 निवसिष्यसि मय्येव अत ऊर्ध्वं न संशयः ॥८॥  
 म्हारै मांही मन अरु बुद्धी, दोन्युं देय लगाय ।  
 ईसै म्हारै मांही बासो, मिलसी संसै नांय ॥८॥  
 अथ चित्तं समाधातुं न शक्नोषि मयि स्थिरम् ।  
 अभ्यासयोगेन ततो मामिच्छाप्तुं धनंजय ॥९॥  
 म्हारै में ज्यो चित नै थिरकर, नांही सकै लगाय ।  
 लगती कोसिस सँ मिलवाकी, अर्जन आस रखाय ॥९॥  
 अभ्यासेऽप्य समर्थोऽसि मत्कर्मपरमो भव ।  
 मदर्थमपि कर्माणि कुर्वन्सिद्धिं प्रवाप्स्यसि ॥१०॥  
 कोसिस भी ज्यो नहीं कर सकै, अरपण करदे कर्म ।  
 सिद्धि मिलैली करवासुंभी, म्हारो खातिर कर्म ॥१०॥  
 अथैतदप्यशक्तोऽसि कर्तुमद्योगमाश्रितः ।  
 सर्वकर्मफलत्यागं ततः कुरु यतात्मवान् ॥११॥  
 याभी ज्यो तू नहीं कर सकै, जोग-आसरो लेर ।  
 आपो बसकर सब कामां का, त्याग फलां नै फेर ॥११॥  
 श्रेयो हि ज्ञानमभ्यासाज्ज्ञानाद्ध्यानं विशिष्यते ।  
 ध्यानात्कर्मफलत्यागस्त्यागाच्छान्तिरनन्तरम् ॥१२॥  
 अभ्यास करम सँ ज्ञान बड़ो छै, ज्ञान सँ ऊँचो ध्यान ।  
 फल को त्याग ध्यान सँ ऊँचो, पावै सान्ति निदान ॥१२॥



अद्वेष्टा सर्व भूतानां मैत्रः करुण एव च ।  
 निर्ममो निरहंकारः समदुःखसुखः क्षमी ॥१३॥  
 संतुष्टः सततं योगी यतात्मा दृढ निश्चयः ।  
 मय्यर्पितमनोबुद्धिर्यो मद्भक्तः स मे प्रियः ॥१४॥  
 बैर नहीं हो सबसँ दोस्ती, दयावान गमखाय ।  
 ममता ओ ऐंकार नहीं हो, दुख सुख एक गिणाय ॥१३॥  
 सदा सबूरी राखै योगी, आपो बस में होय ।  
 मन बुद्धी म्हारा में राखै, पण को पको होय ॥  
 अस्या गुणां को बोही म्हारो, भक्त दुलारो होय ॥१४॥  
 यस्मान्नोद्विजते लोको लोकान्नोद्विजते च यः ।  
 हर्षामर्ष भयो द्वेगैर्मुक्तो यः स च मे प्रियः ॥१५॥  
 दुनिया जीसँ उचटै नांही, खुद भी उचटै नांय ।  
 खुशी कुठन डर दुःख छोड़दे, प्यारो भक्त कहाय ॥१५॥  
 अनपेक्षाः शुचिर्दक्ष उदासीनो गतव्यथः ।  
 सर्वारम्भपरित्यागी यो मद्भक्तः स मे प्रिय ॥१६॥  
 इच्छा छोड़ै साफ चतुर हो, उदासीन अविकार ।  
 ज्यो सारा सङ्कल्प छोड़दे, करूँ भक्त नै प्यार ॥१६॥  
 योन हृष्यति न द्वेष्टि न शोचति न काङ्क्षति ।  
 शुभाशुभ परित्यागी भक्तिमान्यः स मे प्रियः ॥१७॥

हरस बैर सब छोड़ चुकै ज्यो, तजै सोच अर आस ।  
 आङ्ग्या बुरा फलां नै त्यागै, भक्त दुलारो खास ॥१७॥  
 समः शत्रौ च मित्रे च तथा मानापमानयोः ।  
 शीतोष्णसुखदुःखेषु समः सङ्गविवर्जितः ॥१८॥  
 तुल्यनिन्दास्तुतिर्मौनी संतुष्टो येन केनचित् ।  
 अनिकेतः स्थिरमतिर्भक्तिमान्मे प्रियो नरः ॥१९॥  
 जीकै दुसमण दोस्त बराबर, मान और अपमान ।  
 मोह छोड़दे सर्दी गर्मी, सुख दुख लखै समान ॥  
 सोभा जसी कुसोभा मानै, राखै मौन सबूर ।  
 घर की ममता त्यागै थिरमति, प्यार करूँ भरपूर ॥१८-१९॥  
 ये तु धर्म्यामृतमिदं यथोक्तपर्युपासते ।  
 श्रद्धधाना मत्परमा भक्तास्तेस्तीव मे प्रियाः ॥२०॥  
 श्रद्धा रखकर म्हारा होकर, केवा मूजिव बार ।  
 धरम रूप यो इमरत सेवे, वांसू घणो दुलार ॥२०॥



## नारी जायो रै

( पालती नै चेतावणी )

नारी जायो रै तू थारी माको दूध लजायो रे ! नारी जायो रे !  
 समझै छो तू बात सारी तो भी चरको खायो रै ।  
 बीती सो तो, बीती सो तो छोड, तू तो रैती की नै राख,  
 अब तो रई पई नै राख, नारी जायो रै ॥१॥  
 पुरसारथ की बात छोड़ी, भाग नै ले आयो रै ।  
 आगे पूँछे आगे पूँछे भाग, थारा जीवनै यो भाग  
 तो जीव बचा कर भाग, नारी जायो रै ॥२॥  
 सारी दुनिया मौज करै छै, थारै कलजुग आयो रै ।  
 बुरीगार नै, बुरीगार नै जाण, तूतो ऊँ नै कलजुग जाण  
 वोही थारा ले छै प्राण, नारी जायो रै ॥३॥  
 अन्तकरण को घणो भरोसो, कोडै खोकर आयो रै ।  
 थारी इज्जत, थारी इज्जत राख, अब तू चावै जिर्या राख  
 तू तो आस पराई त्याग, नारी जायो रै ॥४॥  
 तू ही थारा भाई सगां नै बोलां सँ अगतायो रै ।  
 आपसरी की, आपसरी की होड़, तू तो बेगो सो अब छोड़

तू तो टणकाई नै छोड़, नारी जायो रै ॥५॥  
 निमलो थारो भाई बन्द छो, जीं नै घणो सतायो रै ।  
 भाई बन्द सँ, भाई बन्द सँ मेल, तू तो सांचा मन सँ राख  
 तू तो सोच समझ कर राख, नारी जायो रै ॥६॥  
 मुरदापण की बाण थारी, जीव थारो खायो रै ।  
 थारा दोखी थारा दोखी जाय, ये तो हूँकारा सँ जाय  
 ये तो करव्यां दकालो जाय, नारी जायो रै ॥७॥  
 भूठा सा फूँकरडा आगै डर कर शीस भुकायो रै ।  
 टणकाई तू, टणकाई तू राख, थारा दोखी आगै राख  
 तू तो टणका आगै राख, नारी जायो रै ॥८॥  
 तू तो दोखी सोखी की पीछाण में भरमायो रै ।  
 दोखी कुण छै, सोखी कुण छै देख, तू तो आंखियां खोलर देख  
 तू तो उंडो हेरो हेर-नारी जायो रै ॥९॥  
 एका का ही घाटा सँ तू सौ सौ बार ठिगायो रै ।  
 एको करले एको करले बार थारा सारा कारज होय  
 थारी मुसकल सूदी होय-नारी जायो रे ॥१०॥  
 तू करसी तो सो क्यों होसी बादू क्यों घबरायो रे ।  
 दिल को धड़को, दिलको धड़को काडथोड़ो माथो ऊंचो राख  
 तू तो टेक धरम की राख, नारी जायो रे ॥११॥



## स्वागत

(बनथली में कखोड़ा पालत्यां का जलसा में कुटी की तरफ सूं  
कखोड़ो पालत्यां को स्वागत

भलां पधास्या आज थे सारा पधास्या छो ।  
काम की कर ठाल थे सारा पधास्या छो ॥१॥  
जीवन कुटी नै देखबा को मन्सूबो करबो कस्या ।  
घणां दिनां में आज थे सारा पधास्या छो ॥२॥  
जीवनकुटी की आज पैली बात थे सारो सुणी ।  
सुणी जसी नै देखबा सारा पधास्या छो ॥३॥  
जीवनकुटी में पालती का फायदा को बात छै ।  
आज आंख्यां देखबा सारा पधास्या छो ॥४॥  
ख्याल तमासा गाजा बाजा कोरा मत थे जाणज्यो ।  
जंडो हेरो हेरबा सारा पधास्या छो ॥५॥  
पालणां सब की करो छो पालती जद नांव छै ।  
अर्थ साँचो जाणबा सारा पधास्या छो ॥६॥  
हारथोडा थां पालत्यां को भाग पर विस्वाम छै ।  
भाग नें पिछाणबा सारा पधास्या छो ॥७॥  
लोग कै छै पालती नै भरतजी को स्राप छै ।  
निरचू गोबा स्राप नै सारा पधास्या छो ॥८॥

थांका दुख को जड़ा मूल सूं म्हांनै सारो ग्यान छै ।  
मूल दुख को खोदबा सारा पधारचा छो ॥९॥  
पालती अब हिमत हारी हिरदो भी जागै नहीं ।  
हिम्मत को रस चाखबा सारा पधारचा छो ॥१०॥  
रोग थांको घणो खरो छै थांका हि बसको लखो ।  
भेद यो ही जाणबा सारा पधारचा छो ॥११॥  
मणिया माला एक का थे बिखरचोड़ा रलता फिरो ।  
माला पाछी गूँथबा सारा पधारचा छो ॥१२॥  
मान बो न मानबो तो थांका चित को बात छै ।  
प्यारा म्हांका जीव सूं सारा पधास्या छो ॥१३॥

## विदा

(बनथली में कखोड़ा पालत्यां का जलसा में पालत्यां की विदा—  
पालत्यां नै कुटी का आदमी मीठो ओलमो देखै । पैली कुटीका सेवक  
बनथली में सूं रोजीना गाँवा में जाता—ई. जलसा पाछै गाँवां में  
रैवा बेई गाँव हालां की साथ ही चल्या गया छै )  
एजी लैर लगाणा पावणा थे जबरा आया जी—  
म्हांका घर नै छोड़ म्हे तो चाल्या आया जी ।  
थां जस्या ही भूंपड़ा म्हे आय बणाया जी ॥ - १ ॥



बिना बुलाया थाकै घर म्हे जाता आया जी ।  
 थे भी खोदा खोद म्हांनै घणा सताया जी ॥- २॥  
 पैली पैली नांव म्हांका घणा लगाया जी ।  
 मन में आया ज्यो ही पैका धाप उड़ाया जी ॥-३॥  
 थाकै भी क्यों स्वाद छै थे यों भरमाया जी ।  
 थाका प्यारा भायला थानै घणा डुलाया जो ॥४॥  
 थां सबलां का बोलां नै म्हे भलां जराया जी ।  
 मोत्यांला की किरपा म्हांनै जम्या रखाया जी ॥५॥  
 चंदा का म्हे रुपया ल्याकर रोटा खाया जी ।  
 आगता जद हुया मांगता बंद कराया जी । ६ ॥  
 बिना मांग्या भी कदे जदे तो रुपया आया जी ।  
 परसेसर की गोद में अब आसण पाया जी ॥ ७ ॥  
 मिलसी जतरै रोटी खास्यां रंग जमाया जी ।  
 भूखारैस्यां जद भी करस्यां मर्दा जाया जी ॥ ८ ॥  
 प्यारा आया पावणा म्हां कै मन में भाया जी ।  
 जियनकुटी का सेवकां का चित्त लुभाया जी ॥ ९ ॥  
 थे तो म्हांनै लेजाबाला घणा बताया जी ।  
 जाबालां नै लेजाबाला राम बणाया जी ॥ १० ॥  
 गांठ गदड़ा बांध थाकै पूंछै धाया जी ।  
 कांई गजब की भुरकी नाखी लैर लगाया जी ॥११॥

## ललकार

( दो च्यार उपदेस की बातें )

सुख सूं कपड़ो अर रोटी मिलै  
 मत नाक जच्यां भी चढाया करो ।  
 जद घाटो पड़े तदबीर करो  
 हकनाक मती घबराया करो ॥  
 नरमो कर आपसरो में रहो  
 करड़ावण आप भुलाया करो ।  
 जबरो बण जो अपमान करै  
 भट जोस जरा सो दिखाया करो ॥१॥  
 निमलो खुद सूं जद आय मिले  
 कुछ भाव दया को बताया करो ।  
 सबलो जद आकर वार करै डर  
 सीस कदे न भुकाया करो ॥  
 जद हिम्मत को कुछ काम पड़े  
 मत जीव जरा भी लुखाया करो ।  
 घरको नुकसान बणे जद भी मन  
 गाँव भला में लगाया करो ॥२॥  
 कुछ काम शुरू कर आप उडो,



मजबूत रहो घबराओ नहीं  
 ज भीतर बाहर साफ रहो,  
 खतरा सूं कदे कदराओ नहीं ॥  
 सब मेल करो, सब साथ चलो,  
 सब एक रहो बिखराओ नहीं ॥  
 ललकार जवाब करो मरदो,  
 सच बात कहो कलराओ नहीं ॥३॥  
 अब कालकलू सब बीतचुस्यो,  
 बस नांव कलू को लिया न करो ॥  
 भगवान भजो बिसवास करो,  
 चित पाप कथा में दिया न करो ॥  
 अब छूट सजीवण बूंटो पिवो,  
 अर भैर कदे भो पिया न करो ॥  
 सत को पण थे जकड़ो पकड़ो,  
 बिना सत्त घड़ी भी जिया न करो ॥४॥  
 तकदीर को ठीकरो फोड़ धरो,  
 अब भाग कै आग लगाओ जरा ॥  
 सब झूठ लिलाड़ लिखंत करो,  
 पुरसारथ लेख लिखाओ जरा ॥

मुरदापण छोड़ कै मर्द बणो,  
 मरदी कर ख्याल दिखाओ जरा ।  
 दिल को धड़को अब दूर करो,  
 डर मै डरपार भगाओ जरा ॥५॥

## कानजी सांवरियो

( जीवनकुटी की प्रार्थना )

कुटिया की लाज रखाओ जी,  
 म्हारा कानजी सांवरिया ।  
 काना वनस्थली में आओ २  
 गीता को कौल निभाओजी,  
 म्हारा कानजी सांवरिया ॥ १ ॥  
 काना कड़ो बरत म्हे लीनो २  
 निमलां की मदद कराओजी,  
 म्हारा कानजी सांवरिया ॥२॥  
 काना ज्योती दिव्य दिराओ २  
 म्हारो मारग थे दरसाओ जी,  
 म्हारा कानजी सांवरिया ॥३॥



काना धन जन को द्यो सारो २  
 कुटिया को काम जमाओ जी,  
 म्हारा कानजी सांवरिया ॥४॥

काना लोग भरम में डूब्या २  
 दुनिया की नाव तिराओ जी,  
 म्हारा कानजी सांवरिया ॥५॥

काना काम करां यो थांको २  
 यो निजू काम सुधराओ जी,  
 म्हारा कानजी सांवरिया ॥६॥

काना विनती म्हे या करदी २  
 प्रभु बेगीसी चित ल्याओ जो,  
 म्हारा कानजी सांवरिया ॥७॥



बरस पैलो ]

[ बानगी छठवीं

# जीवनकुटीर का गीत

माहवारी पोथी

वातवि ५। २०१५




प्रकाशक-

जीवन-कुटीर, वनस्थली

पो० अॉ० निवाई [ जयपुर स्टेट ]

दाम एक पोथी का } अक्टूबर १९३४ { दाम एक बरस का ।।। )  
 क्यार पीसा } डाक मैसूल म्यासे





# स्टेशनरी

स  
स  
ती  
और  
ब  
दि  
या

दुब्बे ब्रादर्स

त्रिपोलिया बाजार

जयपुर ।

सब प्रकार का उत्तम कागज व स्टेशनरी खरीदने  
का एक मात्र स्थान ।

## जड़ में कीड़ा

महानै अतरा बरस बारला गांवां का गरीबांके बीच में रैतां  
इंगा, जद म्हेया देखी छै क सारी दुनिया की जियां ये गरीब  
भी आपको फायदो करबो चावै छै, चाहे जियां सांच भूय  
सूं आपको मतलब बणा लेबो चावै छै—पण फरक यो  
छै क ये लोग आपका असली फायदा नुकसाण नै, आप  
का सांचल्ला सोखी-दोखी नै जरा सो भी कोने पिछाणै  
ई हिसाब सूं ये आपही आपका दुसमण होरहा छै । फेर य  
में ज्यो पंच पांच्या छै नै तो आपनै रामजी सूं थोड़ा भो  
ही नीचा भलां ही समझता हो । गरीब आदमी पुराय  
चाल नै छोड़र जरा भोत ही ऊंनै ऊंनै चल्थो जाय त  
फेर पंचायती में ऊंकी खैर कौनै—“न्योतो लावणौ अर क  
बंद-अर बारै बरस ताईं जात बारै” ! ब्याव सगाई ज  
में ही करणा पड़ै छै सो ‘जातगंगा’ सूं दबणो ही पड़ै  
आपसरी की तीखा तीख, होड़ा होड़ तो आप आप  
जात में सबके ही छै, ज्यो सहर में छै सोही गांव में मोज  
छै । हरेक गांव में दो चार पटैल भी छै—बांकी खुद  
हालत भलां ही कसी भी हो, पण दूसरा गरी  
ताईं तो पटैल एक दूसरो राज ही बण ज



छै । इजारा का गांवां में चाहे जियां बांख कर देणी, गांवका मलवा नै खुद चाखणो अर आपका भायलां नै चखाणो, ज्यो घणा गरीब हो बां पर क्यों न क्यों बोझ और लाद देणो — बस पटैलां वा ये काम छै । पटैलां का बड़ा बेवारी परगना का राज मुलाजिम — यां का बारा में तो कही जाय सां ही थोड़ी । ये लोग स्टैंड में बड़ा हाकिमां के सामनै जस्या गरीब बण जाय छै — वस्या ही आपका पटा का गांवां में आयां पाल्लै कोनै रै । फेर बोरां को लंबर आवे छै — बोरा समझै और चावै तो गरीब की भोत मदत कर सकै छै और आपकी रोटी भी कमा सकै छै — पण आजकाल तो वै आपका ही पेट नै भरबो चावै छै, जद फेर गरीब धुरिया भां बांनै सूका पाका राखवा की विद्या सीखवां सरू कर दियो दीखै । आखरी लंबर में गांव का पंडा पुजारी आवै छै । ये लोग त्रियां तो मांगर खाय छै, हाथ को दियो ले जाय छै पण जियां और बातां को इजारो पंचां कनै या पटैलां कनै छै विद्या ही सारा धरम करम को इजारो यां 'गरु म्हारज' कनै छै ।

गरीब आपको आप दुसमण अर फेर ऊंकै ये पांच तरै का भायला । म्हे या देखी छ क असली राज का बारा में लोगां का बुरा विचार कोनै—पण राज को सरूप

गरीबां नै तो राज का छोटा—मोटा मुलाजिमां में ही दीख सकै छै—जद वै विचारा बैबा लाग जाय छै—“ आपणा राज में तो सुणार्ई कोनै, कोई न्याब कोनै करै ” । म्हांनै जीवनकुटी हालां नै रुप्या पीसा की अर म्हां की खुद की मुसकलां को सामनो तो करणो पड़ै ही छै—पण राज की जीं पिरजा की म्हे भलाई करबो चावां छां, ज्यां गांवां नै म्हे इरथा भस्या देखबो चावां छां, बांकी जड़ में तो कीड़ो लाग रहबो छै । जी सूं म्हे बारंबार राज को ध्यान ई तरफ खींचबो चावां छां—नांतर तो “डोकरिया किएण काम राजकथा सूं राजिया” । म्हे चुप चाप बंदगी बजावाला आदमी छ और अब भी वैही छां—पण यो गीतां को सिलसिलो चाल पड्यो तो म्हे कदे कदे म्हां का दिल को यो एक और गीत भी गाव्यां छां । गीत बाचवाला गीतां की तान में ई गीत नै कमती सुणैला तो बांको राम सुणैलो ।

हीरालाल शास्त्री



बरस पैलो बानगी छठी

## जीवनकुटीर का गीत

श्री गीताजी का ११ वां अध्यायका ३२-५० श्लोकांको तरजमो

श्री भगवान बोल्या—

कालोऽस्मि लोकक्षय कृत्प्रवृद्धो  
लोकान्समाहर्तुमिह प्रवृत्तः ।  
ऋतेऽपि त्वां न भविष्यन्ति सर्वे  
येऽवस्थिताः प्रत्यनीकेषु योधाः ॥३२॥

लोकों को मैं नास करूँ बढ्यो हुयो छूँ काल बली ।  
लोक समेटण की अब चित में धारी छै मैं काल बली ॥  
दुसमण की ज्यो फौजां में ये जोधा दीखै अड्या हुया ।  
ये न लडस्यो जद भी अर्जन ! जाणो यानै मर्या हुया ॥३२॥

तस्मात्बभूविष्ठ यशो लभस्व  
जित्वा शत्रुन्मुहुर्द्व राज्यं समृद्धम् ।  
मयैवैते निहताः पूर्वं मेव  
निमित्तमात्रं भव सव्यसाचिन् ॥३३॥

इस थे ऊवा हो जाओ यो जस लूटो पड़्यो हुयो ।  
दुसमण जीतर राज भोगल्यो धनजन सूं यो भय्यो हुयो ॥  
पैली सूं ही मारचुगो में थांका दुसमण ध्यान धरो ।  
सव्यसाचि ! अब निपत वणो थे याही बाकी ध्यान धरो ३३ ॥

द्रोणं च भीष्मं च जयद्रथं च  
कर्णं तथान्धानपि धोधवीरान् ।  
मया हतास्त्व' जहि मा व्यथिष्टा  
युधयस्व जैतामिरणे सपत्नान् ॥३४॥

द्रोण भीष्म अर करण जयद्रथ जोधा मान्या निगै करो ।  
मारो, मत डरपों थे रण मे, जूमो दुसमण फते करो ॥३४॥

संजय बोल्या—

एतच्छ्रुत्वा वचनं केशवस्य  
कृत्वाञ्जलिर्वापमानः किरीटी ।  
नमस्कृत्वाभूप एवाह कृष्णं  
सगद्गदं भीत भीतः प्रणम्य ॥३५॥

काना की या बात सुणी जद अर्जन डरसू कांप गया ।  
हाथ जोड़कर नमस्कार कर ऐस्या गद्गद् वचन कया ॥३५॥

अर्जन बोल्या

स्थाने हृषीकेश तव प्रकीर्त्या  
जगत्प्रहृष्यत्यनुरज्यते च ।



रक्षांसि भीतानि दिशो द्रवन्ति  
सर्वे नमस्यन्ति च सिद्धसंधाः ॥३६॥

अन्तरजामी बात ठीक छै मैमा यो संसार करै ।  
थांकी मैमां सूँ यो साँचो हरस करै अर प्यार करै ॥  
राक्षस भी ये ड्य्या हुया छै व्याय्यू कानी धाप रहया ।  
सिद्धसङ्घ ये सारा मिलकर थानै सीस नवाय रखा ॥३६॥

कस्माच्च ते न नमेरन्महात्मन्  
गरीयसे ब्रह्मणोऽप्यादिकर्त्र ।  
अनन्त देवेश जगन्निवास  
त्वमक्षरं सदसत्तत्परं यत् ॥३७॥

नमस्कार म्हारज ! आपनै करै नहीं क्यों सभी जणां ।  
ब्रह्मा का भी रचवाला छो और आपछो बड़ा घणां ॥  
हे देवेस ! निवास जगत का ! आप अनन्त ! विराज रखा ।  
सत् कै और असत् कै आगै अक्षर आप विराज रखा ॥३७॥

त्वमादि देवः पुरुषः पुराणस्त्वमस्य  
विश्वस्य परं निधानम् ।  
वेत्तासि वेद्यं च परं च धाम  
त्वया ततं विश्वमनन्तरूप ॥३८॥

आदिदेव छो आप प्रभूजी ! पुरुष पुरातन आप बड़ा ।  
धाराई ब्रह्माण्ड विश्व का आप आसरा घणा बड़ा ॥

जाणनहारा और जाणवा जोग आप छो धाम बड़ा ।  
आप जगत में व्याप रखा छो अनन्त रूप छो घणा बड़ा ॥३८॥

वायुर्यमोऽग्निर्वारुणः सशाङ्कः

प्रजापतिस्त्व' प्रपितामहश्च ।

नमो नमस्तेऽस्तु सहस्रकृत्वः

पुनश्चभूयांऽपि नमो नमस्ते ॥३९॥

आप वायु छो यम छो अग्नी और वरुण छो चाँद प्रभो ।  
आप प्रजापत ब्रह्मा भी छो ब्रह्मा का भी पिता प्रभो ॥  
नमस्कार छै नमस्कार छै आज हजारों बार प्रभो ।  
फेर आपनै नमस्कार छै फेर नमस्ते आज प्रभो ॥३९॥

नमः पुस्तादथ पृष्ठतस्ते

नमोऽस्तु ते सद्यत एव सर्वे ।

अनन्तवीर्यामितविक्रमस्त्वम्

सर्व समाप्नोषि ततोऽसि सर्वः ॥४०॥

आगै पाछै सारैठै ही नमस्कार छै सर्वात्मा ।  
अपर बली छो सगलै व्याप्या जी सूँ ही छो सर्वात्मा ॥४०॥

सखेति मत्वा प्रसभं यदुक्तम्

हे कृष्ण हे यादव हे सखेति

अजानता महिमानं तवेदम्

मया प्रमादात्प्रणयेन वापि ॥४१॥



[ ८ ]

यादव ! कृष्ण ! सखा ! ज्यो हठकर मित्र मानकर बात कही ।  
मैमा नै पैचाण्यां विन ज्यो भूल प्रेम सँ बात कही ॥४१॥

यच्चावहासार्थमसत्कृतोऽसि  
विहारशय्यासनभोजनेषु ।  
एकोऽथवाप्यच्युत् तत्समन्तं  
तत्क्षामयेत्वामहमप्रमेयम् ॥४२॥

हँसी दिल्ली में भी ज्यो कुछ और कदे अपमान कस्यो ।  
बैठ्यां सूतां और बिचरतां खातां ज्यो अपमान कस्यो ॥  
और एक तो अथवा अच्युत ! मित्रां में अपमान कस्यो ।  
अप्रमेय ! मैं सारी माफी चाहूँ ज्यो अपमान कस्यो ॥४२॥

पितासि लोकस्य चराचरस्य  
त्वमस्य पूज्यश्च गुरुर्गरीयान् ।  
न त्वत्समोऽस्त्यभ्यधिकः कुतोऽन्यो  
लोकत्रयेऽप्यप्रतिमप्रभाव ॥४३॥

चलवावाला न चलवाला आप जगत का पिता प्रभो ।  
और बड़ा सँ बड़ा गुरु छो और पूज्य छो आप प्रभो ॥  
सब सँ बढ़कर असर आपको तीनों लोकों मांय प्रभो ।  
नहीं बराबर को भी कोई बढ़कर होवै कियो प्रभो ॥४३॥

[ ९ ]

तस्मात्प्रणम्य प्रणिधाय कायं  
प्रसादये त्वामहमीशमीड्यम् ।  
पितेव पुत्रस्य सखेव सख्युः  
प्रियः प्रियायार्हसि देव सोढुम् ॥४४॥

अस्या बड़ा छो जघां आपका चरणां में मैं पड़्यो हुयो ।  
राजी होओ आप पूज्य छो परमेसर मैं पड़्यो हुयो ॥  
पिता पुत्र नै मित्र मित्र ने माफ करै ज्यों माफ करो ।  
प्यारा आप आपको प्यारो देव ! मनै भी माफ करो ॥४४॥

अदृष्टपूर्वम् हृषितोऽस्मि दृष्ट्वा  
भयेन च प्रव्यथितम् मनो मे ।  
तदेव मे दर्शय देव रूपम्  
प्रसीद देवेश जगन्निवास ॥४५॥

पैली को देख्योड़ो कोनै देख अनोखो रूप प्रभो ।  
राजी भी में होय रह्यो छूँ डर सँ व्याकुल चित प्रभो ॥  
हे देवेश ! निवास जगत का ! आप खुसी हो जाओ जी ।  
बो को वोही रूप आपको फेर मने दिखलाओजी ॥ ४५ ॥

किरीटिनं गदिनं चक्रहस्त-  
मिच्छामि त्वां द्रष्टुमहं तथैव ।  
तेनैव रूपेण चतुर्भुजेन  
सहस्रबाहो भव विश्वमूर्ते ॥४६॥



सीस मुकुट हो गदा हाथ में चक्र हाथ में लेल्यो जी ।  
करबो चाऊं नाथ ! आपका दरसण वै ही देवो जी ॥  
जगत रूप छो सहस्रबाहु छो त्रिनती एक सुणाऊं छू ।  
ऊँका ऊँही रूप चतुरमुज का में दरसण चाऊं छू ॥४६॥

### श्री भगवान बोल्यो

मया प्रसन्नेन तवार्जुनेदम्  
रूपं परं दर्शितमात्मयोगात् ।  
तेजोमयं विश्वमनन्तमाद्यं  
यन्मे त्वदन्येन न दृष्टपूर्वम् ॥४७॥

अर्जन ! थां पर राजी होकर आज अनोखो रूप महा ।  
म्हारो आत्माबल सूं थानै आज दिखायो रूप महा ॥  
आद रूप छै बेहद म्हारो तेजस्वी यो रूप महा ।  
नांही पैली कोई को भी देख्योड़ो यो रूप महा ॥४७॥

न वेदयज्ञाध्ययनैर्न दानैर्न—  
च क्रियाभिर्न तपोभिरुग्रैः ।  
एवंरूपः शक्य अहं नृलोके  
द्रष्टुं त्वदन्येन कुरुप्रवीर ॥४८॥

वेद पढो चाहे जिग करो चाहे दान मोकला कन्या करो ।  
और क्रिया चाहे करो मोकली उगर तपस्या कन्या करो ॥

अस्यो रूप ई मिरत लोक में कोई नाहीं देख सकै ।  
आज अकेला थे ही देख्यो दूजो नांही देख सकै ॥४८॥

मा ते व्यथा मा च विमूढभावो  
दृष्ट्वा रूपं घोरमोदृङ्ममेदम् ।  
व्यपेतभीः प्रीतमनाः पुनस्त्वम्  
तदेव मे रूपमिदं प्रपश्य ॥४९॥

घोर रूप यो मूढ भाव सूं व्याकुल हो थे मत देखो ।  
म्हारो योही रूप खुसी हो बेघड़कै फेरयूं देखो ॥४९॥

### संजय बोल्यो

इत्यर्जुनं वासुदेवस्तथोक्त्वा  
स्वकं रूपं दर्शयामास भूयः ।  
आश्वासयामास च भीतनेनम्  
भूत्वा पुनः सौम्यवपुर्महात्मा ॥५०॥

अर्जन नै ये वचन कह्या अर खुदको रूप दिखा दीनो ।  
रूप सोवणो धार म्हातमा उर में धीरज दे दीनो ॥५०॥



## अंगरेजी का पढ़ा लिखा

( दो चार सांची बातों-मजाक की शकल में )

अंगरेजी का पढ़ा लिखा की हालत आज बतावों छे ।  
 भूल चुक हो जावै जीकी माफी पैली चावै छै ॥१॥  
 पढ़वो लिखवो जाय अवरथा सारी विद्या ये भूलै ।  
 अंगरेजी को पढ़वो लिखवो कोईसानै आवै छै ॥२॥  
 एक रुपया को ठाराना भर घिरत बिकै छै बाजारों ।  
 पांचानां को पूछो जद भी कागद पेन्सिल चावै छै ॥३॥  
 बाल बाल की खाल निहाले मार दलीलां देवै छै ।  
 सूरी सादी मामूली भी बार्ता नै उलझावै छै ॥४॥  
 अंगरेजी पढ़वा सूं देखो अकल अजीरण हो जावै ।  
 खुद की अकल मोकली दीखै और दाय नहीं आवै छै ॥५॥  
 अंगरेज पढ़वा सूं देखो ठालापण को गुण आवै ।  
 हाथ लगा कर काम कस्यां तो विद्या निसफल जावै छै ॥६॥  
 एक रुपया का गऊं धडी भर मोल खरीदर ये ल्यावै ।  
 टको पीसो पलदारां की झट पट भेट चढ़ावै छै ॥७॥  
 कोई कोई बाबूजी तो साग ल्यावता सरमावै ।  
 दूजां कन्नै साग मंगाकर वै नित मूंड मुंडावै छै ॥८॥  
 पैली पैली मिली नौकर्यां अबतो ये दुतकार सुणै ।  
 रोज खुपामद करता डोलै ये जूती चिटकावै छै ॥९॥

तंदरुसती बाबूजी की पढ़तां पढ़तां खतम हुई ।  
 बिना चाय का कपड़ा लादर कोरा हाड छियावै छै ॥१०॥  
 न दीख्यो जद चसमो धार्यो क्रीम लगाई टिचन हुआ ।  
 भरी जवानी लकड़ी पकड़ी ठेग ठेग कर जावै छै ॥११॥  
 नई सभ्यता की ये चोखी बार्ता नांही सीखै छै ।  
 ऊपरली सजधज ये सीखै ऐबां नै अपनावै छै ॥१२॥  
 घरका सूं भो पड़ै आंतरा रूढि बाद भी रैजावै ।  
 घरका नांही नहीं घाटका पढ़्या हुआ भरमावै छै ॥१३॥  
 धुप्या धुपाया टीप टाप ये बाबू बणकर डौलै छै ।  
 सीधा सादा रैबाला ये घरकां सूं सरमावै छै ॥१४॥  
 आप 'साब' की दुम बणनायै व्याम व्यूम ही बोलै छै ।  
 घर कै मांय लुगायां यांकी बेड़ियां ही खणकावै छै ॥१५॥  
 मिस्टर तो पार्टी में जावै कोट पैण्ट अर हैट लगा ।  
 मिसेज विचारी गल्यां मांय या गाल्यां गाती जावै छै ॥१६॥  
 बिना पढ़्या तो भूखा रैकर जीमण माल लुगवै छै ।  
 पढ़्या लिख्यां को सभी कुमाई आडम्बर में जावै छै ॥१७॥  
 बाबूजी की सारी तनखा पंदराड्या में उठ जावै ।  
 पढ़्या हुआ बिल बाबूजी का चित नै घणो दुखावै छै ॥१८॥  
 तनखा चायै जतरी पावो फरनीचर तो लियो मंगा ।  
 खन्दी किस्ता चुकती रैवै मोटरकार बिसावै छै ॥१९॥



आप आपणो सांग बदलकर नकली सांग सजावै छै ।  
 हिन्दुस्तानी नांव बुरो छै यानै नही सुहावै छै ॥२०॥  
 "क्रीन शेव" की मैमा जबरी बूटां की या लैए लगी ।  
 टीप टाप कर चरड़ मरड़ की न्यारी छटा दिखावै छै ॥२१॥  
 हमदरदी को एक बड़ो गुण सीख मांगकर पारपड़े ।  
 बिना पढ्या नै गिगै ज्यानवर बाबूजी पद पावै छै ॥२२॥  
 विद्या को फल विनय होय छै याही सुणता आवांछां ।  
 ई विद्या का डर कीमारी विनय भाग कर जावै छै ॥२३॥  
 पैली पैली या समझै छा पढ़बा सं ईमान बधै ।  
 बिना पढ्या ज्यों पढ़बा हाला भी गैरा गटकावै छै ॥२४॥  
 या समझै छा पढ़बासं तो देसभक्ति भी आज्ञावै ।  
 पढ़बाहाला देस भलाई कोड्यां मोल विहावै छै ॥२५॥  
 या समझै छा पढ़बा सं तो लोग सुधास्क होजावै ।  
 पढ़्या हुया ये रुढ़िवाद में सारी अकल खपावै छै ॥२६॥  
 या समझै छा पढ़बा संतो दिल की ताकत आज्ञावै ।  
 पढ़्या लिख्या पण पोच पणो ये सबसुँ घणो दिखावै छै ॥२७॥  
 उपजी जतरी सारी बातां खरी खरी ये लिख दीनी ।  
 आख्यां देखी बात बताइ संसे नहां सतावै छै ॥२८॥  
 पढ्या लिख्या सं नाथ ! देस नै पूरो लाभ नही पूँच्यो ।  
 अब तो पूरो मिले फायदा या ही अरज सुणावै छै ॥२९॥

अंगरेजी वो आप पढ़यो जद देखी सारी रचना छै ।  
 ई रचना को रचबा वालो फेर्युँ माफी चावै छै ॥३०॥  
 अंगरेजी ज्यो नहीं पढ्या छै वां में भी ये गुण देख्या ।  
 अंगरेजी का पढ़्या लिख्यां सुं जीसुं माफी चावै छै ॥३१॥  
 अंगरेजी का पढ़्या लिख्या भी केई चोखा वो देख्या ।  
 वां सगलां सं हाथ जोड़कर दिलसुं माफी चावै छै ॥३२॥

## बात विचारो

( लुगायां को फरज )

हाँ सखी ! थे बात विचारो । अण्णा घर फो काम संवारो ।  
 पैली थे विद्या अपणावो । मार अविद्या दूर भगावो ॥  
 विद्या को परचार हुयां सब होय सुधारो जी-सखी थे । १॥  
 ठाली थे पंचायत छोड़ो । निन्दा करबा सुं मुख मोड़ो ।  
 पांच जणी मिल आप्रभला की राय निकारोजी-सखी थे ॥२॥  
 हठ कर वाली थानै जाणै । और अकल की दुसमण जाणै ।  
 बदनामी को तिलक आपको घोर उतारोजी-सखी थे ॥३॥  
 छोटा टाबर मत परणावो । वानै थे गुणवान बणावो ।  
 बाल पणै परणार जलम वांको मती विगारोजी-सखी थे ॥४॥  
 गुडिया घूँघट काडर आवै । सासजी जद देखर स्यावै ।  
 मूरखताई ल्याग डूबतो वंस उवारो जी-सखी थे ॥५॥



सारी रीत जरूरी लागै । रीत निभायां नकदी लागै ।  
 पेट मोस मत भूल कुआं में <sup>रैती</sup> डारोजी-सखी थे ॥६॥  
 देखा देखी का ये सौदा । हौड करै सो क्यों रै बोदा ।  
 सरदा सारु काम करो सुण बचन हमारो जी सखी थे ॥७॥  
 निर्बल आप बणी छो घरमें । ठां व ठोड की होगई घरमें ।  
 घरकी कैद बिगाड्यो थांको मिनख जमारोजी सखी थे ॥८॥  
 एक तमासो और सुणास्यां । थांकी कमजोरी दरसास्यां ।  
 सफर करै जद अदद आपनै गिणलै न्यारोजी-सखी थे ॥९॥  
 मरद आपकी बात डुबोई । रैती की नै नार डुबोई ।  
 दुखिया होकर देस आपणो चावै सारोजी-सखी थे ॥१०॥

### गीतावली मिलन का ठिकाणाः—

१—जीवनकुटीर कार्यालय,  
 खेजड़े का रास्ता,  
 चांदपोलबाजार, जयपुर सिटी ।

सनोर्गन प्रेस, जयपुर ।

स्वदेशी व्यवसायों का उत्साह बढ़ाइये ।

हमारे यहाँ—

शर्टिंग, कोटिंग, पेचा, पागड़ी, साफ़ा, धोनी जोडा,  
 साड़ी, छीट, बायल, मलमल, क्रेप, तोलिया,  
 लिहाफ़, सर्ज, मौजे, बुनियान, चादर,  
 पलंग पोश, बनारसी साड़ियां, जीन,  
 शुद्ध खादो, रेशमी, ऊनी, वगैरः

सब शुद्ध स्वदेशी ठीक और निश्चत भाव से मिलेंगे

एक बार अवश्य पधारिये और देखिये कि  
 स्वदेशी कपड़े ने कितनी तरकीकी है ।

पताः—

राजस्थान स्वदेशी स्टोर्स,  
 जौहरी बाजार, जयपुर ।



# यदि आपको-

१. बालकों तथा नवयुवकों के लिये उपयोगी साहित्य
२. जयपुर राज्य के शिक्षाविभाग द्वारा स्वीकृत समस्त पुस्तकों तथा उन पर अच्छे से अच्छे लेखकों के नोट्स;
३. बहुत सस्ते दामों में Second Hand पुस्तकें;
४. अत्युत्तम सब तरह की स्टेशनरी का सामान;
५. सब तरह के खेलों का सामान;
६. और जयपुर के किसी भी पुस्तकविक्रेता से अधिक कमीशन;

चाहिये-

तो एकबार अवश्य हमारे यहाँ पधारने की कृपा करें।

अन्य जगह से आपको हमारे यहाँ हर प्रकार की सहूलियत होगी।

राजस्थान पुस्तक मन्दिर,

त्रिपोलिया बाजार,

जयपुर सिटी।

# जीवनकुटीर का गीत

## माहवारी पोथी

१ जी अशा जी म्या जा ॥ ६ ॥  
२ का जी वा (सामी) १२



प्रकाशक—

जीवन-कुटीर, वनस्थली

पो० ऑ० निवाई [ जयपुर स्टेट ]

दाम एक पोथी का	}	नवंबर	}	दाम एक वरस का (॥)
चार पीसा		१.६३४		डाक मेंसल न्यारो



## हर किस्मके

तेल, साबुन, सैंड, क्रोम वगैरह  
 यफलर-पोजे, बनियान स्वेटर वगैरह  
 स्टेशनरी और ड्राइंग का सामान  
 खेल का सामान

## शांति भंडार

किशनपोल बाजार, जयपुर सिटी

## यहां से लीजिये

1. सच्चा टाइम देने वाली घूणघड़ी ।
2. हर तरह का इमारती पत्थर का सामान ।
3. हर तरह की इमारती उलझन के लिये अच्छी मुफ्त सलाह ।

## वर्मेन कम्पनी

किशनपोल बाजार, जयपुर सिटी

## चेतावणी

पुराणा ज़माना में विरामण दुनियां की भलाईको काम करता सो वांका रोटी कपडा को भार दुनियां पर ही रहतो । विरामणानें आपका रोटा कपडाकै वास्तै दौडधूप कोनै करणी पडती । विरामणानें कै सिवाय जो कोई लूला पांगला होता वांका भारभी दुनियांका गिरस्त्यां परही रहतो । आज दिनभी आपणां समाजमें लोग सरधा सारु धरमपुन्न करै ही छै, पण वो याता अस्या नामधारी विरामणानें कनै जायछै ज्यो दान लेबोही जागै छै और दुनियांकी भलाई कै वास्तै कुछभी कोनै करै या दुनियाको पीसो जायछै वां हटा कटा भिखमंगा कनै जो मांगर खावानही आपको रुजगार बणालियो छै । आजकालकी हवामें भोतथोडा आदम्यांनै दुनियांकी भलाईकी बात सूझै बाकी सारा-ही एकमुं एक बदकर भागवान बणवो चावैछै । दुनियांकी भलाईका काममें लागवालानै सदा ईबातको डर लागतो रैछै कुण जागै काल दिन आपानें रोटी मिलसी या कोनै वो एकलोहो जदभी भुगतलै, पण ऊंके बाल बच्चाभी हो छै, वांका दुखनै वो सहजांही कोनै देखसकै; और छोटी मोटी बातांको त्याग करबा मेंही जोर आवे जद बाल-



[२]

बच्चोंको खाग कर जगतकी भलाई में लागबाला तो कोई विरला नीमट्टे । थोडाभोत समझदार आदमी तो खाग करबालाकी कदे कदे तारीफभी करदे छै, परन्तु आज कालका जमानामें पूंजीकै सामने दुनियांको भाथो नवै छै, खागकै सामने तो कमती नैतो दीख्यो । ईको मतलब यो ह्यो क खागकी सांचल्ली परतिष्ठा कोनै हो—और खाग कर बालानै दुनियांभी अपणाबा की एवज खागबानै तय्यार हो जायछै । दुनियांका मामूला आदमी आपणा तेललुंगाका भगडासुं फुरसत कोनै पावे—और वै ई बातनै समझैभी कोनै क आपानें आपणां घरका फिकर कै सिवाय कुछ दुनियांको फिकरभी करणो चायजे । और जोकोई खास तौरसुं घरबार छांडर दुनियांकी भलाई करबो विचारै वां नै रोटी कपडाकी चिंता सतावा लाग जायछै—असी हालत में कोई घणीं करडी विचारबाला माईका लालही भलांही आपकी टेकपर जम्पारै जाओ बाकी तो ई भगडामें भूल चूक पडभी जासी तो नीकल भागबो चासी ।

दुनियांको जितनो पीसो आजकल धरमपुत्रका नांव सुं मुफतखोरां की जेब में जायछै उतनोही बार देसकी भलाई करबालानै मिलजाय तो देस सेवकांकी एक फौज खडी होजाय । और देस सेवकांकी एकफौज खडी हो-

[३]

जायली जद जारही देसकी भलाई होसकैली । जद च्याच्युं मेर आग लाग रहीहो तो एकदम भोतसारा आदमी बुभावै तो स्यात् आग कबजमें आजाय—बाकी अस्या तूफान में कोई एकदो जगां पाणीका घडा छिंडक्यांसुं तो ज्यादा मतलब कोनैही नीकल सकै । आपणा समाजकी हालत ज्यादा खराब छै और ऊंन सुधारबाकै वास्ते लाखां आदमी खडा होबाकी जरूरत छै । और वां लाखां आदम्यांका रोटी कपडाको परबंध होबाकी जरूरत छै ।

आपणो समाज आपका फायदा नुकसाण नै हालतक कोने जाणै । ज्यो रीतरिवाज पडगया छै, वानै चाहे जियां भी निभा देबो चावै छै । वां रीत रिवाजांका मूलको विचार कोनै करे—ईकै सिवाय सरासर मालुम होजायके फलाणो रिवाजतो खोटो छै, जदभी चाच्युं तरफकी हवाको जोर अभ्योही छै क इक्या दुक्या आदमीकी ऊं रिवाजनै छोडदेबाकी हिम्मत कोनै होसकै । आपणा राजको ध्यान भी सुधारकी तरफ कमतीही दीख्यो—राज स्यात् या समझै छै क “ज्यां कामां नै लोग खुसी सुं करैछै अथवा ज्यां कामां पर धरम की छाप लगा मेली छै वांका बीच में राज को पडबो ठीक कोनै; लोग माफिक हो जद तो राज भी कानून बणादे” । असल में या बात ऊंली छै—लोग



सचमुच ही कोई बात नै छोड़बो चासी, जदतो वै आपही  
छोड़ देसी, वानै कानून की जरूरत ही काई रैसी ? ज्या  
रीत रिवाजां सुं पिरजा को बराबर नुकसान हो रह्यो छै  
और ज्यांनै लोग कुछ तो आपकी जिद सुं और कुछ  
पास पडोस की हवा का असर सुं न छोड़बो चावै, वां रीत  
रिवाजां कै खिलाफ जरूर कानून बणा देणो चायजे  
और कानून की पाबंदी की निगरानी भी कडाई कै साथ  
करणी चायजे । गांवां का विचार सुं दो कानून तो तुं  
बणा जाणा चायजे—

(१) एकतो वो कानून जीं सें लोग फिजूलखर्ची सें  
बच सकै—

(२) दूसरो वो कानून जीं सें लागां नै आपकी पैदा  
वार बधावा कै नास्तै चोखा बैल, चोखो बीज, खाद वगैर  
आराम सुं मिल सकै—और वांकी पैदावार का चोखा दा  
ऊठ सकै ।

कई रियासतां में अस्या कानून बंग्या हुया छै आ  
जांच करी जाय तो बठा की पिरजा को हाल जरूर  
ज्यादा चोखो नांकलसी । पिरजा की भलाई की खास नि  
राखर चालबा की घणी सुं घणी जरूरत छै ।

ऊपर लिखी सारी बातों का निचोड़ यो छै—

(१) समाज का सब आदम्यां नै आपका घरका  
सिवाय दुनिया की भलाई को फिकर भी करणो चायजे—  
और आपकी कमाई में सुं एक पांती वां लोगां नै सुपरद कर  
देणी चायजे जो आपका घरका काम नै छोड़र दुनियां की  
भलाई में ही आठ फैर बत्तीस घडी लाग्या रैछै—

(२) समाज की भलाई चावाला भोतसा आदमी खडा  
होगा चायजे ज्यो चाच्युं मेर भलो संदेस सुणावै और  
बावली दुनिया नै समझावै ।

(३) राजकी तरफ सुं कानून का बल सुं बुराई नै  
रोकणी चायजे और भलाई को परचार होणो चायजे—  
दुनिया की हालत आपां समझ राखी छै ऊं सुं भोत  
ज्यादा खराब छै—अगर आपां समझदार छां जद तो  
जल्दी ही फिकर करां और थोडी भोत रोक थाम लगाल्यां  
नातर तो जल्दी ही अस्यो तूफान आसी ज्यो कोई का वाप  
सुं रुक्यो कोनै रुकसी । म्हानै सूझी जसी या चेतावणी  
देदी—ई पर गौर करबो विचारवान आदम्यां का हाथ  
की बात छै ।

हीरालाल शास्त्री ।



बरस पैलो बानगी सातवीं

## जीवनकुटीर का गीत

### गरीबकी फरियाद ।

हे नाथ ! म्हांका चित्त में कुछ एकता को भाव हो ।  
अर्थ का संगी फिरां परमार्थ को भी च्याव हो ॥१॥  
निजको थोडो काम बिगड्यो जद बडी चिन्ता करी ।  
भाइयां की दुरदसा सँ म्हांका दिल में घाव हो ॥२॥  
ज्यासुं निमला ज्यो मिल्या वांका वै लागू हो रखा  
म्हांको म्हांका भाइयां सँ प्यार को बरताव हो ॥३॥  
जोरकी ही जीत होछै न्याव सँ अन्याव सँ ।  
आपका दरबार में हे नाथ ! यो दरसाव हो ॥४॥  
“शेरखां” को हाय ! पासो आजतक सुंलो पड्यो ।  
हार सँ म्हे आगता छां म्हांका भी अब दाव हो ॥५॥  
लोग कै छै झूठ सँ ही यो चलै संसार छै ।  
झूट को म्हे ख्याल देख्यो सांच को भी ताव हो ॥६॥  
धर्म नै लंगडो बतायो तेज चाल अधर्म की ।  
चाल बन्द अधर्म की हो जद कस्यो अटकाव हो ॥७॥

(७)

न्यायकारी बण रह्या छो सुध गरीबां की नहीं ।  
काम म्हांको चालसी जद आपसुं ठहराव हो ॥८॥  
आपका दरबार में ही “गुड़” करी फरियाद छी ।  
गुड़ सँ मीठा हो रखा छां नाथ ! बीच बचाव हो ॥९॥  
म्हे गुलेटा भोत खाया और अब ताकत नहीं ।  
एक बारी फेर कां छां पार अब तो नाव हो ॥१०॥  
भोतसा ये डाल्यां काटै मूल परभी वारछै ।  
आप भांको नाथ ! जद ही म्हां जस्यां को जमाव हो ॥११॥  
म्हे ही म्हांका भायला छां दुसमणी म्हे ही करां ।  
और नै म्हे न भी कां तो आपसुं न दुराव हो ॥१२॥  
चाल म्हांकी बन्द होगी रासतो दीखै नहीं ।  
आखरी फरियाद पर अब दूध पाणी न्याव हो ॥१३॥

### जीमण जीम्यां जावै छै ।

जैपर <sup>ज्याति</sup> हाला <sup>देखा देखी</sup> आपसुं <sup>में</sup> जिमा जिमा कर स्यावै छै ।  
हाय विचारी <sup>जैपर</sup> नै यो जीमण जीम्यां जावै छै १॥  
और जगांतो प्यारो हो सो प्यारा को घर बांधै छै ।  
जैपर <sup>ज्याति</sup> हाला प्यारा बण कर घर की धूल उड़ावै छै ॥२॥



वाले जी को  
 ॐ नमो भगवते वासुदेवाय (८) रघुनाथ जी को हो के दे

नांव आठवों बोलै जीको जंगी जीमण रोपे छै ।  
 भायाजी का दरमण पञ्च पैली ही लुटावै छै ॥३॥  
 भायाजी जनम्यावै जद तो यांकी तबियत खिल जावै ।  
 माथै ल्यार खुसी का मारचा भारचा माल उडावै छै ॥४॥  
 थोड़ा दिन में फेर जनेऊ को मौको आ जावै छै ।  
 संस्कार चाहे होय अधूरो जीमण पूरो चावै छै ॥५॥  
 टका भरचा यां भायाजी को ब्याव लैर का लैर रूपै ।  
 सेखी में ये सोर सार कर घर को माल लुटावै छै ॥६॥  
 करमजोग सैं जे बाईजी यां का घर में जनम्यावै ।  
 हंसी खुसी नै भूल जाय ये सारा मिल पछतावै छै ॥७॥  
 दांत दूधका टूट्यां पैली चित्त में चिंता हो जावै ।  
 छोरी ऊपर कपड़ा लादर ऊंनै बड़ी बणवै छै ॥८॥  
 बाईजी को मोल तोल भी कई जगा तो ठहरालै ।  
 हाय ! निसरडा बणै कसाई जिन्दो मांस बिकावै छै ॥९॥  
 गांठ बांध कर घर में मेल्या पाछै जीमण रोपे छै ।  
 बेसरमी की हड़ होय पण नकटा नहिं सरमावै छै ॥१०॥  
 घरका छोगा छोरी सारा चाहे अणपढरै जावै ।  
 नित रोजीना चांकी खानि रज्याणारां रचवावै छै ॥११॥  
 हंसी खुशी का मौका पर तो जीमण की ज्यो हो सो हो ।  
 रौवा कूटो माच जद भी ये लाडू गटकावै छै ॥१२॥

कदे करे गंगोज बापडा कदे उजरणां कर देवै ।  
 एक फंद सूं छूटै कोनै दूजा में फंस जावै छै ॥१३॥  
 पितरां का ये करै कनागत वां में भी ब्योहार सधै ।  
 ब्योहारचां नै जिमा बडां की हुंडी ये सिकरावै छै ॥१४॥  
 बामण जीमें गणेशजीका मौज गोठकी लूटै छै ।  
 आडधरमकी राख राख कर सौदा खूब पटावै छै ॥१५॥  
 अपरस की चतराई यांके एक एक सूं बधकर छ ।  
 रस्तां में ये भोग लगा कर पूरो धरम निभावै छै ॥१६॥  
 दूर दूर तक रस्ता रोकै और कनातां लग जावै ।  
 आप आपकी बडी हैसियत चोडै सिद्ध करावै छै ॥१७॥  
 बिना पढ्योडा लोग पुराणा ई में सिद्धी समझै छे ।  
 फसन हाला पढ्या लिख्या भी विद्या सफल करावै छै १८  
 जनम परण अर मरण टलां चाहे यांका जीमण नहीं टलै ।  
 जिनगानी कै चाच्युं कानो जीमण जाल बिछावै छै ॥१९॥  
 धरम छोड़ अर छोड सासतर कौस नामा बैठ्या छै ।  
 मोठो गास्यो खाय खूब कर सारा मेल मिलावै छै ॥२०॥  
 खावा और खुवावा बारै मिनखा दे को फल हेरो ।  
 सब को सेवक एक विचरो हितकी बात सुणावै छै ॥२१॥  
 थांको शुभ विचरना यां छाने हिं लकी या



## सूतोड़ा मरदो !

(जागवा की चेतावणी)

अब तो निंदरा नै त्यागो रै, सूतोड़ा मरदो ।  
 थांका रै हलका में नोपत बाजै छै रै ॥१॥  
 खेती की चोकस करल्यो रै, सूतोड़ा मरदो ।  
 सूनी रै खेती नै गद्दा खावै छै रै ॥२॥  
 मन को बिसवास बडो छै रै, सूतोड़ा मरदो ।  
 चाल्यां सूं तो मंजल आखर आवै छै रै ॥३॥  
 पूरव में सूरज ऊग्यो रै, सूतोड़ा मरदो ।  
 सूरज का उगवा सूं घूबू भाजे छै रै ॥४॥  
 बुरो जमानो तो बीत्यो रै, सूतोड़ा मरदो ।  
 थांकै रै ताई दिन चोखा आवै छै रै ॥५॥  
 बूढा ठेरा तो धाप्या रै, सूतोड़ा मरदो ।  
 मोट्यारां के आगे आगल खूटै छै रै ॥६॥  
 मुरदापण नै तो त्यागो रै, सूतोड़ा मरदो ।  
 मुरदां की आंख्यां नै कागा टांचै छै रै ॥७॥  
 कुम्हार टपूडो बण गयो रै, सूतोड़ा मरदो ।  
 गद्दा कै भरोसै नार नै दोडायो रै ॥८॥

हाथां ही दुख पावो छा रै, सूताडा मरदो ।  
 मरदां का दुख सारा मिटता आवै छै रै ॥९॥

## पंच अस्तूती ।

दुनिया भर को धरम करम को पंच इजारो लिया फिरै ।  
 यांका सिरपर सारो बोभो जको विचारा लियां फिरै ॥१॥  
 पंचां नै पग्मेसर गिगना वो भी एक जमानो छो ।  
 आज आपडा पंच पाप को भारो मायै लियां फिरै ॥२॥  
 जरा भोत ज्यो यां पंचां का कंबा बारै पांच धरै ।  
 ऊंका ताई हुकम बडो ये खीसा मांही लियां फिरै ॥३॥  
 ऊंको हुक्को पाणी न्योतो और लावणो बंद करै ।  
 अस्यो नमूनो नादिरसाही औरां ताई लियां फिरै ॥४॥  
 घर कोई को होय लुटाणो पंच एकठा हो जावै ।  
 आगे होकर बांच चढा कर ये पंचाई लियां फिरै ॥५॥  
 घर जो कोई नहीं लुटावै गैलै गैलै काम करै ।  
 पंच खफा हो ऊंकै ताई कालो टीको लियां फिरै ॥६॥  
 कदे विरादर निमला ऊपर कोई संकट आ जावै ।  
 ऊंकी रत्ना होत नहीं पण टण्काई ये लियां फिरै ॥७॥



(१२)

पंचासूं भी घणा भयंकर धनी नवादू हो जावै ।  
 सब सूं बद् कर करै किगवर पंच लैर ये लियां फिरै ॥८॥  
 भागवान हो पंच बडा हो दुनिया को उपकार करो ।  
 नातर थांकी करणी थांकै ताई अपनस लियां फिरे ॥९॥  
 जो कोई चोखा पंच होय तो बांकी म्हे तारीफ करां ।  
 बांकै ताई रचबावालो गुण परसंसा लियां फिरै ॥१०॥

### बाजी राखणी ।

चेतो चेतो ए लुगायो बाजी राखणी ए ॥  
 लागी मूरखता की छाप, जीनै बेग मिटावो आप ।  
 अबतो नींद काडली थाप, बाजी राखणी ए ॥१॥  
 भूला घणी पुराणी बाण, चालो रीत नवादू जाण ।  
 राखो थांका कुलकी काण, बाजी राखणी ए ॥२॥  
 थांकै गाल्यां को छै कोड, ऊंनै अबतो देवो छोड ।  
 त्यागो लावणा की होड, बाजी राखणी ए ॥३॥  
 थांका पढ्या लिख्या ये पीव, यांको मती दुखावो जीव ।  
 समझो याही सुखकी नीव, बाजी राखणी ए ॥४॥  
 उजलो राखो मनको भाव, छोडो सारा भूठ बणाव ।  
 लागै सादापण को च्याव, बाजी राखणी ए ॥५॥

(१३)

जबगी घरकी थांकै पीक, घरको काम सुधारो नीक ।  
 (बाबा दुनियां की) भी ठीक, बाजी राखणी ए ॥६॥  
 त्यागो सकड़ाई को भाव, बारै भी क्यों करो जमाव ।  
 त्यारो भारत की थे नाव, बाजी राखणी ए ॥६॥

### विदा ।

(जैपर में करयोडा जलसा में कुटीका सेवक स्हैर हालां कनै  
 विदा मांगै छै)

एजी करता रीज्यो याद, आपकी ओल्यूं आवैली ॥  
 बिना बुलाया म्हे आयाछा, जास्यां छूटी लेर ।  
 टोकारा कै समच आवां, याद करचां सूं फेर ॥१॥  
 च्यार फेर म्हे काम करां छां, थोडो मिलै सराव ।  
 जदभी आकर करां बंदगी, म्हांका मन में च्याव ॥२॥  
 जंगल का म्हे रैबाला छां, म्हां में कोनै ग्यान ।  
 कही सुणी की माफ करैला, आप जस्या गुणावाना ॥३॥  
 दया मया थे म्हांपर राखो, बडा बडा सिरदार ।  
 थां लोगां को हुकम उठास्यां, लाग्यां म्हाको वार ॥४॥  
 थां को ही म्हे काम करां छां, जतरी म्हांकी दीड ।  
 तो भी लोग ओलमा दे छै, जैपर दीन्यो छोड ॥५॥



जड में पाणी देवा सुं तो, खूब विरख लग जाय ।  
 डाली पत्तां पाणी छिडक्यां, सारो बादू जाय ॥६॥  
 राजनीत म्हे समझां कोनै, म्हे छां भोला लोग ।  
 राजनीत सुं थे डरपो सो, अकल अजीरण रोग ॥७॥  
 एक मरम नै खूब समझल्यो, दुख सारा मिट जाय ।  
 रैत राज सुं न्यारी कोनै, राज रैत कै प्राय ॥८॥  
 बाड बेल सुं चोखी लागै, बेल बाड चढ जाय ।  
 बाड बेलनै खाय जद्यां तो, काम सभी विगडाय ॥९॥  
 हाथ जोड कर विनै करां छां, सुगल्यो सारा साथ ।  
 जिवन कुटी को मरम समझल्यो, फेर बटाओ हाथ ॥१०॥  
 थांका म्हांका एक जिगर छै सारां को हित एक ।  
 सत्त धरम कै गैलै चालो राम रखावै टेक ॥११॥

## प्यारो सांवरियो ।

( पलती की प्रार्थना )

हाथ जोडकर करां वानती, सुगलै रै प्यारा सांवरिया,  
 रै रै हाथ जोडकर । १॥  
 च्यार फेर म्हे करांरै कुमाई, पेट भरा दे रे सांवरिया,  
 रै रै च्यार फेर म्हे ॥२॥

म्हांका घरकी पाल दूटगी, पाल बंधा दे रे सांवरिया,  
 रै रै म्हांका घरकी ॥३॥  
 जीव बचावो मुसकल होगो, जीव बचा दे रे सांवरिया,  
 रै रै जीव बचावो ॥४॥  
 आप सरी में लड़ता रे डोलां, मेन करा दे रै सांवरिया,  
 रै रै आपसरी म ॥५॥  
 भला बुरा ने नही रे पिछाणां, ज्ञान सिखा दे रे सांवरियां,  
 रै रै भला बुरा नै ॥६॥  
 भूत परेतां सुं डरपांछां, निडर बणादे रै सांवरिया,  
 रै रै भूत परेतां ॥७॥  
 चाल भला की रै म्हे नहि जाणां, चाल सिखा दे रै सांवरिया,  
 रै रै चाल भला की ॥८॥  
 गांव भला में चित नहि लागे, चित लगा दे रै सांवरिया,  
 रै रै गांव भला में ॥९॥  
 जीवा को म्हे भेद न जाण्यो, अब समझादे रे सांवरिया,  
 रै रै जीवाको म्हे ॥१०॥  
 थारा बालक सारा म्हे छां, लाज रखा दे रे सांवरिया,  
 रै रै थारा बालक ॥११॥



स्वदेशी व्यवसायों का उत्साह बढ़ाइये !

हमारे यहां—

शर्टिंग, कोटिंग, पेचा, पगड़ी, साफ़ा, धोती जोड़ा,  
साड़ी, छींट, बायल, मलमल, क्रेप, तोलिया,  
लिहाफ़. सर्ज, मौज. बुनियान, चादरें,  
पलंग पाश, बनारसी साड़ियां, ज़ीन  
शुद्ध खादी, रेशमी, ऊनी. वगैरः

सब शुद्ध स्वदेशी ठीक और निश्चित भाव से मिलेंगे

एक बार अवश्य पधारिय और देखिय कि  
स्वदेशी कपड़े ने कितनी तरक्की की है ।

पता:—

राजस्थान स्वदेशी स्टोर्स,

जौहरी बाजार, जयपुर ।

मकान की सुंदरता के लिये

सीमेंट की बनी

जाली, गुलंबर, नल आदि

हर तरह की तस्वीरें तथा

और भी कई तरह का सामान

हम से लें

गन्नालाल बालमुकंद,

किशनपाल बाजार, जयपुर सिटी

फोटोग्राफी व हाथ के दर्शनीय चित्र,  
थियेटर रामलीला के परदे, खुशनुमा  
साइनबोर्ड, काचके शिन्नापद मोटोज़,  
पीतल व लकड़ी के हर्फ, चपरास  
आदि की खुदाई, और जलों पर  
किराये के कपड़े के मोटोज़  
के लिये

हमें आर्डर दें

भारत पेंटिंग एण्ड इन्डस्ट्रियल वर्क्स,  
आर्यसमाज, जयपुर सिटी



सदा के लिये आपकी यादगार !

आपके साक्षकी बात

सुंदर फोटो

फोटो का व्यवहार सामान

पांच मिनट फोटो ग्राफी

हर तरह के कैमरे

तस्वीरों पर सुंदर फ्रेमिंग

अच्छे और सस्ते चाहें तो

हमें आर्डर दें

बद्रीनारायण श्रीनारायण फोटोग्राफर

त्रिपोलिया बाजार जयपुर सिटी

बालबन्धु बन्नास्त्रिय, किसानबाजार बाजार जयपुर ।

74  
बरत पैलो ]

[ वानगी आठवीं ]

# जीवनकुटीर का गीत

माहवारी पोथी

युवकों की प्राप्ति ॥ २०००



विक्रयस्थल—

जीवन-कुटीर, वनस्थली

पो० अॉ० निवाई [ जयपुर स्टेट ]

दाम एक पोथी का	} दिसंबर	} दाम एक बरत का ॥॥)
चार पीसा		



## यहाँ से लीजिये

१. सच्चा टाइम देने वाली घूषघड़ी ।
२. हर तरह का इमारती पत्थर का सामान ।
३. हर तरह की इमारती उलझन के लिये अच्छी मुफ्त सलाह ।

**वर्मान कम्पनी**

किशनपोल बाजार, जयपुर सिटी

**मकान की सुंदरता के लिये**

**सिमेंट की बनी**

जाली, गुलबंद, नल आदि

हर तरह की तस्वीरें तथा

और भी कई तरह का सामान

**हम से लें**

**गन्नालाल बालमुकंद,**

किशनपोल बाजार, जयपुर सिटी

## दिवाली को राम राम



(पाछला ५-७ महीनां सूं वनस्थली क्षेत्रमें बड़ीभारी गड़बड़ चाल रही छै-ऊँनै ठीक करवा के वास्तै यो दिवाली को 'रामराम' लिखयो छै सो ई बानगीमें देदियो छै जींसूं बाहरका लोग जीवनकुटी का कामको ओर ऊंकी मुसकलांको अन्दाज करसकै । यो 'रामराम' विना पढ्या लिख्या देहायां के वास्तै लिखयो गया छै सो याद रैणी चायजे । ई सूं म्हाको गांध हालां सूं बात करवा को तरीको भी मालूम होजासी 'रामराम' का बड़ा होबासूं गीत कम आसक्याछै सो कसर कदे म्हे फेर काड देस्यां)

साडा पांच बरस हुया जद म्हे म्हांका घरवार अर आरामनै छोडर निवाई परगना का वनथली गांवमें आवस्यां म्हे या विचारी छीक बारला गांवमें पिरजा दुःख पावै छै वा दिनरात काम करैछै, फेरभी ऊंका पेट नै रोटी और तन नै लत्तो कोनै मिलै । कोई दायकर आपां पिरजाको दुख बटासकां तो आपणो मिनख जमारो सुफल होजावै । ई भलाई का काम कै ताई म्हे मांगतांगर रुप्या पीसा



को सतूनों लगायो और मिल्या जतरा साथी त्यार करचा। सब सूं पैली म्हे खेती करबा को बिचार करचो-या देखबो धाम्यो क देखां खेती कुमाई में पालती की पैदावार बदबा की तजबीज आपणौ सूं बैठजावै काई। दूजी बात म्हे या बिचारी क आस पास का गांवां में चोखा सांड ल्यार छोड़ां जीं सूं पालती नै घर बैठ्यां मेला का बलद मिल जावै। तीजी बात म्हे या बिचारी क पालती नै खेती का काम सूं थोडो भोत सराव जरूर मिलै छै—जे हो तो ऊं सराव का भगत में पालती नै आप को कपड़ो घरको घर में त्यार करबो सिखा द्यां। जी सूं म्हे पींदबो कानबो अर बणाबो तकात सिखाबा को सतूनों बैठायो। म्हे या सांची छी क पालती बणाबो भी न सीखै ला तो हाल पींद कातर आपका कपड़ा लायक सूत तो त्यार कर ही लेला—जी सूं वांकै बणाईका पीसां में कपड़ो हाथ लाग जाय-लो। चोथी बात म्हे या बिचारी क गरीब पालती ऊंन असमाद में दुवाई कै तोड़ै भोत दुख पावै छै और भोत सा तो मर भी जावै छै—सो यां पालत्यां नै कैबा कै साटै दुवाई मिलणी चायजे और आपणौ सूं बणौ जतरी बंदगी भी यां की करणी चायजे। लंबर पांच में म्हे या बिचारी क पालती नै स्याब तिस्याब न आबा सूं वो

ठिगा जाय छै—जे हो तो रातका समा में पालती का लड़कां नै पडा लिखार हुशयार कर दिया जावै। छुटी बात म्हे या बिचारी क पालती नै मोका सिर राज हासिल बीज अर नाज न मिलबा सूं भोत दुख पाणो पड़ै छै सो आपां बीच में पड़र पालत्यां की एक पंचायती बणार ऊंनै कपती व्याज पर रुपया उधार दिवा द्यां सो पालती को यो काम भी बण जावै। अतरी भली बातां बिचारी और साथ में या भी बिचारी क राज काज का काम में नहीं पड़णो तथा और भी सब तरै का टणटा बखेड़ा सूं दूर रैणो।

दीख बा में तो या दीखै क पालती नै आपकी भलाई की ये बातां दांतां सूं पकड़र राख लेणी चायजे। पण पालती में अतरी ही अकल होती तो ऊंकी आज या दुरदसा ही क्यों होती—और म्हांनै यां भाड़ां में आर उलभबा की जरूरत ही क्यों होती? पालती जतरो बाबलो छै उतनो ही वो आपनै स्याणो समझै छै, जतरो मूरख छै उतनों ही आपनै अकलभादर समझै छै। और एक बात या भी छै क पालती की कुमाई सीत मांत में हजम करबाला ऊंका भोत सा बेवारी छै—पालती नै वां बेवारचां सूं दबर चालणो पड़ै छै—और पालती चावै



चाहे न चाहे ऊँनै बांकी बात भी मानणी पड़ै छै । सो म्हे कोई गांव में दो च्यार आदम्यां नै कोई सी भली बात समझार तयार करता—जद पैली तो बाबला पालती आप ही म्हांकी बातों को म्हांकी पीठ पछाड़ी ऊँलो अरथ लगार बैठ रैता—और ई में क्यों कमर रैती तो पालती की कुमाईका गायक वां नै बैकार म्हांकै खिलाफ कर देता । या खींचातांण बरसां ताई चालती रही । म्हांकी पडाई नै ऊँली पडाई बतादी, पींदबा नै पिंदारा को काम बता दियो, दुवाई में या खोड़ काडदी क ये तो दुवाई ले जका नै रोटी कोनै खाबादे—सो आदमी भूखां मरतो ही मरजावै छै । सब सूं जबरी बात तो या उडा दी क ये तो आगिया मत का छै अर सब को धरम बिगाड़ता फिरै छै—और या भी उडादी क ये गंदीजी का आदमी छै और ये ही सूँघाई करदी—और या भी उडा दी क ये पालती नै राज सूं लड़ार आप तो भाग जायला और पालती नै फंसा जायला । म्हे यां बातों में सूं एक सूं भी कोनै घबराया—क्योंकर म्हे तो जागै छै क झूठ की दौड़ डागला ताई हो छै—ज्यो झूठी बातों उडी छै सो वै सब आप ही खतम हो जायली । म्हांका ई खयाल कै माफिक लोग धीरै धीरै समझवा लाग गया छै । पडाई को, दुवाई को,

अर पींदबा कातबा को, ये तीन्हुं काम ही चोखा चालबा लग गया छै और बनथली में लेण-देण की पंचायती के काम सुरू होगयो छो । लोग कदे जदे बिदक जायछा तो वांनै समझा बुझार वांकी दिलजमी म्हे करदे छै । एक ऐव म्हांका मिटावा सूं कोनै मिट सकयो—लोग म्हांनै भागवान समझता रिया और सबला भी—जीं सूं म्हांको डर अर लिहाज घणो मान्यों और म्हांनै आपकी भलाई चाधाला मामूली आदमी कोनै समझया सो म्हांसूं प्यार कमती करयो ।

च्यार पांच बरस ताई म्हे ई परगना की रचना देखी जद जाग म्हे या ब्योपाई क गरीब आदमी का घर में सरतन न हो जद भी दूसरां का दबाव में आर नुकता में मोकलो खरच करदे छै—और ऊं सूं फायदो कांई भी कोनै होवै । नुकता का कारण सूं घणां की जिमी जाग बिक गई और घणां भाई भागवान सूं कंगाल होगया । जीमवा जिमावा की बड़सी जोर पकड़ गई सो पिराणी को सराध तो क्यों करयो क्यों कोनै करयो—अर मरबा ला का नांव सूं पैली का जीम्योड़ां को करजो उतारबा लाग गया । म्हे नुकता की खंडना सुरू करी तो भला



आदमी घबराया—वै सांची और तो सारी बात मान लेभ्या पण यो नुकतो ज्यो आगा लग्गू सूं होतो आवै छै सो यो बंद कियां होसी । भला आदमी घबराया तो बुरा आदम्यां का दाव लाग गया—वै तो पिरजा नै पैली सूं ही बैकाता फिरै छै—अब तो वांकै एक तरै सूं मुदो पकड़ में आगयो । फेर भी लोग म्हानै भोत चावै छै भो वांकै कमती बची जची जद भी छोटा बडा तीन गांव नुकतो न करबा की और सिरफ सराध करबाकी म्हांकी बात मान ली और वां गांवां में कई मोकां पर नुकता कोनै हुयो । एक सराध का मोका में बनथली में थोड़ी कवा सुणी करणी पड़ी—सो कुछ लोगांका मनमें नाराजी पैदा हुई और वै लोग यो पैको उडा दियो क जीवनकुटी हाला तो सैकार सभा (लेण देण की पंचायती) हालां नै एक प्याला सूं शरबत पादियो । नुकता की बात सूं आस पास का गांवां में खल बली तो मान ही मेली छी—और लोगां का मन में सूं एक मेक करबा को बैम भी पूरो कोनै निकल चुकयो छै—सा शरबत का प्याला को पैको बीजली की जीयां फैल गयो—और लोग ऊंनै सांचो ही मान बैठ्या । पैको उडाबाला उडायो छै जीवनकुटी को और सैकार सभा को नुकसाण करबा बेई—पण वो तो सारा गांव पर ही

उलट पड्यो । सारी बनथली का आदम्यां की प्यालो पी लेवा की बात फैलवा सूं मव का हुका—तमाकू बंद होबा लाग गया । अब बनथली हालां की हीमत टूट गई—वै भूंठो पैको उडाबाला को मुकाबलो कोनै करचो—उलटा डरपगया और सारो दूसण जीवनकुटी कै माथै मंढदियो । बनथली हाला कैवो सरू कर दियो—क्यों आपणा गांव में जीवनकुटी बसती, क्यों नुकता बंद होबा की बात होती, और क्यों आपणै यो कालो लागतो । इयां बिचार वो कुटी पर अन्याय करवो हुयो । बनथली हाला चाता तो वै नुकता का बारा में कुटी नै साफ कै देता क और बातां तो म्हे मानी पण नुकता की बात कोनै मानवो चावां म्हांकी आकाय कोनै । (म्हांकी कुटी हालां की भी एक गलती हुई और वा या क म्हे बनथली हालां को विमवास कर लियो—म्हानै सोचणो चायजे छै क बनथली हाला हामल भरै छै पण यां सूं या बात निमबाली कोनै) । ज्यां दिनां में पैको उड्यो वांहीं दिना में म्हे लोग कुटी हाला कुटी कै भीतर एक बीमार की टैल में लाग रिया छै—आखर ऊं बीमार नै परमातमा उठा लियो और म्हे च्यारूं मेर की रचना देखी तो सारो नकसो ही बदल चुकयो छै—लोग मान चुक्या छै क कुटी हाला सांच्यां ही



(५)—जीवनकुटी को सुंघाई मैगाई की बात सु क्यों भी तालको कोनै—सुंघाई होवा का कारण दूसरा ही छै—जीवनकुटी को करयोड़ी सुंघाई मैगाई क्यों भी कोनै हो सकै ।

(६)—जीवनकुटा न कोई को धरम बिगाड़ै न कोई नै एक मेक कर । जीवनकुटा सारी पिरजाकी भलाई करबो चावै छै—सो सब नै दुवाई दे छै, सब नै पडावै छै, सब न कातबो पींदबो सिखावै छै । जियां आर लोग आपका काम बेई चमारकै घर जाय छै- जियां ही जीवनकुटी हाला भी जाय छै—जियां और लोग चमार कै साथ बैठर खेती कुमाई को काम करै छै जियां ही जीवनकुटा हाला भी पडावा को अर सिखावा को काम करै छै । जीवनकुटी हाला जीका हाथ को पाणी पी सकै ऊंका हाथ की रोटी खा सकै छै । जीवनकुटी हाला छुवाछूत का या खाण-पीण का बारा में जोरी करबो तो दूर काई भाई सुं नीवा सी बात भी कोनै करै । शरबत का प्याला की बात ठेठ सुं लेर ठेठ ताई झूठी छै—असी झूठी बात चलाबालां को और मान लेबालां को—सबको रामजी भलो करै । या बात सांची छै क म्हे सहर सुं आयोड़ा पढ्या लि या

आदमी छां सा गांवां में ज्यां छोटी मोटी बातां नै घणी जबरी मानै छै—वांनै म्हे फालतु और झूठी समझां छां । गांव का आदमी भूत परेतां सुं घणा डरपै—पण म्हांकी निगा में भूत परेत होता भी होसी तो वै आदमी को क्यों बिगाड़ कोनै कर सकै । इयां ही केई आदमी क्यों जाणै न बूझै पण मूठ्यां ही सि बगार झाड़ा झपटा देर भोली दुनिया नै ठिगता फिरै छै—म्हे वां स्याणां की बात गांवां हालां की जियां कियां मान ह्यां ?

(७)—जीवनकुटी या चावै छै क विरामण पिरजा में भली बातां को परचार कर, बोरा आपकी भलाई की साथ साथ पालती की भलाईको भी यान राखै, पंच जातकी भलाई करै और आप की जात का निमला पातला भायां नै भी निमावै, पटैल गांव का गुवाल छै सो गांव की भलाई करै और आप का स्वारथ कै साटै गांवनै पींदै न बैठवै । विरामण सुं, बोरं सुं, पंचां सुं और पटैलां सुं म्हे या भलाई की बात चावां छां तो काई बेजा करां छां ? म्हे



शरबत को प्यालो पार सबनै एक मेक कर दिया । म्हे दुखी तो छा ही—सो चुप चाप सारी रचनानै देखबो करचा—म्हे या ही सोची क अस्या मौका में लोगां नै समझावा बुझावा सूं क्यों भी कोनै हाणो जाणो ।

प्याला की बात नै अब ६-७ महना सूं ज्यादा होगया । होली पाछे दिवाली आगई । सो म्हे अब सब लोगां की जाणकारी के वास्तै जीवनकुटी की सांची सांची बातां की या पोथी छुपाई छै । वै सांची सांची बातां ई माफिक छै:—

(१)—जीवनकुटी गरीबां की भलाई के वास्तै बणी छै—जीवनकुटी में धन कोनै गड्यो । जीवनकुटी चंदा का पीसां सूं चालै छै । दुनियां चन्दा का पीसा सूं क्यों डरपै ? जीवनकुटी में सदाबरत तो बटै कोनै—कोई खरो काम करदे तो कुटी में सूं खरो पीसा मिल जाय । चंदा का पीसा सूं डरपै ज्यांनै चायजे क वै कुटी सूं सीतमांत में क्यों भी न चावै और बांकी सरदा हो तो भलां ही कुटी की मदत करै ।

(२)—जीवनकुटी में वै आदगी बसै छै ज्यो आपको आराम

छोडर गरीब की भलाई की खातर तकलीफ भोगबो चावै छै ।

(३)—जीवनकुटी की राय में राज को अर पिरजा को भलो न्यारो न्यारो कोनै—सो जीवनकुटी तो राज की अर पिरजाकी दोन्यांकी भलाई चावै छै । ज्यो हाकम ऐलकार रिसबत ले छै या और तर सूं पिरजा नै सतावै छु वै परमात्मा का अर राज का दोन्युं दरबारां का कसूर वार छै ।

(४)—जीवनकुटी का काम भली बात सुणावा को छै—चोरखो गैलो बतावा को छै । ज्यो सुणावो चावो सुणो, चोरखै गैलै चालवो चावो चालो—नहीं तो आपकी राधा नै याद करो । जीवनकुटी न जोरी करवो चावै, और न जीवनकुटी कनै जोरी करवा बेई फाज पलटण को इन्तजाम । जीवनकुटी आप का कैवा की सब बातां कैदी—करवाकी करदी—आयन्दा म्हांको भोत कमती बोलवा को विचार छै—कुटी का लिहाज सूं ईसान का तौर पर कोई काम होसी तो बेकार छै—यां नै कुटी के सांकड़ो आणो होभी वै सोच समझर आपकी खुसी सूं आसी—जद ही भली होसी ।



तो या ही जाणा छा क भलाई कै रस्तै चालवा सुं वां को भी भलो ही होसी । और वै भलाई का गैला सुं दोरा छै तो वांकै जचै जियां करो । जीवनकुटी सुं बैर करवा को तो काम ही कोनै ।

(८)—जीवनकुटी की राय में नुकतो सासतर कै खिलाफ छै, आगा लगा सुं कोनै होतो आयो, बार बीच का दिना सुं नुकता को रिवाज चाल्यो छै, कोई सराध करै तो जीवनकुटी की तरफ सुं भलांही करै । पण बड़सी का बेवार साधवाला नुकता नै तो जीवनकुटी पाप ही समझै छै । पण जियां और कामां में जोरी को काम कोनै जियां नुकता में भी जोरी को काम कोनै—ज्यांनै नुकतो करणो ही छै वै म्हांकी तरफ सुं दस मण करता भलाई सौ मण करो ।

(९)—यो सारो बैदो ई कारण सुं फैल्यो छै क लोग कुटी की साथ सांचा कोनै रिया—म्हांनै भूंछ्यांही राजी करबो चाया—आपणी भूंछु को फल यो पैदा हुयो छै—पण चाहे इतनो बैदो फैलर ही मालूम पड़ी—आखर आपणी सांच को उजालो तो हो गयो ।

म्हे ५-७ महना सुं म्हांको मूंडो सीर बैठ्या छा और दुनियां की सैल देखै छा । आज ये सांची सांची असल बातां सबनै बतादी छै—ज्यो भाई सांची समझो सो मानो, भूंठी समझो मत मानो । जीवनकुटीकी कैण सारु चालवा में फायदो दीखै तो चालो, नुकमान दीख तो मत चालो । जीवनकुटी पालती की भलाई कै वास्तै बणी पालती की भलाई कै वास्तै ये भूंपड़ा ऊवा छै और जतरै वो गोप्यांको नाथ निभासी जतरै ऊवा रंसी । जीवनकुटी हाला दुनियां भर का संकट झेलवानै कमर कस राखी छै सो अस्या बभ्या पैकां सुं कोनै घबरावै । पालती लाग ! ये ऊंडो हेरो करा, जीवनकुटी को बिसवास करो अर जीवनकुटी कै सांकड़ा आवो ई में थांकी सारी तरै सुं भलाई होसी । दोनो पालती जायाकी—गरीब जायाकी—जय बोलो !! बस ई में जीवनकुटी की तरफ को 'दिवाली' को राम राम मानज्यो, घणा मान सेती । यां ही बातांको एक रसियो सुणो—



## ॐ सूली बात ॐ



समझो सारी सूली बात कुटी नै अपणी समझोजी ॥  
 म्हानै अपणा सेवक समझो, मतना समझो गैर ।  
 सुणी सुणाई बातांकी थे, क्यों लागो ह्यो लैर ॥ १ ॥  
 अपणा मन में हेरो करल्यो, राख धरमकी आण ।  
 साडी पांच बरसमें थांको, कस्यो करचो नुकसाण ॥ २ ॥  
 थांकी खातिर कुटी बणी छै, भलो करै परचार ।  
 म्हांको स्वारथ कांई दीख्यो, करल्यो खूब विचार ॥ ३ ॥  
 थांका भोला पण सूं लागै, कई ठिगां का दाव ।  
 वै ही म्हानै बुरा बतावै, यो ही सूदो न्याव ॥ ४ ॥  
 भली भांत व्योपाल्यां पैली, फेर सिखावां ग्यान ।  
 थानै चोखो लागै जद तो थे भी लेवो मान ॥ ५ ॥  
 थांका मन नै खोटो लागै, ज्यो कोइ म्हांको काम ।  
 वे धड़कै नटजावो थे तो जोरी को नहिं काम ॥ ६ ॥  
 फूंक पराई सूं मत बाजो, निज को करो विचार ।  
 आछी बुरी नितारो नीकां, फेर करो निरधार ॥ ७ ॥  
 पडै जकां नै फिरां पडाता, जतरी सी आकाय ।  
 ज्यांनै पडवो खोटो लागै, वां सूं जोरी नांय ॥ ८ ॥

घरमें कात्यो सूत सदा सूं, रेजा लिया बणाय ।  
 घरकी घरमें रूई पींदो, पीसा घर रै जाय ॥ ९ ॥  
 ज्यांनै पींदण खोटो लागै, वां पर कस्यो दबाव ।  
 म्हे कां जद भी थे मत पींदो, जै समझो अटकाव ॥ १० ॥  
 म्हां सूं जतरी बणै बन्दगी, करां दुवाई देर ।  
 ज्यांनै बुरी दुवाई लागै, क्यों पछतावै लेर ॥ ११ ॥  
 कैदे ज्यांनै सांड मंगाद्यां, कोनै मांगां मोल ।  
 ई सैं भी नुकसाण होय तो, कैद्यो हिरदो खोल ॥ १२ ॥  
 हारच्या नमला जका पालती, वांकी सभा बणार ।  
 देर जामनी रुप्या मंगाद्यां जींको चैन अपार ॥ १३ ॥  
 सभा कनै जद रकम होय तो, खोलै एक दुकान ।  
 पूरो तोलै सूंघो बेचै, नफो लेर उनमान ॥ १४ ॥  
 सभा और दूकान मांय भी, जे कोई गलती होय ।  
 दोन्यां सूं दूरा थे रैवो, जोर करै नहिं कोय ॥ १५ ॥  
 नुकतानै म्हे पाप बतायो, घणो बडो नुकमाण ।  
 विना सलीकै काम करो थे, आवै बोलो पाण ॥ १६ ॥  
 म्हांकी कैण बुरी ज्यो लागै, आवै कोनै दाय ।  
 दूणा नुकता करो भलांई, म्हांको कांई जाय ॥ १७ ॥  
 जींको ल्यायो पाणी पील्यां, समझो म्हांकी कैण ।  
 अछुंवांई सूं करै जद्यां तो, ऊंकी रोटी लेण ॥ १८ ॥



सुंघाई कग्वालां कैवै, कदे आरिया लोग ।  
 एक मेक करवाकी कैवै, वै सब झूठा लोग ॥१६॥  
 शरबत का प्याला को पैको, सुणल्यो चेतो देर ।  
 बलयां मर्या सो खूब उड़ायां, झूठो च्यारचूं मेर ॥२०॥  
 चंदा का म्हे पीसां ल्यावां, बम्या गांवमें आर ।  
 परमारथ को काम करां म्हे, समझो सोच विचार ॥२१॥  
 दीन दुखी का लागू बोला, फैलया च्यारचूं मेर ।  
 वां सबनै म्हे दुसमण लागं मरम समझल्यो हेर ॥२२॥  
 झूठा सांचा मेल मिलावै, करता फिरै कुनांव ।  
 भोला ढाला मिलै पालती, लागै झटसी दाव ॥२३॥  
 वां दुष्टां की सब बातां नै, करस्यां म्हे बरदास ।  
 सत्को गैलो म्हे पकड्यो छै, होस्यां नहीं निरास ॥२४॥  
 ये ही म्हांकी सांची बातां, ध्यान धरो सुरग्यान ।  
 थे भी यांनै सांची समझो, भलो कर भगवान ॥२५॥

जीवनकुटीर वनस्थली

पो० निवाई (जयपुर राज्य)

हीरालाल शास्त्री.

दिवाली सं० १६६१ वि०

## गरीब की दिवाली

म्हांकै झूठो आज उछाव दिवाली फेरयूं आईछै ॥  
 हंसी खुसी को करां दिखावो, म्हांका दिलमें घाव ।  
 खावा ताई रोटी कोनै, कांसू करां उछाव ॥१॥  
 म्हांका घरमें वसै दिवालो, फेर दिवाली आय ।  
 मिलकर पाछीजाय दिवाली, छोड़ दिवालोजाय ।२।  
 म्हांकै दिलमें घोर अंधेरो, राज करै अग्यान ।  
 दीवाली का दीया जोयां, मिटै नहीं अग्यान ॥३॥  
 लिछमीजी नै म्हे पूजां छां, तोभी लिछमी दूर ।  
 ज्यो लिछमीको नांव नही ले, वांका घर भरपूर ।४।  
 लीपा पोतो करां मोकलो, घर ल्यां भाड बुहार ।  
 मनको मैलो जाय नहीं जद, कियां होय उद्धार ।५।  
 म्हांकै बेई काई ल्याई, करदे वार दिखाव ।  
 रीत परीती फिरती डोलै, करती फिरै कुनांव ।६।  
 होली आर दिवाली आवै, फेरयूं होली आय ।  
 पंली सिरकां लादां कोनै, छीजै म्हांकी काय ।७।  
 कोई साखां भेली कोई, घास भेल दियो आर ।



छोटी मोटी बातें साटै, घणों हुयों तकरार ।  
 एका सूँ ही काम वणै पण, एको चाल्यो भाग ।  
 लिछमी ! थोड़ी मदद करैजद, लागै म्हांको थाग ।  
 एकोडी तो लिछमी रूसी, हुई सुरसुती पार ।  
 लिछमी और सुरसुती खोई, ल्यावै वो करतार ॥०॥

### गणपत लाडला ।

आओजी विन्दायक गणपत लाडला गढ़ रणत भँवरसैँ  
 स्योशंकर तो पिता आपका, अन्नपूरणा मात ।  
 सबसुँ पैली आप पधारो, धरो दयाको हातजी ।१।  
 एकदन्त प्रभु दयावंत छो, मूसा का असवार ।  
 विघनहरण कर मंगल करज्यो, करज्यो वेडा पारजी २।  
 बुद्ध आपकी घणी बडी छै, मैमा अपरंपार ।  
 म्हांकी बुद्धी निरमल करज्यो, अरजी वारंवारजी ।३।  
 आप गजानन रिध सिध दाता, भक्तांका प्रतिपाल ।  
 दीन जनांका कारज सारो, और करो संभालजी ।४।

पिरजा गण म्हे विखरचा डोलां, गण का राजा आप ।  
 एक डोरमें म्हांनै ल्यावो, जद जांणां परतापजी ।५।

### जलसाकी मस्ती

जीवनकुटी में चाल म्हारी लैरां,  
 सैल दिखाल्याऊं जलसा की ॥१॥  
 काम काज छोड्या चाल म्हारी लैरां,  
 सैल दिखाल्याऊं जलसा की ॥२॥  
 सैलकी भी बात छै र कामकी भी बात छै,  
 सैल दिखाल्याऊं जलसा की ॥३॥

नाच म्हारी साथण कूद म्हारी साथण, सैल ॥४॥  
 सांकडा की आसी आंतराकी आसी, सैल ॥५॥  
 मोटो ही घघरो मोटी ही साडी, सैल— ॥६॥  
 मोटी ही अगिया मोटी ही कुड़ती, सैल— ॥७॥  
 पीदबो भी सीखां कातबो भी सीखां, सैल— ॥८॥  
 विगडी र अपणी दसार सुधारां, सैल— ॥९॥



## बालकाँ की प्रार्थना

म्हां जस्या यां बालकां की, नाथ ! बेग सुणाइ हो ।  
 म्हांका दिल में जन्मभूमी—नेहकी सरसाइ हो ॥१॥  
 नाथ ! म्हे बलवान होवां, और विद्यावान भी ।  
 सुद्ध म्हांका आचरण हो, नीत मांय भलाइ हो ॥२॥  
 मान राखां म्हे बडां को, प्यार छोटां सुं करां ।  
 सांचली म्हां में बिनै हो, सांचली नरमाइ हो ॥३॥  
 देसको अभिमान हो, अर मर्दभी की आण भी ।  
 भै नहीं हा म्हांका दिल में, भादरी मरदाइ हो ॥४॥  
 लोभ म्हांं सुं दूर रैवै, राग रोस विदा करां ।  
 ज्यो भलाई बगती आवै, एक वाहि कुमाइ हो ॥५॥  
 धर्मको म्हे सार समझां, छोड़ अन्ध परम्परा ।  
 सांच लो म्हे धर्म पालां, दम्भ दोस विदाइ हो ॥६॥  
 भेद भाव निकाल कर म्हे, एकताको भाव ल्यां ।  
 विस्व बंधो ! म्हांका दिल में, प्रेमकी प्रभुताइ हो ॥७॥

फोटोग्राफी व हाथ के दर्शनीय चित्र,  
 थियेटर रामलीला के परदे, खुशनुमा  
 साइनबोर्ड, काचके शिक्ताप्रद मोटोज,  
 पीतल व लकड़ी के हर्फ, चपरास  
 आदि की खुदाई, और जल्सों पर  
 किराये के कपड के मोटोज  
 के लिये

**हमें आर्डर दें**  
**भारत पेंटिंग एण्ड इन्डस्ट्रियल वर्क्स,**  
 आर्यसमाज, जयपुर सिटी

**सदा के लिये आपकी यादगार !**

आपके लाभकी बात

**सुंदर फोटो**

फोटो का तय्यार सामान

पांच मिनट फोटो ग्राफी

हर तरह के कैमरे

तस्वीरों पर सुंदर फ्रेमिंग

**अच्छे और सस्ते चाहें तो**

हमें आर्डर दें

**बद्रीनारायण श्रीनारायण फोटोग्राफ**

त्रिपोलिका बाजार जयपुर सिटी





म्हे खूब उतावल करवो चाई जदभी छपाई को ठीक परबंध न होवासँ या आठमी बानगी देरसँ निकली है । अब म्हानै ज्यो च्यार बानगी और निकालणी है बांकी छपाई को म्हे खास परबंध करवो चावां छां—बाकी की च्यारचूं बानगी म्हैनांकी म्हैनां काने नीकलसी और छपाई का सुभीता के माफिक एक या दो बार में निकाली जासी । जसी एकाध बानगी टेप सँ पाछे निकलसी बसी दो एक बानगी टेपसँ पैली नीकल जासी । च्यारचूं बानगी गायकां काने पूगती जरूर करदी जासी । एकाध गीतकी छपाई में ज्यो गलती रैगी है वानै सुधार लेणी चायजे ।

हीरालाल शास्त्री.

बालचन्द्रयंत्रालय, किशनचौल बाजार जयपुर ।

जीवन कुटीर का गीत

[ माह्वारी पोथी ]



प्रकाशक—

जीवन-कुटीर, वनस्थली

पो० आ० निवाडे [ जयपुर स्टेट ]

दाम एक पोथी का  
द्वयार पीसा

जनवरी १९३५

दाम एक बरस का ॥॥  
डाक मंसल न्यारो



## जीवनकुटी में सन् १९३४ ई.

जीवन कुटी की तरफ़ सूँ ज्यो परमारथी काम कर्यो जाय छै ऊँका सारा हाल चाल को पोथी म्हे सदा साल छपावो कराँ छॉ । पोथी त्यार करवा में कई दिन लाग जावो करै छै और ऊँकी छपाई में भी नरो सारो खरच बैठ जाय छै । ई वास्तै अबकी बार म्हे म्हाँ का मन में सालीना पोथी छपावा की मोल ही राखी । गीताँ की बानगी में म्हे क्यों न क्यों लिखवो कराँ छॉ सो या बिचारी क सन् १९३४ ई० को थोड़ो भोत हाल-चाल ई बानगी में छपा देवा सूँ काम चल जाय लो ।

म्हे म्हाँका काम नै परख को तौर पर कराँ छॉ या तो जीवन कुटी नै जाण वाला सबी लोगाँ नै मालम छै । परमारथी काम कर वाला लोगाँ को ध्यान गाँव की तरफ़ पूरो पूरो कोनै गयो—सो गाँव में काम करवा की गत विध भी लोगाँ नै हाल ताँई कमती ही मालम हुई छै । म्हाँका बूता सारू म्हे यो विचार कर्यो छो क देखाँ



गाँव में कस्या २ काम नै कियाँ कियाँ करवा सूँ काँई काँई नतीजो नीकलै । पैली म्हे या सोची छी क बरस पाँचेक में भोत सारो निचोड़ नीकल्या बैलो । पण गया उन्हाला में पाँच बरस होगया जद म्हाँ नै निचोड़ नीकलवा का काम में कसर दीखी और जद ही म्हे यो विचार कर लियो क ई काम में हाल तीन बरस और लगाणा चाय जे । पाँच बरस का काम की पोथी म्हे हिन्दी-अंग्रेजी दोन्यां में छपा चुक्या छँ अब तीन बरस और हो चुकैला जद म्हे म्हाँ की पूरा आठों साल की परख को नतीजो दुनियाँ के सामने पेश कर देवाँ ला ।

सन् १९३४ ई० को साल म्हाँ कै वास्तै बड़ो मज़ादार नीकल्यो । सन् १९३३ ई० का अखीर का दिनां में म्हे नुकता कै खिलाफ परचार सरू कर दियो छो और ऊँ काम में म्हे पैँड दो पैँड आगे भो चल नीकल्या छ । नुकता बन्दी को काम मुसकल तो छो पण म्हाँ नै या दोखवा लागगी छी क ई काम नै मर पचर आपां क्यों तो पार पटक ल्यांला । पण म्हाँ का चालता काम कै अणा चुको ही एक जोर को टोरी लाग गयो जीं को हाल म्हे पाछली बानगी में छाप चुक्या छँ । म्हे म्हाँका कोई सा काम नै भी जाँत पाँत का आसरा सूँ करबो को नै चायो । कोई जात की पंचायती की मारफत नुकता

बन्दी को काम कोनै छेड्यो । म्हे तो म्हाँका परचार का गाँवाँ में आमतौर सूँ नुकता कै खिलाफ आवाज उठाई—और लोग ऊँ आवाज नै सुणी भी । पण आस पास का गाँवाँ नै या बात न सुवाई जद वै म्हाँका गाँवाँ की अलग २ जात नै काबू में लेबा को विचार बाँध्यो—अर वाँ की या पेस बन्दी पार भी पड़ गई । म्हाँका गाँवाँ ला लोग म्हाँका कै वासूँ नुकतो बन्द करबो चाबा लाग गया छ—कई बन्द करभी दियो छो पण जात का तोफान नै लोग बरदास को नै कर सक्या । नुकता कै आडी बाँध्योड़ी म्हाँ को पाल तो टूटगी—जद भी थोड़ा भोत आदमी हाल तक कायम छै । नुकता का रिवाज की जद काँई सहर में अर काँई गाँव में घणी ऊँडी गई हुई छै—सो ऊँनै उपाड़वा में बखेड़ो फैल्याँ बिना काम नहीं चालै । ई बारा में जितरी बातां म्हाँ का मन में छै वां सब को जिकर करवा कै वास्तै तो घणा कागद काला करणा पड़ै । मोटी बात कैबा की या ही छै क नुकता बन्दी का परसङ्ग सूँ लोग कुटी कै बहुत खिलाफ होगया छ—और म्हाँ का अब तक का काम में नुकसाण होतो हुयो दीखवा लाग गयो छो । पण अब जार या मालम हुई छै क ज्यो लोग भूँठा पैकाँ का कारण सूँ खिलाफ हो गया छ वै अब साँची बाताँ



सुणबा सँ भोत माफिक भी होगया और अतरा रोला बैदा सँ म्हॉनै असल में भोत फायदो हुयो ।

लेण देण की एक सभा तो सन् १९३३ ई० में सरू हो गई छी—दूसरी सन् १९३४ में सरू हुई । पालती की हालत च्यारयूँ मेर सँ खुराव हो रही छै—सो सहकार सभा चलावा कै वास्तै पूँजी दूसरा आदम्याँ कनै सँ जुटाणी पड़ै छै । बस यो एक बड़ो विघन छै और यह बात सहकार सभा का असली कायदा कै भी खिलाफ छै । म्हाँ की बणायोड़ी दौन्यूँ सभावाँ को काम चोखो चाल रिघो छै—और या सोचो जा सकै छै क याँ सभावाँ का कारण सँ पालती नै भोत फायदो हो सकै छै । पण दुनियाँ की बन्दगी करवो चावाला म्हाँ जस्याँ फकड़ आदम्याँ का माथा पर पैला का रुप्याँ को बोभो रैवो पार पड़वाली बात कोनै दीखै । यो काम राज की मार-फत स्यात नीका चालै—और साँच्याँ ही तो जद चालै क क्यों तो पालती समझदार होर आप का फालतू खरच नै कम करदे और क्यों आपसरी में आप की पूँजी जुटाले और पैला की पूँजी कै भरोसै ज़्यादा न रैणो पड़ै । म्हे यो काम छेड़ राख्यो छै—सावधानी सँ चालरियाँ छाँ—नतीजो नीकलसी सो सब कै सामनै पेस कर देस्याँ ।

दुवाई को काम—चोखो चलतो रियो । गाँव का आदम्याँ नै दुवाई की बड़ी भारी जरूरत छै—और बाँके वास्तै यो परबन्ध जरूर करवा जस्यो छै । दुवाई देवाँ सँ ज़्यादा जरूरत बाँकी बन्दगी करवा की छै । और बानै साफ सुथरो रैवो सिखा बाकी छै । पण ई काम में भोतसा विघन छै सो गाँव में आर बस्या सँ ही समझ में आ सकै छै ।

नुकताबन्दी का परपन्च में फँस जावा का कारण सँ म्हे ई साल में दूसरा कामाँ पर कम ही ध्यान दे सक्या पीदवा कातवा को काम आप सँ आप चाल्यो जतरो ही चाल्यो—ऊँ को देख भाल म्हे अब सरू करस्या-म्हे या समझाँ छाँक यो काम अपणै आप भी ठीक ठीक चाल्यो होसी ।

बनथली समेत म्हे पाँच गाँवाँ में रात की भगत पढाई को काम करै छै । बनथली कै अलावा बाकी का च्यारयूँ गाँवाँ का लोग सरवत का प्याला का पैका मू डर पर पडवो बन्द कर दियो छो । बनथली में भी लड़का कम होगया छै । अब बनथली को हाल तो पैली सँ भी चोखो होगयो छै—दूसरो गाँवाँ का लोग भी अब पछतार पढाई कै वास्तै कैवो सरू कर दियो छै ।



म्हे दुबारा तो ई काम नै म्हां को सतूनो देख कर सरू करस्यौं ।

रुप्यो पीसो न मांगवा का कारण सँ म्हां नै थोड़ी भोत तकलीफ उठाणी पड़ी पण म्हाँ को काम तो चाल ही गयो । कुछ आदमी छोड़र चल्या गया पण रुप्या को मुसकल में ज्यो पाछानै ठैर सक्या वै ई काम कै वास्तै ज्यादा लायक बण गया ।

सन् १९३३ ई० का खतम होवा पर जीवन कुटी को जलसो जैपर स्हैर में हुयो जी सँ मालम पड़ी क लोग कुटी नै भोत चावै छै । फेर कुटी का पाँच बरस पूरा हुया जद १२ मई १९३४ नै एक जलसो बनथली में कर्यो जी में भोत सा आदमी जैपर सँ और दूसरी जगा सँ भी आया । दोन्युँ जलसा में म्हाँनै काम चलाऊ रुप्या भी मिल्या । ई साल में जैषुर कौन्सल का एज्युकेशन मेम्बर व डायरेक्टर एज्युकेशन भी कुटी देख वा पधार्या—तथा कुछ दूसरा राज का अफसर भी आया । म्हे राजै का अफसरौं सँ लिखा पढ़ी भी करी और या भी चाही क म्हाँका काम में राज की चोखी निगै होजाय तो गाव में रैवाला गरीब आदमी को ज्यादा फायदो होजाय । पण ई काम को कोई खास नतीजे हाल तक कोनै नीकल सक्यो । राज को ध्यान अस्या

कामा की तरफ मोड़वा में जोर भोत आतो दोख्यो—सो म्हे या देखाँछौं क आप एँ सँ बणै सो आपौं तो करता रां और कदे कदे राज नै भी याद दिवातारौं । राज कै जचसी तो निगै कर लेसी और न जचसी तो आपणो बस भी काँई चालै ।

म्हाँनै सारी उमर गरीब की भलाई को काम करणो छै । जियां जियां गैलो दोखतो जासो वियां वियां हीम्हे आगे पैड भर ताजा स्यां । अस्या कामा में मुसकल तो आवै ही छै पण मुसकलां को विचार करवाकी जरूरत कोनै । मुसकल आसी और म्हे पका आदमी होस्यौं तो मुसकल जियां आसी विया ही चली भी जासी । म्हाँनै जाण वाला लोगां की दया मया म्हाँ पर मोकली छै और म्हे कोई टण्टा बखेड़ा में न पड़ौं तो वा दया बणो ही रैणी चायजे । म्हांको यो विसवास छै क जतरै गाँव को गरीब आदमी आपको असली हालत नै न पिछाणै जतरै जगत की भलाई नहीं हो सकै । सो म्हाँ का मन में तो या एक ही लगन लागी हुई छै—और म्हाँ को विचार छै क जी बल होसी बीहो बल म्हे गरीब आदमी को आख्याँ खुलार छोड़स्यां ।

म्हे जाण बूझर ये थोड़ी सो बातों ही लिखी छै । और याँ दो च्यार पाना में ज्यादा आती भी कतरी सी



बात ? पूरा पोथो छपावाला ऊँ में सारो हाल नीका खोलर लिखवा को विचार छै । ज्यां भायाँ नै ज्यादा श्योक छै वै तो कुटी में आता रै छै और सारी रचना आपकी आख्यां सँ देखता रै छै । ज्या नै साँचो श्योक छै वै तो अब भी आता हो रैसी—म्हाँ को मदत भी करता ही रैसी । कदे कदे कोई मामला उलभ जाय छै अर म्हाँ की अकल काम न दे जद म्हे चलार भी कोई कोयां ने न्यूतो भेजर बुलान्यां छै । बार गई दिवाली कै आसपास भी दो च्योर खास आदमी किरपा करी छी—वाँकै सामने म्हे म्हाँको कच्चो चिट्ठो पेस कर दियो छो और वाँसूँ सल्ला करली छी और आयन्दा किया काम नै चलाणो सो तै करली छी ।

गाँव का गरीब आदमी की भलाई चावाला सब लोगाँ की मदत सू ही अस्या काम पार पड़ सकै छै । सो म्हे सब सूँ ही मदत की आस करां छै कुटी को अर कुटी का काम को आजकलवणो चोखो हाल छै और म्हे भोत मजा में छै याँ समाचाराँ सू म्हा का शुभचिन्तकाँ नै खुसी होणी चायजे ।

जीवन कुटी,  
जनवरी १९३५

हरिलाल शास्त्री

वरस पैलो बानगो नौवी

## जीवन कुटीर का गीत

### म्हे आज बोलां छं

( दुख पायोड़ी आतमा को कल्लाट )

दबी दबी आवाज सूँ म्हे आज बोलां छं ।  
नाक ताँई भर गया जद आज बोलां छं ॥१॥  
बोल्या बोल्या आज ताँई सारी रचना देखली ।  
देखता म्हे थापगा जद आज बोलां छं ॥ २ ॥  
पिसतां २ म्हां लोगांको अब तो चुरकट होलियो ।  
कल्लावै या आतमा जद आज बोलां छं ॥ ३ ॥  
मांयली तो मांय म्हांकै बारली बारै रही ।  
फाटगो यो कालजो जद आज बोलां छं ॥ ४ ॥  
टर्कटम ऊपरलो बोल्या विचला कै तो खुसी नगम ।  
निचला छं सो “दबे तो हम” म्हे आज बोलां छं ॥ ५ ॥  
चाली जतरै चाल लीनी अब कठा तक चालसी ।  
न दीखै या चालती जद आज बोलां छं ॥ ६ ॥  
गिणती में म्हे भोत सारा ताकत पण विखरी हुई ।  
ताको मोको देखता जद आज बोलां छं ॥ ७ ॥



जूती सँ चिथ जावै जद तो मांटी भी माथै चढ़ै ।  
 आखर तो छां आदमी जद आज बोलां छां ॥ ७ ॥  
 भोत होगी भोत होगी अब तो थे सन्तोख ल्यो ।  
 पाछै थे पछतावस्यो म्हे आज बोलां छां ॥ ८ ॥  
 उल्टैली जद थांका माथा ऊपर होकर जायली ।  
 देखो तो थे देखल्यो म्हे आज बोलां छां ॥ १० ॥

## बाण पड़ी या काँई

( पालती की लुगाई को घर का घणो नै मीठो ओलंभो )

एजी बिना बात थे डरपोजी,  
 पिया बाण पड़ी या काँई—

पिया जिन्द भूत नहिं होवै २  
 एजी छाया सँ क्यों डरपोजी, पिया बाण पड़ी या काँई ।  
 पिया डील सिपाही छोटा २  
 एजी छोटा सँ क्यों डरपोजी, पिया बाण पड़ी या काँई ।  
 पिया जाणो पंच कुकरमी २  
 एजी पंचां सँ क्यों डरपोजी, पिया बाण पड़ी या काँई ।  
 पिया पंडा घणा अधरमी २  
 एजी पंडा सँ क्यों डरपोजी, पिया बाण पड़ी या काँई ।

पिया बोरा लूटर खावै २  
 एजी बोरा सँ क्यों डरपोजी, पिया बाण पड़ी या काँई ।  
 पिया साहूकार सदा का २  
 एजी चोराँ सँ क्यों डरपोजी, पिया बाण पड़ी या काँई ।  
 पिया खरी कुमाई खावाँ २  
 एजी ठालाँ सँ क्यों डरपोजी, पिया बाण पड़ी या काँई ।  
 पिया गेलै गेलै चालाँ २  
 एजी पाप्याँ सँ क्यों डरपोजी, पिया बाण पड़ी या काँई ।  
 पिया मरद नाँव छै थाँको २  
 एजी मुरदा सँ क्यों डरपोजी, हिया बाण पड़ी या काँई ।  
 पिया नार जस्या थे जबरा २  
 एजी स्यालाँ सँ क्यों डरपोजी, पिया बाण पड़ी या काँई ।  
 पिया सब का थे अन्दाता २  
 एजी बादू ही क्यों डरपोजी, पिया बाण पड़ी या काँई ।

## आछयो जायोरी

( ना मरदा बेटा का बारा में मां ने ओलंभो )

आछयो जायोरी यो खोड़लो थारो दूध लजायोरी ।  
 आछयो जायोरी  
 दो कौड़ी का पाजी कनै माजनो बिगड़ायोरी,  
 आई कोनै आई कोनै रीस,



यो तो हुयो नवातो सीस, मुरदो जिमी टिकायो सीस  
आछ्यो जायो री ॥ १ ॥

अपणा घर की खरी कुमाई रिसवत में दी यायोरी  
रिसवत दोनी रिसवत दोनी और  
मुरदो जोड्या जवरा हाथ, यो तो कूण्यौं ताँई हाथ,  
आछ्यो जायो री ॥ २ ॥

आबरू को रखवालो यो आबरू बेच्यायो री,  
हुयो निसरडो हुयो निसरडो नीच,  
यो तो घणो सुणो दुतकार, पाछै भाग्यो पूँछ दवार  
आछ्यो जायो री ॥ ३ ॥

मूछ्यौं हाला मरदा में यो मुरदो ही कूवायो री,  
म्हानै आवै म्हानै आवै लाज,  
थारी मरदाणी की लाज, थारी सिघणी की लाज,  
आछ्यो जायो री ॥ ४ ॥

मुरदो जण तू नाहक थारो जोबन रूप गँवायो री,  
ई सै तो तू ई से तो तू बाँभ,  
चोखी रैती बिसबा बिस, देखौं अब तो आवै रीस,  
आछ्यो जायो री ॥ ५ ॥

## पालती का भायला

( समभयोडा पालती का दिल का हिलोरा )

अब तो जक लेल्यो सारा भायला बस भोत हुई छै  
चरी लेर थे आजावो छो. बोलो आनंद बोल ।  
खुद का घर में आनंद कोनै, म्हाँकै दीखी पोलजी ॥ १ ॥  
बात आगली थानै सूभै, सूभै पिछली बात ।  
रात अँधेरी को दिन करद्यो, करद्यो दिन की रातजी ॥ २ ॥  
जठै सलीको थानै दीखै. भली हलाओ पूँछ ।  
चून मांग कर बिणज करो थे, देखां थांकी मूँछ जी ॥ ३ ॥  
म्हाँका घर की बणी राबड़ी, थांकी आंतां मांय ।  
जद भी थे चतराँई करता, क्यों सरमाओ नांयजी ॥ ४ ॥  
भीख मांगता घर घर डोलो, फेर बणो पुजनीक ।  
भली बात का थे दुसमण छो, बात नहीं या ठीकजी ॥ ५ ॥  
राज बंस में जलम लियो थे, नांव धर्यो रजपूत ।  
अपणा लखण सुधारो नांतर, बंस जायलो ऊतजी ॥ ६ ॥  
जीं हांडी में खाताजाओ, करता जाओ छेक ।  
नुआं जमाना में अब थांकी, मुसकल रै सी टेक जी ॥ ७ ॥  
थांका गुण तो समझ लियाम्हे, लिया ताखड़ी तोल ।  
नौकर थांका थांसूँ जवरा, देखो आंख्यां खोलजी ॥ ८ ॥



खाऊँ फाड़ूँ करै मोकली, होय नसा में चूर ।  
 नादिर साही हुकम सुणावै, धमकी दे भरपूर जी ॥६॥  
 मालिक पण थे राखो कोनै, जद भी मालिक नांव ।  
 संभलो तो समलो थे नांतर, उजड़ जांयला ठांज जी ॥१०॥  
 साजी थानै सोना की या, मुर्गी पाई खूब ।  
 एकै समचै अंडा काड्याँ, निस्तै जास्यो डूब जी ॥११॥  
 करी कुमाई सारी देवाँ, थाँके मूडै बाल ।  
 मण दो मण जे नाज राखल्याँ, जदभी अनदेवालजी ॥१२॥  
 बिना सतूनै म्हे चालाँ छौँ, बिगड़यो म्हाँको साँग ।  
 भाव कटै जद गाँठ काटल्यो, थाँकी ऊपर टाँग जी ॥१३॥  
 ब्याज ब्याज को बाकी रैवे, नोटिस द्यो फटकार ।  
 बदनामी सूँ म्हे डरपाँ जद, म्हाँ को कोनै वारजी ॥१४॥  
 सारी स्याणप उड़सी थाँकी, सुणल्यो साजी बात ।  
 आखर थानै रोणो पड़सी, देर कणपट्याँ हातजी ॥१५॥  
 लंबर दार पटैलो सुणल्यो, कैताँ आवै च्याप ।  
 नार बघेरा च्यार्युँ कानी, उल्या बगल में स्याँपजी ॥१६॥  
 एक कुआ में बस्या मीडका, ज्याँ में पड़ गयो बैर ।  
 चलतो पुरजो स्याँप बुलायो, खुद की चाही खैर जी ॥१७॥  
 स्याँप देव कूआ में उतर्या, मीडक पलक्या रोज ।  
 चलता पुरजा सुद्धाँ खाया, राख्यो कोनै खोज जी ॥१८॥

भाई सूँ थे बैर करो छो, पैला सूँ बेवार ।  
 आखर तो पछताणो पड़सी, मौज उड़ाल्यो बार जी ॥१६॥  
 थे ही म्हाँमें खाता पीता, और बोलता आज ।  
 थे ही म्हाँकी जड़ काटो छो, आणी चावै लाज जी ॥२०॥  
 पंच नाव थाँको छै थे भी, दूआ सुणल्यो पाँच ।  
 थाँका किरतब चौडै होसी, होसो पूरी जाँच जी ॥२१॥  
 पैदा में सूँ हासिल देकर, एक चुकावाँ राज ।  
 बिना कुमाई हासिल माँगो, थाँको जबरो राज जी ॥२२॥  
 म्हा का मूरख होवा सूँ हीं, जिमगी थाँकी धाक ।  
 समभदार म्हे अब होगाछौँ, उड़सी थाँकी राखजी ॥२३॥  
 थाँ सूँ क्योँ भी फलो न फूटै, लागै कोनै पार ।  
 छाया घोड़ा थे दौड़ावो, थे नागा सिरदार जी ॥२४॥  
 खाबा ताँई लाल पड़ै छै, थाँ कै नौ नौ हात ।  
 जात पाँत कै दीवल लागी, अब बिखरैली जात जी ॥२५॥

## ये फूल बरसै छै

( कुटो का सेवकां नै बुरी भली कैबालां लोगां नै आसीस )

और कैल्यो और कैल्यो गैरी मन की काडल्यो ।  
 आज म्हाँका सीस पर ये फूल बरसै छै ॥ १ ॥



भली करै परमात्मा थे मौज ही करबो करो ।  
 आप का परताप मुँ ये फूल बरसै छै ॥ २ ॥  
 आज म्हाँकी आत्मा या माँय सँ राजी हुई ।  
 म्हाँ कै भाँवै सांचला ये फूल बरसै छै ॥ ३ ॥  
 नै सुवावै ज्याँ बाताँ को सामनो करबो करो ।  
 सामना की बात छै सो फूल बरसै छै ॥ ४ ॥  
 थाँ नै उपजै सो ही बाताँ खूब थे करबो करो ।  
 बुरी नहीं म्हे मानणा ये फूल बरसै छै ॥ ५ ॥

### कम-खर्च करो

( बेसतूने चालवाला नै सतूना सँ चालवा की सला )

पालत्यो आकाय सारु खर्च थे करबो करो ।  
 देखा देखी बायदै ही थे मती मरबो करो ॥ १ ॥  
 थाँकै माथै आज पैली भोत सो करजो हुयो ।  
 चापा चेपी काम करल्यो कर्ज सँ डरबो करो ॥ २ ॥  
 थाँका तन नै लतौ कोनै नाँय रोटी पैट नै ।  
 फालतू क्यों खर्च करद्यो ध्यान तो धरबो करो ॥ ३ ॥  
 पैदा थाँकी घट रही छै खर्च बाढ़ बढ रियो ।  
 और सारी बात पैली पेट तो भरबो करो ॥ ४ ॥  
 मेल थे सब राखस्यो तो दुःख सब मिट जावसी ।  
 अपेणाँ सोरा भाइयाँ की आपदा हरबो करो ॥ ५ ॥

मुद्रक—

नथमल लूणिया

आदर्श प्रेस केसरगंज, अजमेर


सञ्चालक—जीतमल लूणिया







## एक नवादू विचार



आपणा देस में सेवा करवो चाबाला आदम्याँ को घणो घाटो छै । और गांव में आपको घर बणार बस जाबालां को और भो ज्यादा घाटो छै । जीवन कुटी की थरपना सूँ लेर आज ताई भोतसा आदमी म्हां कनै आया और भोतसा चल्या भी गया । म्हां कनै ज्यो काम छो ऊँनै करवा कै वास्तै आदम्याँ की जरूरत पड़वो ही करी—और मिल्या जस्या आदम्याँ नै राखर म्हे ईँ काम कै वास्तै हुशयार बणावा की कोसिस करता रिया । नवादू काम को जमाव जमाणो जरा मुसकल होवा सूँ म्हांकी सारी ताकत म्हांका काम में ही लागी री । और म्हे खास तौर सूँ आदमी तय्यार करवा को काम हाथ में कोनै ले सकया । अब म्हांको जमाव जम चुकयो और काम भो काफ़ी आगै बढ चुकयो । म्हांकी परख को नतीजो और २-२॥ साल में निकल्यासी । सो म्हे अब या सोची छै क ईँ २-२॥ साल का अरसा में थोड़ा भोत अस्या आदमी तय्यार



करल्यां जोगांव का गरीब को सेवा करबो चाता हो—

हरेक आदमी को ध्यान आपको गिरस्तो चारो चलाबा को छै । और घणा आदम्यां कै सामनै तो रोटी कुमार खा लेबा को सवाल ही सब सँ बडो दीखै छै । ज्यो लोग देस की सेवा में लागसी वै भो भूका तो कौने ही रैणा— देस की सेवा करवालां की रोटी को परबन्ध देस नै बाँधणो ही पडसी । ज्यां लोगां नै आपकी खुद की रोटी को ही जरूरत सँ ज्यादा फिकर छै वै सेवा का काम में सहजां ही कौने लाग सकै और लाग भी जासी तो वै आप भी दुख पासी और दूसरां नै भी दुख देसी ।

म्हे जीवन कुटी में अस्यो परबन्ध करबा को विचार धाम्यो छै क १०-५ या हो सकै तो ज्यादा आदमी ट्रेनिङ्ग कै वास्तै राख्या जावै और वानै गांव की सेवा कै वास्ते सब तरै की जरूरी ट्रेनिङ्ग दी जावै । ज्यां आदम्यां नै म्हे भरती कराँ वामें नाचै लिखी बातां मिलणी चायजे—

(१) मिडल कै आस पास तक की पढ़ाई कर्या हुया हो—मतलब यो छै क हिन्दी को पढ़बो लिखबो चोखो आतो हो और काम चलाऊ हिसाब जाणता हो—

(२) उमर बरस बीसेक कै आसरै हो—मतलब यो छै क नुई बात सीखबा को हँस हाला जुवान आदमी होणा चायजे —

(३) २-४ कोस पैदल जावा सँ हार न मानवाला होणा चायजे । और भी सरीर की पचावट को काम करबा की आदत हो । और आदत भी न होतो कम सँ कमसरीर सँ काम लेबा की हँस हो—

(४) कुटम कबीला को ज्यादा बोभो न होणो चायजे—मतलब यो छै क एकला की कुमाई कै भरोसै १०-५ खाबाला न होणा चायजे —

(५) और सब सँ बड़ी बात तो या क आपका गुजारा कै साथ साथ सेवा करबा की लगन होणी चायजे । पढ़्या लिख्या कमती हो तो काम चल सकै छै—पण ज्यांका मन में सेवा की भावना न होवाँ सँ काम नहीं चल सकै ।

याँ आदम्याँ कै वास्तै म्हे नीचै लिख्या मुजब परबन्ध करबो चावां छं ।

(१) पडबा-लिखबा को अस्यो परबंध होसी जीसँ वाँकी बाँचबा माँडबा की ल्याकत बदाबा कै साथ साथ वाँन जाणबा लायक जरूरी बातां किताबां का जरिया सँ बताई जा सकै—दुनियाँ



को हाल चाल मालम करायो जा सकै, नवादू विचारां को ल्हैर वानै बताई जा सकै—

(२) गाँवाँकी हालत को जाणकारी कराईजासी। और थोड़ा हुशियार हुयाँ पाछै तो वानै गांव में परचार करबा को तरीको भी बतायो जासी। ट्रेनिङ्ग पाया हुयाँ दूसरा आदम्याँ की साथ गांवां में भेजबा को परबंध कर्यो जासी—

(३) वानै अस्या तरीका सँ राख्या जासी क ट्रेनिङ्ग पाछै वै अकेला भी आपकै आराम सँ कठै भी रै सकै। मतलब यो क आपको निजू काम आपका हाथ सँ कर लेबा की आदत पटक दी जासी—

(४) नीचै लिख्या कामाँ में सँ कुछ तो जरूर सिखाया जासी। बाकी में सँ भी एक या दो काम सिखावा की कोसिस करी जासी—

- (१) पिंदाई-कताई-बुणाई,
- (२) दरी-निवार की बुणाई,
- (३) रंगाई को मामूली काम,
- (४) सिलाई को मामूली काम,
- (५) खाती को मामूली काम,

(६) दवा दारू को मामूली काम,

(७) हारमोनियम पर मामूली गाणा निकाल लेबा को काम—

सब सँ चोखी बात तो या हो क ट्रेनिङ्ग कै वास्तै आबाला आपका रोटी कपड़ा को इन्तजाम आप करले—पण ज्यो न कर सकसी वां का रोटी कपड़ा को इन्तजाम में कठां सँ भी करा देस्युँ कम सँ कम छै म्हैना तक ट्रेनिङ्ग दी जासी और ट्रेनिङ्ग पाछै वानै कठै भी सेवा का काम में लगा दिया जासी।

म्हे या तो कोनै सोच मेली क ऊपर बताई हुई ट्रेनिङ्ग कै वास्तै कोई सैकड़ां आदमी ही चल्या आवैला। उल्टो म्हानै तो यो डर छै क कमती ही आदमी पूछैला। पण म्हांका मन में या छै क म्हे जस्या आदम्यां नै पसंद करस्यां बस्या तो चाहे जतरा आदम्याँ की ट्रेनिङ्ग को इन्तजाम कर ही देणो चायजे। ज्याँ भायां का देखवाँ में ई बानगी का ये पाना आवै वाँ में सँ कोई को अस्यो विचार हो तो वै म्हाने तुरत लिखै फेर म्हे बुलावां तो मिलबा कै वास्तै भी आ जावै—जरूरत होसी और तै हो जासी तो वानै आबा जाबा को खरचो



भो दियो जा सकसी । यां पानां नै बांचवाला  
भायाँ की निगा में अस्था आदमी होतो वाने वै  
इत्तला कर दे और म्हानै भी लिख दे ।

म्हे खास तौर सूँ यौ इन्तजाम करबो चावाँ  
छाँ—और म्हाँकी निगा में ज्यो दो चार आदमी  
छे वाने लेर म्हे जल्दी सूँ जल्दी काम सरू कर देवो  
चावाँ छाँ । ज्यां भाँया को विचार हो वै जल्दी  
हो म्हासूँ लिखा पढ़ी करैला तो बानै और म्हानै  
सब नै ही सुभो तो रैलो । ज्यो लोग बानगी का  
गायक छे अर ज्याँ को जीवन कुटी सूँ और गांव  
की सेवा का काम सूँ परेम छे वाने ई काम में  
खास तौर सूँ मदत करणी चायजे—

जीवन-कुटी,  
फरवरी सन् १९३५ }

हीरालाल शास्त्री

बगस पेलो बानगी दसत्रीं

## जीवन कुटीर का गीत

उपदेसक को ख्याल

( पालती और उपदेसक का सुवाल जुवाव )

जवाब करसा को—

- ✓ उपदेसक प्यारा म्हारा काम का उपदेस सुणाओ—
- ✓ उपदेसकजी सब सूँ पैली, बात बताओ एक ।
- ✓ दुनियादारी छोड़छाड़ कर, कियाँ बस्यो यो भेकजी ॥
- ✓ पैदावारी दीखै कोनै, कियाँ चलाओ काम ।
- ✓ आबन्दानी होय कठा सूँ, कुण दे जावे दाम जी ॥

जवाव उपदेसक को—

- करसा रै प्यारा थारा काम का, उपदेस सुणास्यां—
- अपणा घर को काम करै सब, या मामूली बात ।
- ✓ घर को छोड़ै करै और को, बडी होय वा बातजी ॥
- थांकी खातिर फिरां डोलता, घर को कोनै काम ।
- थांका ही खरचा सूँ म्हाको, चाल्यो चावै कामजो ॥

जवाव करसा को—

- पैली तो म्हे समझाँ कोनै, फेर नहीं आकाय ।
- थांको खरचो कियां चालसी, करस्यो कस्यो उपायजी ॥



थां सिरका म्हे और आदमी, पैली देख्या नांय ।  
जीं सूँ ही यो बैम ऊपजै, म्हाँका मनकै मांयजी ॥

जवाब उपदेसक का—

थांकी चोखी चाबाला छै, दयावान् कुछ लोग ।  
वाँसूँ ही कुछ रुपया मिले छै, बैठ जाय छै जोगजी ॥  
दुख सुख की म्हे बात छोड़दी, करडो करयो विचार ।  
म्हाँकामनमें नसो काम को, मांनां कोनै हारजी ।

जवाब करसा को—

थोड़ी थोड़ी बात समझमें, बैठी छै या आज ।  
बाकी को समझ्या सूँ पाछै, बैम जायलो भाजजी ॥  
ठिगा गया म्हे कई बार जद, ऊठ गयो विसवास ।  
गेलो म्हाँनै अस्यो बताओ, जीबा को हो आसजी ॥

जवाब उपदेसक को—

कस्ता तो थे घणी करो छो, भोत करो छो दोड़ ।  
सरदी गिरमी विरखा लोपर, काम करो बे तोड़जी ।  
जद भी भूखा नागा रो छो, ईं को कांई भेद ।  
थांका दुखनै देख देख कर, होय कालजै छेदजी ॥

जवाब करसा को—

काम कर्यासूँ कांई हो छै, निमलो म्हाँको भाग ।  
दसा खोड़ली गैल पड़ी जद, म्हाँको कोनै थागजी ॥

सुणो रामजी रूस्यो म्हाँको, बस की कोनै बात ।  
जियां राखसी रैणो पड़सी, वो गोप्यां को नाथजी ॥

जवाब उपदेसक को—

करम भाग की भूँठी बातां, करल्यो खूब विचार ।  
पंखा कै सर पौन होय छै, सांचो यो निरधारजी ॥  
और होय अन्याय मोकलो, परमेसर घर न्याय ।  
काम कर्या को मिलै चाकरी, नहीं अबरथा जायजी ॥

जवाब करसा को—

उपदेसकजी जची नहीं या, म्हाँकै थांकी बात ।  
काम कर्यांकी कड़ै चाकरी, भूखा सोवाँ रातजी ॥  
और भोतसा थे ही देखो नहीं, हलावै हाथ ।  
गादी तकिया खूंद रिया ये, जीमै चाँवल भातजी ॥

जवाब उपदेसक को—

एक बात थे बार बताओ, अकल बड़ी या भैस ।  
ठालालोग अकलकै पूँछै, हो रिया पूरा लहैसजी ॥  
कस्ता करकै करै कुमाई, नहीं करै रखवाल ।  
मिनस्य चोरले ढांढा भेलै, चरै हिरण अर स्यालजी ॥

जवाब करसा को—

बस बस थांकी बात समझली, तुलगी विसवा बीस ।  
सूरखताई काम बिगाड्यो, काड्यो म्हाँको कीसजी ॥



नहीं भरतजी स्राप दियो अर, नहीं भाग को दोस ।  
 म्हे ही म्हांका दुसमण छांजद, कुण पर काँडा रोसजो ॥

जवाब उपदेसक को—

थांको सारो नास कर्यो या, आपसरी की फूट ।  
 आपसरी में एको करल्यो, बंद होय सब लूटजी ॥  
 घर को सांचो फिकर करो थे, करो गांव को बाद ।  
 बाद गांव सूँ करो देस को, मिटसी सब रंवादजी ॥

जवाब करसा को—

पैली तो पैदा ही थोड़ी, फेर चुकाणो राज ।  
 क्रियांजियाँ म्हे राज चुका कर राखाँ अपणी लाजजी ॥  
 बोरो दूजा राज बराबर, बाकी वो ले जाय ।  
 कोरा नागा म्हे रै जावाँ, बार भेलता हायजी ॥

जवाब उपदेसक को—

जिमी राज की थे मानो जद वो ले हासिल माँग ।  
 पैली थाँनै बोरो दे जद, फेर पसारै साँगजी ॥  
 जात विरादर राज तीसरो, जीं को जबरो डंड ।  
 बाँको डंड नहीं जो चूकै, फैलै घणो हपंडजी ॥

जवाब करसा को—

आज समझ में आई म्हाँकै, भला मरम की बात ।  
 सब सूँ जबरो डंड करै यो, राज तीसरो जातजी ॥

जात डंड का मार्या ही म्हे, बोरा का मातैत ।  
 म्हाँकी क्रियाँ जिवारी हो अब, तीन राज की रैतजी ॥

जवाब उपदेसक को—

खरच जात को मेट्या सूँ तो, बोरो भी मिट जाय ।  
 एकराज रै जावै पाछै, जीं की मुसकल नाँयजी ॥  
 घर में हो उरलाई जद तो, पैदा भी बद जाय ।  
 पैदा होतो खाय पेट में, खायाँ सूँ आकायजी ॥

जवाब करसा को—

धापर खायाँ लाण बदैलो, लाण गैल हो पाण ।  
 पाण गैल ही कस्ता होसी, मरम लियो यो जाणजी ॥  
 बीज खात की हो उरलाई, बलद साँतरा होय ।  
 फेर कराँ म्हे कस्ता साँची, बेहद पैदा होयजी ॥

जवाब उपदेसक को—

बत्ती पैदा होय जकी नै, नहीं लुटाई जाय ।  
 धन सूँ धन पैदा कर लेवै, घणो ठाठ हो जायजी ॥  
 छोटा मोटा स्वारथ त्यागै, ऊंडो हेरो हेर ।  
 निमला नै भी सारो देकर, करै बराबर फेरजी ॥

जवाब करसा को—

अब तो ज्यादा क्योँ बोलो छो, यो दीख्यायो अन्त ।  
 म्हाँकी कूँची म्हाँकै कन्नै, समझ लियो यो तन्तजी ॥



भला मिल्या उपदेसक थे तो, भलो दियो यो ग्यान ।  
अंधकार में कर्यो उजालो, भलो करै भगवानजी ॥

जवाब उपदेसक को—

भली बात को बरत लियो म्हे, भलो करां परचार ।  
एक लगन या म्हाँकै लागी, छोड़्या और विचारजी ॥  
करसा अथे विद्या पढल्यो, मती रहो अब ठंट ।  
निमलाई को करो सामनो, ऊबा होर फिरस्टजी ॥  
भाग वाग नै मार भगाओ, डर नै मेलो दूर ।  
आपसरी में करो भलाई. ठाठ होय भरपूरजी ॥  
मर्दा की तो सदा जीत छै, ना मर्दा की हार ।  
अब तो थे भी मरद बख्या छो, बोलोजैजैकारजी ॥

## पाखण्ड चाल्या छै

( ठिगोरा पाखण्ड्यां को भंडाफोड़ )

कोरा नागा होरहा सिद्ध कस्या ये पाखंड चाल्या छै—  
आंक बांचबो आवै कोनै, पतड़ो ले ले हात ।  
पेट भराई ताई डोलै, भोत बणावै बात ॥ १ ॥  
शीघ्र बोध का आँक बाँचले, जबरा पण्डित होय ।  
बारखड़ी सूँ व्याव करावै, बड़ा हरामी होय ॥ २ ॥  
कोई कै ये गिरै बतादे, रचले पूरो जाल ।  
ऊँली सूली बात बणाकर, जीमै चूर्युँ दाल ॥ ३ ॥

भोली दुनियाँ नै बोलावै, तोर लगावै ताक ।  
म्हारा बैटा मूँड हलावै, भली जिमावै घाक ॥ ४ ॥  
डोरा डांडा करै मोकला, ज्या में कोनै तंत ।  
मतलब को तो मतलब करले, और कुवावै संत ॥ ५ ॥  
ठिग खावा की विद्या हैरी, श्योदा धोखाबाज ।  
भाड़ा भपटा देता डोलै, करता फिरै इलाज ॥ ६ ॥  
कोई काचा कलवा साधै, कोय चलावै मूठ ।  
दुनियां नै ये धोखो देकर, घर भर लेवै लूट ॥ ७ ॥  
स्याणा बण कर कै देवै ये, ऊपरलो छै दोस ।  
भूटा जादू टूणा करदे, माल बणा ले कांस ॥ ८ ॥  
ठिग विद्या को पार नहीं ये, चलै अनेकों चाल ।  
ढाढां को भी करै जापतो, और लूट ले माल ॥ ९ ॥  
और अस्या ही बोला समझो, पूरा बेईमान ।  
लोगो थे हुशियार बणौ रै, मती कटाओ कान ॥ १० ॥  
थोड़ो सो थे ध्यान धरोतो, सबकी निकलै पोल ।  
चावो तो सांचो कर देखो, जीवन कुटी कोकोल ॥ ११ ॥

## मोटो कपड़ा

( पालती की जिवारी को एक जतन )

बारीक कपड़ा छोड़कर मोटा विसावांला ।  
लोढ़ पींदा कात कर घर का बणावांला ॥ १ ॥



पैली म्हांका बापदादा मोटो कपड़ो पैरता ।  
 वाही बड़ा की चाल म्हे पाछी चलावांला ॥ २ ॥  
 मय्याँ कपड़ा देख लीना कोनै म्हांका कामका ।  
 टका टका का फूफन्या दूरा बगावांला ॥ ३ ॥  
 बेगा फाटै फाट्याँ पाछै बणै नहीं छै गूदड़ा ।  
 निकाम कपड़ा मोल ले नांही ठिगावांला ॥ ४ ॥  
 बद करकै म्हे खेती करस्याँ ऊँ में चेतो राखस्याँ ।  
 मिलसी जतरी ठाल में कपड़ा बणावांला ॥ ५ ॥  
 रोटी कपड़ा की ही दोन्यू लूँठी चिन्ता आपणै ।  
 नाज रूई ल्याय रोटी कपड़ो जुटावांला ॥ ६ ॥  
 घर में बैठयाँ धंधो करताँ लाज कुण की आवसी ।  
 बेघड़कै सब काम करकै पीसा बंचावांला ॥ ७ ॥  
 कैवाला कैता फिरैला सुणस्याँ कोनै एक की ।  
 फायदा को काम करकै फायदो उठावांला ॥ ८ ॥

## बोलबाला छै

( मुर्दापण व मर्दमी को मुकाबलो )

मर्दमी अर उरमा का बोल बाला छै ।  
 बोलबाला भादराँ का बोलबाला छै ॥ १ ॥  
 न रोवै जी टाबर नै तो माँ भी बोवो दे नहीं ।  
 रूसवाला टाबराँ का बोलबाला छै ॥ २ ॥

अणबोल्या को खाखलो भी बिना बिक्रयो रै जाय छै ।  
 बोलै जी का बूमलाँ का बोलबाला छै ॥ ३ ॥  
 बिन लखणाँ का मूसल चन्दा त्यात्यात्या करता फिरै ।  
 अकलबन्द हुरथार का तो बोलबाला छै ॥ ४ ॥  
 गद्दा ऊपर बोभो लादै पाछाँ सूँदे कामडी ।  
 मारबाला साँड का तो बोलबाला छै ॥ ५ ॥  
 नालायक का जणवासूँ ही नारी की मैमा घटै ।  
 मर्द की मा मर्दानी का बोलबाला छै ॥ ६ ॥  
 ना मरदा की बैरबानी सब की भाभी होय छै ।  
 सिंघवाली सिंघणी का बोलबाला छै ॥ ७ ॥  
 पूँछ दबाकर रस्तो नापै हारयोडा वै कूकरा ।  
 भूभबाला सूरमा का बोलबाला छै ॥ ८ ॥

## स्वागत

( जैपर सूँ एज्यूकेशन मेम्बर व डायरेक्टर एज्यूकेशन कुटीर  
 देखबा पधार्या जद बांको स्वागत कर्यो गयो )

एजी प्यारा म्हाका आज पावणा भला पधार्याजी—

देस आपणो घणो खरो सो,  
 बसै गाँव कै माँय ।

धनकी असली खान गाँवमें,  
 बारै देखो नाँय ॥ १ ॥



सेवा को जद म्हाँनै सुभी,  
 मन में कर्यो विचार ।  
 सैर छोड़ कर करां गाव में,  
 बणे जस्यो यो कार ॥२॥  
 ऊँडो हेरो हेर लियो म्हे,  
 देखी सारी सोय ।  
 विद्या को परचार कर्या सुँ,  
 असल भलाई होय ॥३॥  
 सरधा सारु काम कर्यो म्हे,  
 देखो सारो हाल ।  
 देख्याँ पाछै साफ बताओ,  
 चूक्या कौडै चाल ॥४॥  
 पसरै लाम्बा हाथ आपका,  
 भोत बडी आकाय ।  
 साँची विद्या बधै गाँव में,  
 जीं को करो उपाय ॥५॥



## होली को राम राम

होली दिवाली राखी दसरावो—ये बड़ा तिवाँर मान्या जाय छै । घर में खावा नै हो जद तो आडै दिन भी तिवाँर मनायो जा सकै छै, पण होली दिवाली नै गरीब का घर में भी थोड़ो भोत उजालो हो ही जावै छै । होली दिवाली का तिवाँर अस्या मौका में आवै छै क या तो पालतो का घर में साख की पैदावार आधी पड़दी आ चुकै छै या आबा कै साँकड़ी आ पूँचै छै । पैदावार चोखी हो जाय और जरासो हाथ उरलो रै जाय जद तो होली दिवाली को मौको साँच्याँ ही हँसी खुशी को हो सकै छै । और कदे फसल में क्यों बिघन ही हो जावै और पैदावार की आस न रैवै जद तो फेर होली—दिवाली का दिन मामूली आड़ा दिन सूँ भी बुरा दिन देखवा में आवै छै—क्यों क ज्यों दुख खुशी का मौका में आवै छै वीं को मन पर ज्यादा असर हो छै ।

म्हाँनै कई बरस गाँव की होली—दिवाली देखताँ हो गया । मामूली तौर सूँ या ही देखवा में आई क या तिवाँरा में अब जान कौनै री । होली का दिना का खेल-कूद आनन्द-उछाव बन्द होता आ रिया छै—असल में



लोगों का दिल में खुशी न उमड़ै जद वै विचारा जबर दस्ती खुशी कियाँ मनावै । लोगों का चौरा फिकर का मार्या कुमलाया हुया देखवा नै मिलैला । एक रीत चली आई छै सो बड़ा तिवार्र कै दिन कोई चावल-लापसी पूआँ-पापड़ी बणार खा लेवा में सब सँ बड़ो आनंद मान लेसी—सो भी कैई घर अस्या मिल सकसी ज्यौं में कोई चोखी चीज तो दूर मामूली रोटी को सलीको भी तिवार्र कै दिन निकाँ सी न निकलै—और ज्यो जीं दिन भी इयाँ ही उधारो पायो करर आपको काम चलावै छै । सरू सरू में ई रचना नै देखवा सँ म्हाँका मन में भोत ज़्यादा ठेस लागती—पण अब नित ऊठर वोही हाल देखवाँ सँ म्हाँनै भी क्यों २ सुवासी गई !!

गरीब की-खास कर गाँव का गरीब की-हालत खराब होती जा रही छै—पण भोत थोड़ा आदम्याँ को ध्यान अठी नै जातो मालुम पड़ै छै, ई को कारण यो छै क खुद गरीब नै हो आपको दुख सुवा मेल्यो छै—ज्यौं बीं को हालत गिरती जाय छै ज्यौं ही बीं को तकलीफ भेलबा को सुभाव बणतो जावै छै । जियाँ कोई आगमी बीमार पड़्यो हो और बीं की हालत बिगड़ती ही जावै तो धीरे २ ऊँ की तरफ को छोटी मोटी चोखी बात सँ भी बन्दगी करवाला को चित हरयो हो जाय छै—बिलकुल न

खा सकवालो दाल को पाणी ले लो तो भी चोखी बात समझी जावै—बीमारी बढ़वा पर ज्यो अचेत हो जाय ऊँ का एक बार भाँक लेवा सँ हो ऊँ कै फायदो मान लियो जावै ।

वस अस्थो सो ही हाल गाँव का गरीब को दीख्यो । गरीब की हालत चावै कतरो भी ज़्यादा खराब क्यों न हो जाओ म्हाँनैया दीखै छै क दूसरा लोग तो ऊने सुधारवा को साँचो उपाय कोनै करणा—और थोड़ी भोत कोई करसी भी तो वाँको करयो क्यों होतो जातो कोनै दीखै । वै तो ज़्यादा सँ ज़्यादा या ही कर सकै छै क ऊँघ ता हुया गरीब नै चेत करादे—गरीब सूतो छै तो ऊँनै जगादे । बाकी भली तो जद होणी छै जद गरीब आप मर्द होर आपकी बात नै आपका हाथ में लेसी ।

गरीब आदमी को अग्यान बेहद छै—ज्यो बीं का पाड़ोस में न रीयोड़ो हो वो तो बीं का अग्यान को अन्दाज ही कोनै कर सकै । गरीब आदमी आपका फायदा—नुकसान नै बिलकुल ही कोनै पिछाणै—वो तो उल्टो फायदा नै नुकसान अर नुकसान नै फायदो जाणावा लाग जाय छै । गरीब आदमी आपका सोखी-दोखी को पिछाण भी कोनै कर सकै । गाँव का आदमी ज्यौं वातां नै ठीक मान राखी छै वै ही ठीक छै; ज्यौं नै वै



जाएँ छै वैही बातां छै—ज्यो बात वांका देखवा में कौनै आई सो चाहे कतरी भी असल बात हो ऊ नै वै मानबा कौ वास्तै तय्यार कौनै ।

गांवां की एक खराबी या छै क गांव बिखर्या हुआ छै—और गाँव हालां कनै आपसरी में लड़वा का कारण घणा मौजूद छै । सो वै आपसरी में लड़ता २ ही कौनै धापै । कोई कोई की साख भेल दे छै तो कोई कोई को दूसरो ऊजाड़ कर दै छै । खेत खेत की मेर पर तीख और गाँव गाँव की मेर पर तीख । गाँव का आदमी का अग्यान की साथ या बिखर्या रैवा की बात मिल्यां पाछै तो फेर क्यों भी बाकी कौनै रै । अग्यान का कारण सँ तो फायदा-नुकसान नै पैली सँ ही कौनै जाएँ—और जतरो सो ग्यान बां नै फायदा नुकसान को हो जाय छै ऊँ सारा नै आपसरी में ताकत आजमावा में ही लगा दे छै ।

जात पांत को भेद सारा देश में ही घणो ज्यादा नुकसान कर रियो छै—पण जात पांत को नुकसान जस्यो गाँव में देखवा में मिलसी बस्यो दूसरी जगाँ शायद ही मिलै । आप आप की जात में सब बड़ा बणबो चावै छै—सब लोग एक दूसरा को सांचो २ हाल जाएँ छै—फेर भी न जाएँ कस्योक बेढड पड़दो अकल पर

पड़्यो हुयो छै क एक दूसरा को निगाँ में ऊँचा दीखवा को कोसिस कर्यां विना कौनै रै । बियां तो यो रोग सारा हिन्दुस्तान को ही दीख्यो—पण गाँव में ईं को ज्यादा असर दीखवा में आयो । ब्या सगाई का मौका पर बेठा हालो बेठी हाला नै अर बेठी हालो बेठा हाला नै नीचो दिखावा की कोशिश करै छै । “नहीं सा काँई बात फलाणां गाँव हालो लूंटो छै—वीं की जाल भेलवा को फलाणां की काँई आकाय छै ”? आपका पड़ोस्यां की वा वाहो लूट ला तो बस मिनखा दे को पूरो ही फल पा लियो । गरीब नै ज्याँ का कारण सँ रोजीना नीचो देखणो पड़ै छै, कोई नै नीचो दिखायां ही काम चलै तो ज्याँनै सब सँ पैली नीचो दिखाणो चायजे—वांकी तरफ गरीब को बिलकुल ध्यान कौनै—जद फेर गरीब की भलाई को काँई गेलो ?

होली कौ आस पास का दिनाँ की या बानगी छै जद होली का बारा में बिचार चाल्यो—एक बार पैली ‘दिवाली को राम राम’ लिख्यो छो सो अब कौ होली को राम राम लिखवा की मन में आई । पण होली का राम राम का मौका पर म्हे. लोग गाँव का गरीब की काँई भेट करां । होली आओ, चावै दिवाली आओ,—गरीब का मन पर साँची खुशी कौनै हो सकै—म्हे ईं भेद नै



नीकाँ भलाँ जाणाँ छँ सो म्हाँका मन में भी खुशी कोनै हो सकै—म्हे ई' बारा में जतरो बिचार कराँ छँ जतरो ही माँय सँ कालजो बलै छै । फेर भी होली की परसादी का तौर पर ये बातों म्हे गरीब आदमी कै अर-पण करवो चावाँ छँ—

( १ ) सबसँ पैली थे थाँकी थोथी करड़ावण नै भूलर या जाए जाओ क थे दुखी छो—थाँकी पाँती दुख आणो नहीं चायजे, पण आ मेल्यो छै—सो थेई' दुख नै ना मेट करयो—

( २ ) थाँका दुख का कारण दूसरा तो छै सो छै ही—पण थे खुद भी छो । थे पतो लगाओ क थे दुखी क्यों छो ?

( ३ ) थां नै थाँका दुख को पतो लाग जाय तो थे थाँकी सारी ताकत थाँका दुख नै मिटावा में ही लगाओ आज काल थाँकी ताकत थाँका खुद का दुख नै घणो कर लेवा में लाग री छै ।

( ४ ) थे यो बिसवास राखो थे इकमन्न्या होर थाँका दुख नै मिटावो चास्यो तो वो जरूर ही मिट जासी ।

( ५ ) सो आज ताई' हुई सो तो होली—आयन्दा कै वास्तै म्हाँकी साथ २ थे भी बोलो क गरीब कै वास्तै म्हे बताई सो ही होली ।

जीवन कुटी,  
मार्च १९३५

हीरालाल शास्त्री

वरम पेलो बानगी ग्यारवीं

## जीवन कुटीर का गति

### धन धन राम

( भाई भाई का प्यार को नमूनो )

धन धन राम भारत भैया रै  
धन धन राम ।

मात पिता की अग्या मानी २  
त्यागो राज बड़े भैया रै, धन धन राम ॥१॥

राज तिलक जद मिलबा लाग्यो २  
नट गये धन्न भरत भैया रै, धन धन राम ॥२॥

भरत राम सँ बिनती किनी २  
ले ल्यो राज बड़े भैया रै, धन धन राम ॥३॥

राम भरत नै पाछा भेज्या २  
बन में आप रमे भैया रै, धन धन राम ॥४॥

राम पाहुका साथै लीनी २  
पूजै नित भरत भैया रै, धन धन राम ॥५॥

धन्न भरत नै धन्न राम नै २  
धन धन प्यार कर्यो भैया रै धन धन राम ॥६॥



## आंख्यां खोलो रै

( पालती का घर को मांयलो हेरो )

आंख्यां खोलो रै थे सूतोड़ाओ अब तो बोलो रै आंख्यां खोलो रै

बिना पूस को टापरो यो थांको आंख्यां खोलो रै ।

पड़वा नै यो पड़वा नै यो त्यार,

ईं कै लागी कोनै गार, निकल्या सारा बार तिवार,

आंख्याँ खोलो रै ।

आये दिन बाथेड़ो कतरो सोचो आंख्याँ खोलो रै ।

बाथेड़ा की बाथेड़ा की लार,

थॉनै मिलै कसीक खुराक. थांकी जवरी या पोसाक,

आंख्याँ खोलो रै ॥२॥

अपणा घर में कतरो धन छै देखो आंख्यां खोलो रै ।

करजो कतरो करजो कतरो मेल,

थे तो दोन्यां को मिलाइ, देखो स्याब तिस्याब फलार,

आंख्याँ खोलो रै ॥३॥

अपणा घर को हेरो करल्यो नोकाँ आंख्याँ खोलो रै ।

खरचो कतरो खरचो कतरो और

थांकै पैदा कतरो होय, थे तो देखो सारी सोय,

आंख्याँ खोलो रै ॥४॥

बिना पढ्योड़ा टाबर मूरख डोलै आंख्याँ खोलो रै ।

बिना दुवाई बिना दुवाई मौत,

देखो ठाड़ी थांके द्वार, या तो बिना बुलाई त्यार,

आंख्याँ खोलो रै ॥५॥

थाँ सूँ सब की पेट-भराई हो छै आंख्या खोलो रै ।

सब सूँ निबला सब सूँ निबला आज,

थे ही दीख्या च्यारयूँ मेर, माँची जवरी भोत अन्धेर,

आंख्याँ खोलो रै ॥६॥

याँ बाताँ को काँई कारण सोचो आंख्या खोलो रै ।

चावो तो थे चोवो तो थे बार,

थाँको हो जावै निस्तार, थाँकाँ होवै बेड़ा पार,

आंख्याँ खोलो रै ॥७॥

## सपनो आयो

( उथल पुथल को छबी )

सपनो आयो एक घणो जवरो रै सपनो आयो—

काली पीली आँधी ऊठी २

चाल्यो सूँट घणो जवरो रै सपनो आयो ॥१॥

थल को हो गयो जल थल जल को २

संपट पाट घणो जवरो रै सपनो आयो ॥२॥



डूँगर टूट ज़िमी में मिल गया २  
 देख्यो ख्याल घणो जबरो रै सपनो आयो ॥३॥  
 चौरस भोम में डूँगर बण गया २  
 माया जाल घणो जबरो रै सपनो आयो ॥४॥  
 टीबा ऊठ नँदी बै लागी २  
 फैल्यो पाट घणो जबरो रै सपनो आयो ॥५॥  
 नँदियाँ सूखर टीबा बण गया २  
 बेठब भूड घणो जबरो रै सपनो आयो ॥६॥  
 महाँको सपनो साँचो होसी २  
 समझो भेद घणो जबरो रै सपनो आयो ॥७॥

## भोला केश्यो

( जात को भँवरजाल )

भोला रै भोला प्यारा जाती गंग नांय रै ।  
 निस्तै ही भूँठी या सारी ओपमा ॥ १ ॥  
 भोला रै भोला भाया गंगा सूँ उपकार रै ।  
 जाती तो निमला कै लेखै भूतणी ॥ २ ॥  
 भोला रै भोला प्यारा जात भँवर को जाल रै ।  
 ई मेंतो फँस जासी सो ही डूबसी ॥ ३ ॥

भोला रै भोला प्यारा “हम बड़े” की बात रै ।  
 जाती को अतरो ही मतलब जाण लै ॥ ४ ॥  
 भोला रै भोला प्यारा निस्तै मन में जाण रै ।  
 जाती का टूट्या सूँ आनन्द होवसी ॥ ५ ॥  
 भोला रै भोला प्यारा जाती का ये लोग रै ।  
 लाडू रै खावा का पूरा राख छै ॥ ६ ॥  
 भोला रै भोला भाया चैंटा वानै माल रै ।  
 मेलै छै चटेड़ा यांकी जीभ तो ॥ ७ ॥  
 भोला रै भोला प्यारा थारै घर ये जीम रै ।  
 थारी ही निंदरा भी करता डोलसी ॥ ८ ॥  
 भोला रै भोला प्यारा तन्नै ये वैकार रै ।  
 मतलब तो साथै छै अपणा पेट को ॥ ९ ॥  
 भोला रै भोला प्यारा भूँठी या टणकाइ रै ।  
 भूँठी रै टणकाई करसी खोखलो ॥ १० ॥  
 भोला रै भोला भाया जात जिमायां पाप रै ।  
 पाप्यां का जीम्यां सूँ लागै पाप ही ॥ ११ ॥  
 भोला रै भोला प्यारा सांचा भाई जाण रै ।  
 थारा रै घर में ज्यो करदे फायदो ॥ १२ ॥  
 भोला रै भोला प्यारा पंचा नै तू लोप रै ।  
 पंचा नै लोप्यां सूँ पैँडो छूटसी ॥ १३ ॥



भोला रै भोला प्यारा माल पराये पंच रै ।  
 लागैली जीं कै ही भाया दूखसी ॥१४॥  
 भोला रै भोला प्यारा ऊपर मिसरी टूक रै ।  
 मांय सँ भाईड़ा ये तो भैर छै ॥१५॥  
 भोला रै भोला प्यारा मोठा मोठा बोल रै ।  
 बोदा की बिगड़ावै ये तो आबरू ॥१६॥  
 भोला रै भोला भाया लूँटा-लूँटा लोग रै ।  
 वांका तो सारा ही गुन्ना माफ छै ॥१७॥  
 भोला रै भोला भाया आछी खोटी बात रै ।  
 यां की नै मानै तो न्यूतो बन्द छै ॥१८॥  
 भोला रै भोला भाया सारी चोखी बात रै ।  
 यांनै तो लागै छै खारी भैर रै ॥१९॥  
 भोला रै भोला भाया भूठी यांकी धाक रै ।  
 यां सँ तो कोनै हो बाँको बाल भी ॥२०॥  
 भोला रै भोला भाया ये ठिगां का बाप रै ।  
 आछ्यां नै समझ्या तू सिरदार रै ॥२१॥

## होली आई फूल फूल

( होली की मन चाई )

होली आई फूल फूल खुसियां मनावंला ।  
 निमला म्हांका भाइयां नै छाती सँ लगावंला ॥१॥  
 दालद भाग जायलो दुःख मिट जायलो ।  
 जघां ही सब की साथ में जलसा मनावंला ॥२॥  
 रोग मिटसी दोख मिटसी, चैन चार फैलसी ।  
 निश्चित सब की साथ में गाणो गवावंला ॥ ३ ॥  
 डाकू मरसी चोर मरसी और मरसी चूँसड़ा ।  
 जघां ही सारा मौज की बंसी बजावंला ॥ ४ ॥  
 मोटी धोती मोटो फैंटो कमरी मोटी पैरस्यां ।  
 सारा ही मोटा पैर कै रङ्गत दिखावंला ॥ ५ ॥  
 माथै चोटी एक पीसो कोनै म्हांकै टैरसी ।  
 साईं सेती साखाँ ल्याकर ओरचाँ भरावंला ॥ ६ ॥  
 प्यारा म्हांका गाँव को म्हे नाँव करस्याँ देस में ।  
 जीवन कुटी की साथ में मौजा उडावंला ॥ ७ ॥



## होली को आवणो

( होली की बधाई )

प्यारो लागै जी होली, म्हाँनै थाँको आवणो  
 साँई सेती सारवाँ ल्यावाँ, माथा को म्हे भार चुकावाँ ।  
 पूरो पाड़ो जी होली, अब कै म्हाँको बावणो ॥ १ ॥  
 घर को कूड़ो करकट काठाँ, मन को मैलोपण भी काठाँ ।  
 बासो करद्यो जी होली, थे तो म्हांको भावणो ॥ २ ॥  
 बैरविरोध म्हे खूब जलावाँ, बिछड्याँका म्हे मेलमिलावाँ ।  
 सारा सीखाँ जी होली, आपस को म्हे चावणो ॥ ३ ॥  
 गंदी बात कदे नहिं बोलाँ, जद बोलाँ जद मीठा बोला ।  
 मीठो लागै जी होली, थाँनै म्हाँको गावणो ॥ ४ ॥  
 नीयत साफ सदा ही राखाँ, जीव काम में पूरो राखाँ ।  
 पूरो संवत् जी होली, करकै पाछाँ जावणो ॥ ५ ॥

## साँचो रंग

( पालती का दिल की फड़कन को लहरो )

अब तो साँचो रंग दिखा दे होली रै—अब तो साँचो ।

दिवस रैन म्हे कराँ कुमाई,  
 तो भी हो नहिं पेट भराई ।

कोई चोखो ढंग सिखादे होली रै,  
 अब तो साँचो ॥१॥

ऐसी कोई बुद्ध बतादे,  
 थारी भल सूँ बाट बतादे ।  
 देखै ज्यँनै ढंग करादे होली रै,  
 अब तो साँचो ॥२॥

भली बात नै भट अपणावाँ,  
 बुरी बात सूँ पिंड छुड़ावाँ ।  
 ऐसो कोई चंग बजादे होली रै,  
 अब तो साँचो ॥३॥

डरवा को कुछ काम नहीं हो,  
 हटवा को भी नाँव नहीं हो ।  
 ऐसो कोई जंग जमादे होली रै,  
 अब तो साँचो ॥४॥

अंधकार नै दूर हटावाँ,  
 हिरदा में म्हे ग्यान बुलावाँ ।  
 ऐसो कोई रंग रमादे होली रै,  
 अब तो साँचो ॥५॥



## परमार्थ को न्यूतो

( जीवन कुटी का आदमी जैपर राज का कस्बा में लोगा नै  
आपका दौरा को मतलब बतावै छै )

डरपो मत म्हे तो थाँकै घर आया ॥ डरपो मत० ॥

जीवन कुटी सूँ चालर आया ।

आजकल में चल देस्याँ ॥ डरपो मत० ॥१॥

रोटी थे देस्यो तो खास्याँ ।

नातर तो म्हे कर खास्याँ ॥ डरपो मत० ॥२॥

जीवन कुटी की बात सुणास्याँ ।

सुणास्यो तो म्हे हरखास्याँ ॥ डरपो मत० ॥३॥

जची हुई म्हे बात सुणास्याँ ।

कम सुणास्यो तो गम खास्याँ ॥ डरपो मत० ॥४॥

मेल हेरता म्हे डोला छौँ ।

थाँसूँ मेल मिला जास्याँ ॥ डरपो मत० ॥५॥

परमार्थ को न्यूतो ल्याया ।

न्यूतो आज मना जास्याँ ॥ डरपो मत० ॥६॥

नथमल लूणिया द्वारा

आदर्श प्रिंटिंग प्रेस, केसरगंज अजमेर में मुद्रित ।

सञ्चालक—जीतमल लूणिया



बरस पैलो ]

112

[ बानगी बारवी ]

# जीवन कुटीर का गीत

[ माहकारी पोथी ]



प्रकाशक—

जीवन-कुटीर, वनस्थली

पो० आ० निवाड़े [ जयपुर स्टेट ]

दाम एक पोथी का }  
च्यार पीसा }

अप्रैल १९३५

{ दाम एक बरस का ॥ }  
डाक मैसूल न्यारो }



## अब सीख माँगाँ छौं



म्हे गांव में आर बस्या और परचार करबो चायो जद म्हाँनै या दीखो क गीताँ का जरिया सँ परचार नीकाँ होसी। सो म्हाँ सँ बस्या जस्या बांका बावला दो च्यार गीत बणाया। म्हे एक पिछ्छ्या हुया परगना में आर बस्या छ़ा सो भोत सोधी सादी ठेठ गाँव की बोली में ही गीत बणाबो ज्यादा ठीक समभयो जीँ सँ लोग सहजाँ ही समझ जावँ। गीताँ की नवादू बाताँ नै समझबा में थोड़ो जोर आवै सो ही आवै और बोली का कारण सँ तो बत्तो जोर न आवै। एक बार गीत बणाया और वै लोगाँ नै चोखा भी लाग्या तो फेर म्हाँ कै यो चरसो ही लाग गयो क जद कोई मोको आयो जद हो एकाध गीत बणा देणो। इयाँ करता २ म्हा कनै भोतसा गीत एकठा हो गया। कदै कोई स्हर का



पावणा आता तो म्हे वानै भी म्हाँका गीत गार सुणाता। स्हर का आदमी भी गीत सुण राजी होता—कोई २ गीताँ नै उतार ले जाता और कोई कैता क याँ गीताँ न छपा यो क्यों कोनै ? म्हे छपा-बाकी बात सुण तो लेता—पण म्हाँका मन में याही समझता क याँ गीताँ को काँई छपावाँ—छपाबा सूँ काँई फायदो होसी—कुण समझसी और कुण नै अस्या गँवारू गीत प्यारा लागसी। बस इयाँ ही पाँच बरस हो गया—एक दिन एक गीताँ को श्योकीन म्हाँनै बोल्यो क थे कैयो तो त्याओ थाँका गीत मैँ छपा यूँ। ऊँ दिन म्हाँकै या बात जचगी। पण पाछै जार यो विचार होगो क सारा गीताँ नै एकै समचै न छपार म्हेना की म्हेनै छोटी २ पोथ्याँ छपावाँ। सो मई, १९३४ सूँ गीताँ को 'बानगी' छपबा लागगो। म्हे १२ बानगी छपावा को विचार कर्यो छो—११ बानगी ई' पैली छप चुकी और या बारवी बानगी आपका हाथ में छै। म्हे विचार्यो सो काम कियाँ जियाँ पार पड्यो और अब "म्हे सीख माँगाँ छौँ"—

म्हाँनै या मालम कोनै क 'जीवन कुटीर का गीत' छपाबा सूँ कोई नै फायदो हुयो या कोनै

हुयो। और की तो और जाणै—बाकी म्हाँनै तो याँ गीताँ नै छपाबासूँ फायदो ही हुयो। म्हेनाँ की म्हेनै एक एक बानगी छपाबा की बात होबा सूँ म्हे भोतसा गायक बणा लिया—तो म्हाँ कै जतरा गायक बस्या कम सूँ कम उतना आदम्याँ नै तो जीवन कुटी को थोड़ो भोत हाल मालम होतो रियो। छोटी २ पोथ्याँ छपाबा सूँ फुटकर बिकरी भी चोखी हुई—कोई २ बानगी तो भोत बिकी फुटकर बिकरी सूँ भी परचार हुयो ही। परचार कै अलावा रुपया पीसा की बात देखी जाय तो म्हाँ नै नुकसाण तो लाग्यो कोनै—और म्हाँ कनै जतरी पोथ्याँ पड़ी छै वै बिक जाँय तो म्हाँ कै खासी बचत भी हो जाय—जीँ सूँ म्हाँनै मदत ही मिलै।

ठेठ गाँव की बोली में गीत बणाया जद पैली तो म्हाँका मन में एक ही बात छो क म्हाँका परचार का गाँवाँ का लोग नीकाँ समझ लेणा चायजे। पाछै धीरै २ तो म्हे कई बाताँ सोचबा लाग गया। एक परगना की अथवा जयादा समझाँ तो जैपरी बोली की बात नै छोड़र थोड़ी कोमिस करी जाय तो सारा राजस्थान का गाँवाँ का काम



की बोली को एक रूप बण जाय । राजस्थानी बोली तो एक छै ही—और ऊँकी जतरी बेटी पोती छै वां सब सूँ एक खास सरूप बणायो तो जा सक-  
णो चायजे । असी कलपना थोड़ा सा दूसरा आदम्याँ का मन में भी मालम पड़ी । खैर, या तो बड़ी बात छै—म्हानै तो म्हाँका मन में याही तसल्ली छै क जैपर की “काँई कूँई की” बोली में मामूली ही सही पण नवादू ल्हैर का गीत बणया तो सही—छपर दुनियाँ के सामनै आया तो सही । भोत सा लोगाँ की या शिकायत री कये गीत हिन्दी में होता तो याँ का परचार को दायरो भोत बड़ो हो जातो । वांकी या शिकायत सांची छै । पण म्हे हिन्दी में गीत बणाता तो ज्यां के ताँइ पैलै लंबर बणाता वैही कोनै समझता ।

म्हाँ को अब तक को गीताँ को खजानो तो बीत चुकयो समझणो चायजे । और गीत तो बणता ही रै छै, बणता ही रहसी । पण म्हेनाँ की म्हेनै गीतां की पोथी छपावा की बात ज़रा मुसकल पड़ै छै । म्हाँ को काम भाग दौड़ को काम रै गयो । ऊँ काम नै करताँ हुयाँ गीताँ को बराबर बणतो रैबो पार पड़ै भी और न भी पड़ै । दूसराँ छपा-

खाना म्हाँका हुकम में कोनै हो सकै—उल्टा म्हाँनै ही छपाखाना का हुकम के माफिक नाँच नाचणो पड़ै । सो म्हे या विचारी क इयाँ ही बानग्यां छपाता रैबा में म्हाँ की ताकत घणी लागसी—न तीजो स्यात थोड़ो निकलै । ई कारण सूँ म्हे याँ बानग्याँ नै तो अब बन्द करां छाँ—और म्हाँ कनै गीत बण जायला तो फेर कदे मौक़ा सूँ वाँने एकठा करर छपा देवांला ।

म्हाँका गीतां में ‘गीतपणो’ भी आयो या को नै सो भी बानग्या का बाँचवाला नै ही मालम हुई होसी । म्हाँने एक बात कैणी हुई वीनै सूदी बोली में न बोलर तुक मिलार के दोनी । ज्याँनै ये बातँ कैणी छी वाँके वास्ते तो याही ठीक भी छी । पण ज्यां लोगाँ नै गाँव की गँवारू बातँ में रस कोनै आवै वाँके वास्ते अस्या गीताँ की काँई कीमत हो सकै छै ? एकाध बार म्हाँनै या भी सुभाई गई क थोड़ा सा गीत स्हैर का काम का भी बणा वो—पण म्हाँनै भटसी या दीख्याई क आपण करवा को यो काम कोनै । आपाँ काँकड़ का पंछी टैर्या—आपणै सूँ कद स्हैर की सी मजादार चटपटी बात कही जा सकै ।



म्हाँका गीताँ में या लिखबा-माँडबा में कई खास गलत्याँ रैगी होसी बाँ सब का बारा में म्हे म्हाँका परेमी गायकाँ सँ माफी चावाँ छॉ ज्यॉ ज्यॉ भायाँ का मन में या रही हो क आपाँ तो नाहक ही रुप्यो बाराणा बिगाड्या वाँ सँ भी म्हे माफी चावाँ छॉ। कदे म्हाँका काम काज की गड् बड़ सँ और ज्यादा तर छापाना की गड्बड़ सँ बानगी आगै पाछै पूँची होसी जी की भी म्हे माफी चावाँ छॉ। आयन्दा के वास्तै म्हाँका मन में या आस छै क याँ बानग्याँ की मारफत लोगाँ सँ जीवन कुटी की जो जाण पिछाण हुई छै वा बणी ही रैसी-घणी भी न होसी तो जीवन कुटीर की बात आबा पर या तो होसी ही क अच्छा वा जीवन कुटी-जीका गीताँ की पोथ्याँ आपाँ देखी छी। बस अतरी सी हो जासी जद भी म्हाँका मन में सन्तोस मान लेस्याँ—

‘जीवन कुटीर’ आप लोगाँ की ही संस्था छै- बणै सो बन्दगी या संस्थां कर रही छै-आयन्दा भी करता रैवा को विचार छै। आप लोगाँ सँ या ही अरज छै क म्हाँ की तरफ भी कदे २ भाँक लेबो करो जी सँ म्हाँको मन ई काम में लाग्यो रै। म्हाँ

की जिन्दगी की सब सँ बड़ी चावन्या याही छै क ई देसका गाँव हरया भरया देखवानै मिलै और ई देसका याँ गाँवाँ का याँ गरीबाँ का चैरा पर भी खुसी-आनन्द की किरण देखवानै मिलै।

जीवन कुटी,  
अप्रैल १९३५ ई०

हीरालाल शास्त्री